

Salvati Reges  
M. D.



NEDEC

Anno Domini  
1665

possidet hunc  
librum

Thomas Nedecsky  
Anno 1665.

Die 6<sup>te</sup> Februarij

Hunc Librum dono  
accepi. a G. Dno Lazaro  
Falęcki S. r. r. g. r. r.  
1672

G. Tokowicz

Dn. Tokowicz donavit  
mihi hunc Librum 26  
May 1673.



AD MODVM REVERENDO  
Domino

PETRO BA-  
RANYAI ARCHI-  
diacono Luchmanensi &  
Canonico Ecclesiæ Jau-  
riensis.

Domino & Fautori obser-

vandissimo.

Christianus Casimirus  
Rifius. Diac. Varmien.

LAURENTIUS FERENCZFI

Sac: Cæs: Regiæque Majest: Se-  
cretarius Hungaricus Aulicus devo-  
tè & obsequenter præsentat

& offert.

1699

C. C. R. R. B. M. O. C. D. V. C. I. H.

X. P.

AD MODUM REVERTENDO

Dominus

PETRO BA-

RAI ARCHI-

dicono Iuchmanni &

Canonico Ecclesie Jan-

nensis

Eremitarum Camaldulensium C. M. C. /  
in Insula Wigrensi. ex Legato  
Fris Agatdangeli.

LAURENTIUS FERENCZI

Sec: Cui: Regis: M: 18: 22

clausus Hungaricus Villus: 2200

to de obsequiis: presentat

de obsequiis

Bien. B. VII, 23





PATRONA



HUNGARIAE.





SANCTISSIMO  
DOMINO NOSTRO

VRBANO VIII.  
PONTIFICI MAXIMO.

BEATISSIME PATER.



Nonnulla è sacris litteris  
Cantica, quibus me ipsum  
in hac religiosa quiete ad  
Dei laudes impensiùs pro-  
vocarem, numeris pridem poëticiis il-  
ligaverã, minùs tamen accurate quàm  
ut illa aliquando sub tanti nominis au-  
spicijs evulgare cogitarem: cùm ecce  
mihi prater spem ab Vrbe nunciatur  
exemplar meum ad manus Sanctita-  
tis Tuae devenisse. Casum protinus in

## EPISTOLA.

consilium verti; & tam singulari benignitate (quando reclus meis aspi-  
ciendis Majestatem tuam inclinasse  
dicebaris) opportunè admoneri me  
sensi ut Tibi VRBANE Pontifex Ma-  
xime quidquid hoc libelli foret, inge-  
nua grati animi significatione nuncu-  
parem. Quidni enim obnoxium tibi  
amorem meum liceat sine reverentia  
dispendio profiteri.

Ipse metus te noster amat.

à natura quippe factus es totus ut a-  
meris; à Deo singulariter electus in  
rerum Arbitrum, ut adoreris: sic hu-  
manitate tamen temperas potestatem,  
ut te pariter diligamus, pariter suspi-  
ciamus unum virorum, qui ruenti sa-  
culo nostro Efficaci lenitate succurreres,  
qui

# DEDICATORIA.

qui restitutas nunc demum Ecclesiæ  
 corpori nobilissimas partes inspiratâ  
 quaqua versum concordia, amor ipse &  
 mundi Mens sapientissimè contineres.  
 Jam vasta Germania, jã porrectos Æ-  
 thiopum tractus hæresi passim aut schis-  
 mate abjuratis mite VRBANI VIII.  
 ingenium agnoscere, suave Roma-  
 næ Ecclesiæ jugum induere postli-  
 minio latamur, in spem felicium,  
 illorum temporum erecti, quibus uni-  
 versi quondam Occidentis Princi-  
 pes agente potissimum Urbano II.  
 hostem Christiani nominis commu-  
 nem communibus copijs Orien-  
 te toto profligarunt. Ratum faciat  
 (cui proximus es Deus) votum,  
 hoc meum, quod pedibus Tuae San-  
 ctitatis aduolutus non timide concipi-



EPISTOLA DEDIC.

*pio. Duaci Calendis Januarijs,*  
*M. DC. XXIX.*

DEVOTVS SANCTITATI TVAE

FRANCISCVS DE MONTMORENCY.  
è Soc. Jctū.

Illu.



## EPISTOLA

Primum veneratio mea Vestri, deinde  
 Operis hujus dignitas, tum Auctoris, ad ex-  
 tremum Vestra. Et quidem ut de me  
 fileam ne beneficiorum in me Ve-  
 strorum commemoratio minor sit ve-  
 ro: opusculum hoc certe tale est, ut vo-  
 bis debeatur. Quippe cum partim ver-  
 bo Dei scripro, partim sincera graviq;  
 in illud Paraphrasi, selectisque Idyllijs  
 constet: in quorum sinum deponi secu-  
 riùs hic Thesaurus potuit, quam in eo-  
 rum, quos haberi & esse scio Antisti-  
 tes Custodesque Sacrorum? Iam verò  
 Auctor ipse, suo quasi jure postulat,  
 ut sibi tanquam è vobis, uni, liceat  
 apud vos tuto esse. Eò enim acceptior  
 nunc esse debet, quò ipse olim Canoni-  
 cus Magnusque Leodij Decanus, digni-  
 tatis similitudine vobis erat, conjun-  
 ctior. Neque verò eum pro extero ha-  
 bitum



# DEDICATORIA.

bitum iri suspicor, quòd Societatem  
 IESV ex Religiosæ Virtutis studio am-  
 plexus sit; cùm eò pacto novum potius  
 necessitudinis vinculum addiderit, quàm  
 solverit vetus. Amatis enim fovetisque  
 Societatem IESV: & velut in vobis, sic &  
 in alio quocunq; virtutem colitis. Nunc  
 autem quàm illustre Virtutis indicium  
 illud est, deseruisse eum non modò ea  
 quæ possidebat Comitatus duos, Baro-  
 nias plures, Toparchias quas enumera-  
 re longum esset: sed etiam spem om-  
 nem, alia maiora, ad quæ Nobilitas,  
 eruditio, probitas aditum ei fecerant,  
 consequendi. Quippe ille Montmo-  
 renciana ortus prosapia, quæ in Fran-  
 cia juxta & Belgio, Illustrissimis qui-  
 busque par esse possit: quid præter ho-  
 norum incrementa, accedentibus præ-  
 claris animi dotibus potuit expectare?

## EPISTOLA

Certè vel hoc uno quod Majores ejus in Gallia Christianam Religionem à Magno Dionysio traditam susceperint (quemadmodum Epigraphe Gentilij adscripta testatur) adduci meritò poterat, ut ab Catholicis maxima quæque speraret. Et verò Montmorencij in Gallia Principes, primis in Regno dignitatibus ab Christianissimo Rege ornati, hujus spei fructum hodieque percipiunt. Quid quod ejus Frater Ioannes Montmorencius Aurei Velleris Eques, idemque Robecanus Princeps, Morbecanus Marchio, Eterræ Comes &c. magno Belgarum mærore & damno nuper extinctus, maximis ab Catholico Rege, Legationum Titulorumque honoribus fulsit? Denique vestra ipsorum dignitas, qui Orthodoxæ Religionis facem medios inter Macho-  
meta-

• D E D I C A T O R I A .


metanos, sectariosque veris Hungaris,  
hoc est avitæ sinceræque fidei retinen-  
tissimis præfertis; animum mihi fecit ut  
quem Libellum dicari sibi voluit Pon-  
tifex Maximus, vos ultrò per me ob-  
latum minimè negligatis. Ita per vos  
in Oriente splendorem suum proferet,  
sicut per Urbanum VIII. in Occidente  
primam nuper lucem aspexit. Viennæ  
Austriæ II. Mensis Aprilis die festo glo-  
riossimæ Resurrectionis Salvatoris  
IESV. Anno ejusdem M. DC. XXXII.

*Illustrissima ac Reverendissima Celsitu-  
dinis Vestra. Nec non Reverendissima-  
rum ac Admodum Reverendarum Do-  
Vestrarum.*

Servus & Cliens devotus

L A V R E N T I V S F E-  
R E N C Z F Y Sac: Cas: Regiæ  
Majestatis Ferdinandi II. Se-  
cretarius Hungaricus Aulicus.  
REVE-





RRVERENDO  
IN CHRISTO PATRI  
P. FRANCISCO DE  
MONTMORENCY  
SOCIETATIS JESU

Anagramma.

FRANCISCVS DE MONTMORENCI  
CONSTANS FER DOMINI CRUCEM.

Ode.



ONTMORENCIACAE domus,  
Primos Christiadas qua dedit inclyta  
Felici omine Gallia,  
Flos insignis, amor Castalidū & decus.  
Quem flagrans Pietas Patrem

Praclaro inseruit nominis Ordini  
JESV, magno animo improbis  
Spretis divitys delicijs simul,  
Calcatis & honoribus:

Hic te corripienti immedicabilis  
Morbus, ledere pertinax  
Nervos dissolvit corpore languidos.  
Mens infracta manet tamen

Adversis patiens; nam bona, gloriam,

Et

*Et laudes celebras Dei.*

*O qua mellifluo gutture cantica,*

*O qua Idyllia concinis,*

*Magno grata Deo Calituum amulus?*

*Sunt hæc carmina maximi*

*URBANI nitidis auribus, arbitri*

*Orbis, digna, sed & Cedro.*

*Dum te languor edax compede detinet,*

*Et sævus cruciat dolor:*

*Pergas doctiloqua psallere Barbitò*

*Peana, & tua quod monent*

*Versis appositè nomina litteris.*

**CONSTANS FER DOMINI CRUCEM.**

*Hac calum petitur sydereum via.*

**ANTONIUS DE MOL,**

**Regius in Artesiæ Curia Confi-**  
**liarius.**

**DE**

DESACRIS CANTICIS,  
ET IDYLLIIS R. P. FRANCISCI DE  
MONTMORENCY, VRBANO VIII.  
*Pontifici Maximo dedicatis.*

Epigramma.

V Os, quæ tergemina sub maiestate coronæ,  
Collibus in septem mellificatis Apes;  
Submissis humiles alis, & supplice pennâ,  
MONTMORENCYADES suspiciunt Aquilæ.  
Et thyma, collectosque sacro de codice flores  
Deponunt vestros, ut decet, ante pedes.  
Nam quia tempestas est mellea temporis hujus,  
Romanis Aquilis quo dominantur Apes,  
Dediscunt Aquilæ fulmen, florumque ministræ  
Ætherei veniunt mellis ad obsequium.  
Este igitur faciles: inscripti nomen IESV  
Sunt flores, versæ nomen in hoc Aquilæ.  
Si legitis, summoque animam decerpitis ore,  
Dulcius hoc etiam nomine mella fluent.

GVALT. PAVLLVS è Soc. IESV  
S. Theol. Doct. & Prof.



REGNI HVNCARIAE



INSIGNIA.

S. STEPHANVS



S. STEPHANVS REX HVNGARIE.

APOST: ET PRIMVS  
REX HUNGARIÆ.


## PRIVILEGIUM.

**E** Go infra scriptus Societatis  
IESV in Gallo-Belgica Pro-  
vincialis juxta Privilegium ei-  
dem Societati concessum quo  
Bibliopolis omnibus prohibe-  
tur, ne libros ab ejusdem Socie-  
tatis hominibus compositos abs-  
que Superiorum permissione im-  
primant: Facultatem do Gerar-  
do Pattenio Typographo Dua-  
censi ut *Cantica Sacra, & Idyllia*  
P. FRANCISCI DE MONTMO-  
RENCY è Societate IESV ad sex  
annos proximos imprimere &  
liberè distrahere possit. Datum  
Tornaci II. Martij 1629.

FRANCISCUS DE LA CROIX

A

CAN-



(a) Merito  
Origenes  
canticum  
hoc omniū  
quæ unquā  
scripta sunt  
Poëmatum  
primum ap-  
pellat, ali-  
quot enim  
sæculis Li-  
num. Or-  
pheum, Hô-  
merum an-  
tecessit Mo-  
ses. Flavius  
Iosephus  
cap. ult. lib.  
2. Antiq.  
carmen hoc  
Mosis versu  
hexametro  
compositum  
fuisse con-  
tendit.

# (a) CANTICVM

Mosis & Mariæ.

*Exod. 15. cap.*

**C** Antequam Domino, gloriôsè enim ma-  
gnificatus est: equum & ascensorem  
dejecit in mare.

*Fortitudo mea, & laus mea Dominus:  
& factus est mihi in salutem.*

*Iste Deus meus, & glorificabo eum,  
Deus patris mei, & exultabo eum.*

*Dominus quasi vir pugnator: Omni po-  
tens nomen ejus.*

*Currus Pharaonis, & exercitum ejus  
projecit in mare.*



# ARGUMENTVM.

## TRADVCTO PER MARE RVERIM

*siccis vestigijs Israël, & demerso Pharaone Rege  
cum universo exercitu; Moses cum viris, Maria  
seorsum cum mulieribus Hebraeis, hoc Epinicion  
Deo Victori, Vindici, cecinerunt.*



NANIMI cantemus Jo Jo voce Triumphæ:  
Ad veteres accessit enim nova laurea pal-  
mas: (profundo.  
Præcipites Deus egit equos, equitesque  
Absit ut hoc quisquam mortalibus arroget  
armis;

Namini est solus opus. Mihi venit ab illo  
Opportuna salus. Alios gens inopia posthac  
Ne mihi singe Deos. Meus est Deus iste, meisque  
Cultus avis. Illi solemnia sacra diesque  
Lætitiam festos parti monimenta Triumphæ,  
Et meritis pendam memorem pro talibus hymnum.

Unanimi cantemus jo, jo voce Triumphæ.  
Sen Deus Vitor amas, amplo seu nomine dici  
Omnipotens; quem te pugnis ardentibus inferis?  
Fulmineum qualis quantusque assurgis in ensen?  
Senius Ægyptus didicit quid robore posses,  
Dum movet arma tuo non responsura lacerto.

Unanimi cantemus jo, jo voce Triumphæ.  
Qualis arundo leves nervo volat acta per auras,  
Talis Erythræum facile est excussus in æquor  
Indocilis Pharaó, pariterque exercitus omnis  
Et Pelusiæ pelago periere quadrigæ.

*Electi Principes ejus submersi sunt in mari Rubro; abyssi operuerunt eos, descendunt in profundum quasi lapis.*

*Dextera tua Domine magnificata est in fortitudine; dextera tua Domine percussit inimicum, & in multitudine gloriae tuae deposuisti adversarios tuos.*

*Misisti iram tuam qua devoravit eos sicut stipulam; & in spiritu furoris tui congregatae sunt aquae.*

*Stetit unda fluens: congregatae sunt abyssi in medio mari.*

*Dixit inimicus: persequar & comprehendam, implebitur anima mea.*

*Evaginabo gladium meum: interficiet eos manus mea.*

*Flavit spiritus tuus, & operuit eos mare: submersi sunt quasi plumbum in aquis vehementibus.*

(a) Vox Hebraea *Elim* plurale est nominis *El* quo Deus significatur.

*Quis similis tui in (a) fortibus Domine? quis similis tui? magnificus in sanctitate, terribilis atque laudabilis, & faciens mirabilia.*

*Extendisti manum tuam, & devoravit eos terra; Dux fuisti in misericordia tua populo quem redemisti.*

Scuta virum fluitare salo, juga fracta, rotasque  
 Aspicere est: de tot modo millibus unus & alter  
 Vix super apparent nantes in gurgite vasto.  
 Hos quoque vincit hiems: fessi referuntur ad imum  
 Ut lapis: it summas Ægyptia gaza per undas.

Unanimi canemus jo, jo voce Triumphæ.  
 Fortibus ô quantum sese tua dextera factis  
 Extulit! in populos quam dura exempla rebelles  
 Constituit, iustoque remisit lora furori!  
 Ocyor arentes non corripit ignis aristas,  
 Quam tua momento disperdidit ira superbos.

Unanimi canemus jo, jo voce Triumphæ.  
 Iussâ suos aperire sinus tibi paruit unda,  
 Et medium vidit Pharaon discedere pontum.  
 Insequar invisos, quâ me via ducit, Apellas,  
 Assequar, excindam, spolijs ornabor opimis.  
 Sic ait, oblato consternatosque periclo  
 Exhortatus equos, penetralia gurgitis alti  
 Limite pervadit latè patefacta sequestro.  
 At simul insonuit tua vox; subsidere cœpit  
 Quæ prius in montis faciem surrexerat unda,  
 Haussit & ingenti Pharaonis castra ruina.

Unanimi canemus jo, jo voce Triumphæ.  
 Ergo jaces Pharaon sub aquis, ceu plumbea pectus  
 It pelago moles, imisque recumbit arenis?  
 Figo jacet tecum non emersura profundo,  
 Quæ modò certabat Superis Mareotica pubes?

Unanimi canemus jo, jo voce Triumphæ.  
 Quis similis, Deus alme, tui? quis ferre secundum  
 Æqualemve tibi se Dis ex omnibus ausit?  
 Te tuus Israël operum memor usque tuorum  
 Compellet facilemque Pijs, rigidumque prophanis:  
 Dicat ut Hebræum servaris commodus agmen;  
 Durior ut Rubris hostes tumularis arenis.

Unanimi canemus jo, jo voce Triumphæ.  
 Alituum regina suas ut tollit in alas

Et portasti eum in fortitudine ad habitaculum sanctum tuum.

(b) Sic dicta  
antiquis Ie-  
rusalem.

Ascenderunt populi & irati sunt: dolores obtinuerunt habitatores Philistym.

*Ab Rom. Tunc conturbati sunt principes Edom, robustos Moab obtinuit tremor, dirigerunt omnes habitatores Chanaan.*

Irruat super eos formido & pavor in magnitudine brachij tui.

Fiant immobiles quasi lapis donec pertranseat populus tuus, donec pertranseat populus iste quem redemisti.

Introduces eos & plantabis eos in monte hereditatis tue, firmissimo habitaculo tuo, quod operatus es Domine.

Sanctuarium tuum quod firmaverunt manus tue: Dominus regnabit in aeternum & ultra.

Ingressus est enim eques Pharaon cum curribus & equitibus ejus in mare; & reduxit super eos Dominus aquas maris.

Filij autem Israël ambulaverunt per siccum in medio ejus.




Dulce onus, & teneros mater vehit anxia fœtus:  
 Sic geminis Abrahæ sobolem gestabis in ulnis,  
 Saxa (b) Jebusæ donec superaverit arcis.  
 Hæc domus, hæc patria est, hæc satis debita tellus.

Unanimi cantemus jo, jo voce Triumphæ.  
 At quis agit populos furor improvisus in arma?  
 Quas acies sese campis distendere cerno?  
 Prima Palæstini sustollunt signa coloni,  
 Agmina palmiferæ quos ponè sequuntur Idumes,  
 Hinc Arabum manus, inde ruit Phœnissa juvenus.  
 Idem omnes simul ardor habet fœlicibus arvis;  
 Quæ Chananæus arat, Judæ prohibere nepotes.

Unanimi cantemus jo, jo voce Triumphæ.  
 Exere terrificam cælo, Deus, exere dextram.  
 Hostilibus incussa stet hebes formidine sanguis:  
 Pigraque sopito lapidescant brachia sensu.  
 Diringeant torpore manus; admittaque totis  
 Articulis ipsos ignavia serpat in enēs.  
 Dum tuus interea medios impune per hostes  
 Carpit iter populus, montesque evadit in altos,  
 Das ubi mansuras in sæcula figere sedes.

Unanimi cantemus jo, jo voce Triumphæ.  
 Non ita Carmelus firmis radicibus hæret,  
 Non Libanus: solido stabunt ut incenia saxo  
 Israhæ quæ te, Deus, auspice condent.  
 Hic reddi tibi vota voles: hic thure litari:  
 Optribusque locum templo; quod regia Judæ  
 Posteritas olim Pario de marmore ponet.

Unanimi cantemus jo, jo voce Triumphæ.  
 Regnet Jo regnet Deus Israelis! & Orbi.  
 Imperet æternos (vel si potis amplius) annos.  
 Nam Phœnicis involuit equos, equitesque profundo,  
 Per in radiceis siccis non pervia plantis.  
 Unanimi cantemus jo, jo voce Triumphæ.



(a) Obser-  
vat hic Di-  
vus Chry-  
sostomus A-  
mantium  
iras & iur-  
gia, non mi-  
nus quam  
blanditias;  
materiam  
Canticis  
idoneam  
suppedita-  
re.

(a) CANTICVM

Novissimum Mosis.

*Deuteronom. cap. 32.*

**A**udite celi quæ loquor: audiat Terra  
verba oris mei.

Concresecat ut pluvia doctrina mea, fluat  
ut ros eloquium meum.


Quasi imber super herbam, & quasi  
stillæ super gramina, quia Nomen Domi-  
ni invocabo.

Dei perfecta sunt opera: & omnes viæ  
ejus judicia.

Deus fidelis, & absque ulla iniquitate,  
justus & rectus: peccaverunt ei, & non fi-  
lij ejus in sordibus.

Generatio prava atque perversa: hac-  
cine reddis Domino popule stulte & insi-  
piens?

Nunquid non ipse est Pater tuus qui pos-  
sedit te, & fecit, & creavit te?



## A R G V M E N T V M.

*MORTI IAM PROXIMVS MOSES,  
graviſſimam hanc ad filios Iſraël (ut eos ad Idola  
deſtuentes, in vero Dei cultu contineret) concio-  
nem habuit.*

**I** Vſus ad hanc facio dum vrba noviffima plebem;  
Eſto ſol mihi teſtis, & ô labentia cælo  
Sydera: Tuque cavis ſeu vallibus humida ſidis,  
Aſturgis ſeu Terra jugis, has accipe voces.  
Utile ros ſegeti, pratis ſitientibus imber,  
Iſacidum generi mea carmina: diſcet ab illis  
Quisque Deum celebrare. Dei ſunt omnia munus,  
Omnia ſunt illius opus. Fuit ipſe repertor  
Tot rerum quot mundus habet, quas omnibus omnes  
Abſolvit numeris, purumque exegit ad unguem.  
Ut velit, inveniet nihil hic, quod carpere livor  
Poſſit, ad artificis reſpondent ſingula normam.  
Ecquiſ enim te ſumme Parens eſt juſtior alter?  
Neſcia nempe tibi mens fallere, neſcia falli,  
Et tamen iſte (tuus ſed qui jam deſijt eſſe  
Filius) Iſraël tua fallere numina vœcor  
Sperat, honeſta ſuis obtendens nomina culpis.  
Ah ſcelerate puer! quid avorum ſtemmata jaſtas?  
Non tibi Sara parens, generis non auctor Abramus.  
Aſpis in Æthiopum te ſurda creavit arenis,  
Expuit infauſto bicolor te vipera partu,  
Talia qui reddis pro dulci præmia vita.  
Nec quem deſpicias, nec quem, maleſane, laceſſas  
Reſpicias. Hic Pater eſt: illi cunabula debes,  
Huius & uſuram frueris qua, perfide, lucis.

*Memento dierum antiquorum : cogita generationes singulas.*

*Interroga patrem tuum & annuntiabit tibi , majores tuos & dicent tibi.*

*Quando dividebat Altissimus gentes : quando separabat filios Adam.*

*Constituit terminos populorum juxta numerum filiorum Israël.*

*Pars autem Domini populus ejus : Iacob funiculus hereditatis ejus.*

*Invenit eum in terra deserta , in loco horroris & vaste solitudinis.*

*Circumduxit eum , & docuit , & custodivit ut pupillam oculi.*

*Quasi Aquila provocans ad volandum pullos suos , & super eos volitans,*

*Expandit alas suas & assumsit eum , atque portavit in humeris suis.*



Si vacat à prima nascentis origine mundi  
 Ad tua veraces evolvere tempora fastos,  
 Nec piget Annales majorum audire tuorum:  
 Inde satis disces quàm te mortalibus unum  
 Præ reliquis, miro Deus est dignatus amore.  
 Te, Puer, in quas spes, in quæ te regna vocavit,  
 Cum Pater omnipotens (stolidi monumenta laboris)  
 Cerneret educi Babylonis ad æthera turrim,  
 Et cœcile feros regnum affectare Gigantes:  
 Protinus ex illo mortales tempore sparsit  
 In varias ne capta novent temeraria, terras.  
 Communemque prius liquidi velut ævis æquor  
 Justus humum certo discevit limite mensor.  
 Obtigit hic Meroë, vicinia Persidos illis,  
 Pars istæ Ægyptum, pars in loca sola recessit  
 Armenia, gelidos alij tenere Triones.  
 E numero populorum omni bisseua Jacobi  
 Pignora lecta sui voluit Deus esse peculi.  
 Hinc fore pollicitus Chananitidos arva beatæ,  
 Quæ ditione premat mansuram in sæcula gentem.  
 O quibus officijs genus hoc delenijt! ô qua  
 Afferuit vindex per mille pericula cura!  
 Dum per arenosæ satus erraret Idumes  
 Exul, inops, nisi ferret opem Pater omnium egeno.  
 Nulla sui genitrix indulgentissima nati  
 Custodit geminos oculorum cautiùs orbes.  
 Quid loquar, annonam quòd ab æthere miserit illi?  
 Quid, medio quòd sæpe die recrearit ab æstu  
 Nube tegens? quòd nocte facem præluxerit atra  
 Quà sit iter monstrans per inhospita saxa vaganti?  
 Regia sic pullos trepidantes cudit ales,  
 Cum primum è dulci producit in aëra nido;  
 Sic docet insolitis alarum insilere remis  
 Antevolans, sic in vacuo notat æthere callem.  
 Interdum fessis subiens; tergoque receptos  
 Præpetibus sublimè vehens ad lydera pennis.

*Dominus solus dux ejus fuit : & non  
erat cum eo Deus alienus.*

*Constituit eum super excelsam terram :  
ut comederet fructus agrorum.*

*Ut sugeret mel de petra :*

*Oleumq; de saxo durissimo.*

*Butirum de armento , & lac de ovibus :  
eum adipe agnorum & arietum filiorum  
Basan.*

*Et hircos cum medulla tritici : & san-  
guinem uvæ biberet meracissimum.*

*Incrassatus est dilectus , & recalcitra-  
vit : incrassatus , impinguatus , dilatatus :*

**A3** *Dereliquit Deum factorem suum , &  
recessit à Deo salutari suo.*

*Provocaverunt eum in Dijs alienis : & in  
abominationibus ad iracundiâ concitaverunt.*

Haud secus Ifacidem spatiantibus extulit alis  
 Dux Deus ipse viæ (nec enim fuit alter ab illo)  
 Promissâque stitit tandem Chananitidos ora.

Te manet, Israël, fatis hæc debita tellus  
 Omnigenis sæcunda bonis, atque ubere glebæ.  
 Hæc loca lacte, meroque natant, certantque vicissim  
 Utra magis tibi grata ferant, magis inelyta dona.  
 Saniris en rupes nullo munuscula cultu  
 Dat tibi mella suis passim currentia saxis.  
 En lapidosus apex Hermonis pinguibus unde  
 Affluit, expressum baccis tibi fundit olivum.  
 Aspice palmiferi quot oves Jordanis ad amnem  
 Quotque suis tondent cythisim cum matribus agni  
 Aspice luctantes adversis cornibus hædos,  
 Aspice dumosa pendentes rupe capellas  
 Quotquot alit Basanæus ager; Quam multa recens  
 (Si potes) in lætis errant armenta Segoræ  
 Vallibus: Hæc tua sunt, Veteri migrante colono.  
 Utque nihil desit; malos ubi severat antè  
 Cultor Amorrhæus riguis Hesebonis in hortis;  
 Hinc modò poma leges: cessansque fruere labore  
 Alterius. Tibi felices Jerichuntis ad urbem  
 Pingua corticibus sudant opobalsama virgæ,  
 Denique quicquid habet farris tibi donat opimi  
 Eleale. Sua vina tibi mera servat, apricis  
 Ducit in Engaddi quæ collibus uva colorem.  
 Quæ quibus æquiparem? tam larga (sed auguror) harum  
 Heu! dabit ad culpam causas tibi copia rerum.  
 Qualis equus saturum stans ad præsepe, nitescit,  
 Cui luxu distenta cutis, parere magistro  
 Abnuît, insanoque recalcitrat impete sternax.  
 Tu quoque fortunæ successibus ebrie blandis;  
 Nolle Deum, tot nolle Dei benefacta negabis,  
 Acceptam soli decuit cui ferre salutem:  
 Non alijs antiqua Dijs quos nescijt ætas,  
 Nuper enim fabri calidis excusa caminis

**N3** Immolaverunt demonijs, & non Deo:  
Dys quos ignorabant.

Novi recenteq; venerunt: quos non  
coluerunt patres eorum.

**2** Deum qui te genuit dereliquisti, & ob-  
litus es Dei creatoris tui.

Vidit Dominus & ad iracundiam con-  
citatus est: quia provocaverunt eum filij,  
& filia.

Et ait. Abscondam faciem meam ab  
eis, & considerabo novissima eorum.

Generatio enim perversa est: & infideles  
filij.

Ipsi me provocaverunt in eo qui non  
est Deus: & in vanitatibus suis irritave-  
runt.

Et ego provocabo eos in eo qui non est  
populus: & in gente stulta irruabo eos.

Ignis succensus est a furore meo: & ar-  
debit usque ad inferni novissima.

Devorabitq; terram cum germine suo:  
& montium fundamenta comburet.

Congregabo super eos mala: & sagittas  
meas complebo in eis.

Consumantur fame, & devorabunt eos  
aves morsu amarissimo.



Prodiit in lucem Divorum hæc turba novorum,  
 Tempia quibus demens & pulvinaria pones;  
 Atque peregrino fundes libamina ritu.  
 O dignos fortite Deos! dum despicias illum,  
 Unus ab æterno qui temperat arbiter Orbem.  
 Siccine legitimis à sacris transfuga, Numen  
 Immortale voles istis postponere monstris?

Quis tibi summe Deum cementi talia sensus?  
 Quisq[ue] dolor? quam terribiles, quam Numine dignas  
 Concipies iras? Equidem mihi venit in artus  
 Horror, ut his hausi tua dicta minacia nuper  
 Auribus. Hac à plebe meos avertere vultus  
 Stat mihi (dicebas) stat gentem jugibus istam  
 Exercere odijs. Quia me prior odit, & ægrè  
 Ut faciat mihi, **rivales sub nostra vocare**  
 Sustinet ora, Deos simulachra carentia sensu.  
 Pro quibus admittis hanc non clementius iram.  
 Sunt viles populi, sunt & sine nomine Gentes  
 Quis mihi (submoto procul Iliacæ) iſacabo.  
 Tebeat invidia; nec sit mihi cura mederi.  
 Sed meus hic nondum stabit furor, altius imis  
 Ita sedet fibris o quos paritura tumultus!  
 Non aliter cæcis terræ penetralibus ignis  
 Aſſuat inclusus, dumq[ue] cluſtatur in auras,  
 Disſipit avulſum montis latus: ima revelans  
 Fundamenta ſoli, donec potiatur aperto  
 Aethere, & effuſis latè voret omnia flammis.  
 Bella mihi jam bella placent; jam lethifer arcus  
 Me juvat; hoſtili jam tingere tela cruore;  
 Jam gravidam calamis libet exhaustire pharetram.  
 Nec ſatis unus erit pœnæ modus. Omne malorum  
 Conſluat examen, noſtros ut adobruat hoſtes.  
 Ad mea convenient excitæ claſſica pelles  
 Mille, mihi magnas legi quas ultor in iras.  
 Et macies, & dira fames, & turpis egeſtas,  
 Et labor, ultricesq[ue] catenato agmine curæ.

*Dentes bestiarum immittam in eos, cum  
furore trahentium atq; serpentium super  
terram.*

*Foris vastabit eos gladius & intus pavor:  
juvenem ac virginem simul, lactentem cum  
homine fene.*

*Orate*

*Et dixi. ubinam sunt ? cessare faciam  
ex hominibus memoriam eorum.*

(a) Nihil  
hic Stoicū  
aut Mathe-  
maticum.  
Voce fati  
vitur pro  
Aeterno  
Dei decreto  
quod singu-  
la suo ordi-  
ne loco &  
tempore  
firmiter red-  
dit. Ut fa-  
tum (à fan-  
do) sit dictū  
divinum.

(a) Sed propter iram inimicorum distu-  
li: ne forte superbirent hostes eorum.

*Et dicerent manus nostra excelsa, &  
non Dominus fecit hæc omnia.*

*Gens absq; consilio & sine prudentia; uti-  
nam saperent & intelligerent ac novissi-  
ma providerent.*

*Quomodo persequatur unus mille: &  
duo, fugent decem millia. (S. Lom.)*

*Nonne ideo quia Deus suus vendidit eos;  
& Dominus conclusit illos?*

*Non enim est Deus noster ut Dij eorum:  
& inimici nostri sunt iudices.*

*De vinea Sodomorum vinea eorum: &  
de suburbanis Gomorrha.*

Terrorumque novæ facies, formæque volucrum  
 Horribiles visu, variorum & monstra ferarum.  
 Vos ô vos catulis si pabula quæritis ursæ,  
 Vos avidæ tygres, junctique leonibus apri  
 Huc iustus, huc fulmineos convertite dentes,  
 Devotamque neci rostris invadite gentem.  
 Vos huc cærulei virus spirante dracones,  
 Sacrilegosque mihi rabido consumite morsu.  
 Quos cita subducet vestris fuga dentibus; illos  
 Excipiat faciam temulentis sanguine mucro.  
 Nec jugulo senis, aut pueri, timidæve puellæ  
 Abstineat. Sic sic pereant disc' imine nullo.  
 Quò redijt numerosa binominis illa Jacobi  
 Progenies quæ litoreas æquabat arenas?  
 Digna quidem tota est excindi digna prophanum  
 Cupus ego memori deradam nomen ab ævo,  
 Et faciam. (a) Sed stat sua linquere tempora fatis:  
 Ascribat ne fortè suis hoc Barbarus armis;  
 Quod tribui mihi debet opus, ne victa lacerto  
 Prædicet esse suo Judææ robora pubis.  
 Usque adeone tibi est obtusum Barbare pectus,  
 Ut nequeas hoc esse meum dignoscere munus,  
 Mille quod Iliadas dare terga coegeris uni?  
 Illis ego (si nescis) animos, his robur ademî;  
 Et tibi belligeras nisi in præcordia vires  
 Auctor ego audendi. Ne me, ne, quæso, tuorum  
 Esse putes aliquem vana de gente Deorum  
 Quos impune tibi contemnere fas sit inermes.  
 Hostis erit quicumque mihi, non ibit inultus.  
 Sentiet hæc vindex scelerum quid dextera possit,  
 Sentiet Israël ô quàm mutatus ab illo!  
 Qui (fidei donec servans fuit) esse solebat  
 Noster amor, pro quo potui tot sumere curas!  
 Instar enim vitis colui: Marcotidos atræ  
 Eduxi scrobibus: Sabamæ melioribus arvis  
 Deposui, mitem si fortè rependeret uvam;

*Vva eorum vva fellis, & botri amarissimi.*

*Fel draconum vinum eorum: & venenum aspidum insanabile.*

*Nonne hac condita sunt apud me? & signata in thesauris meis?*

*Mea est ultio, & ego retribuam in tempore; ut labatur pes eorum.*

*Iuxta est dies perditionis: & adesse festinant tempora.*

*Iudicabit Dominus populum suum: & in servis suis miserebitur.*

*Videbit quod infirmata sit manus: & clausi quoque defecerunt, residuique consumpti sunt.*

*Maomet.* *Et dicet ubi sunt Diij eorum in quibus habebant fiduciam?*

*De quorum victimis comedeabant adipem & bibebant vinum libaminum.*

*Surgant & opitulentur vobis: & in necessitate vos protegant.*

At modò degenerans, succo disparque priori;  
 Induit ingenium Sodomæi palmitis; unde  
 Vina fluunt (non quæ pateris libentur & auro,  
 Cum facit in nivea castus mihi veste Sacerdos)  
 Felle magis sed amara, sed atro mixta veneno,  
 Qualia privignis dant pocula sæpe novercæ.  
 Hæc cur dissimulo quando peccata morantem  
 Extorquent mihi vindictam? cunctantia quando  
 Fata suis urget gens hæc temeraria culpis?  
 Ecce dies feralis adest, en tempus in ipsis  
 Stat foribus, cogor quo sera repositere tandem  
 Supplicia, & meritas ingrato à sanguine pœnas.  
 Ergone suprema potero damnare ruina  
 Isaacidum sobolem? Domus etgo peribit Abrani?  
 Sed meruit- Nullusne meis ultricia tela  
 Executiet manibus? Bis sunt mihi fulmina sumpta;  
 Bis cecidere. Meis adèd misératio cœptis  
 Pugnat, & ancipitem facit indulgentia mentem.  
 Vince tamen Juris rigor, & quos plectere par est;  
 Plecte gravi quamvis stabit vindicta dolore  
 Hæc mihi: dum satis Israël tactus acerbis  
 Deficiet, stricto succumbit ut hostia ferto.  
 Non acies illi validas educere campis  
 Profuerit, triplici non oppida cingere fossa:  
 Barbarus has acies, hæc subruet oppida victor.  
 Et trahet Euphratis captum trans flumina vulgus  
 Hebraidesque nurus, subdet puerosque catastæ.  
 Forsitan, Israël, hoc in discrimine speres  
 Ut tibi (tot Divos inter quibus exta cremabas,  
 Vinaque libabas pingues epulatus ad aras)  
 Auxilium rebus saltem ferat unus in arctis.  
 Te (si qua est illis virtus) tueantur amica  
 Nunc ope. Sed neque se, sua nec servare miselli  
 Fana Dijs possunt, ea quin cinesacta fatiscant,  
 Et quisquam supplex illorum numen adoret  
 Præterea? vel ijs sacros indicat honores?



## CANTICA

*Videte quòd ego sim solus: & non sit  
alius Deus prater me.*

*Ego occidam, & ego vivere faciam:  
percutiam & ego sanabo, & non est qui  
de manu mea possit eruere.*

*Levabo ad calum manum meam & di-  
cam: Vivo ego in aeternum.*

*Si acuero ut fulgur gladium meum:  
& arripuerit iudicium manus mea.*

*Reddam ultionem hostibus meis: & his  
qui oderunt me retribuam.*

*Inebriabo sagittas meas sanguine: &  
gladius meus devorabit carnes.*

(a) De i.  
propter.  
quia crude-  
liter habiti  
sunt Hebraei  
à Barbaris.


(a) De cruore occisorum & de capti-  
vitate nudati inimicorum capitis.


*Laudate gentes populum ejus: quia san-  
guinem servorum suorum ulciscetur.*

*Et vindictam retribuet in hostes eorum:  
& propitius erit terra populi sui.*



Solus ego (haud alium patiar me præter haberi)  
 Solus ego Deus Omnipotens. Quodcunque libebit  
 Memento faciam. Tollam mortalibus, idem  
 Inspirabo animam. Manus hæc in utrumque parata  
 Vultus, opemque feret. Ego te (si Verbere doctus  
 Consilia in melius referes) Hebræe jacentem  
 Rursus humo attollam, rursusque in sceptrâ reponam,  
 Excindamque tuos versâ vice funditis hostes.  
 Per me, perque meum juro immutabile Numen  
 Tales ipse mihi dabis olim Barbare pœnas,  
 Quales antè dedit tibi stirps invisa Jacobi.  
 Jam mihi jam bibulas videor satiare sagittas  
 Cæde, meumque tuis hebetare cruoribus ensẽ.  
 Alius haud unquam totus fuit ille receptus  
 Barbaræ jugulo. Stagnabunt sanguine largo  
 Nec capient amplæ demissa cadavera valles.  
 Tanti vester erit sanguis repetendus ab hoste  
 Isacidæ. Vobis oblata injuria tanti  
 (Dum coma more fuit servorum rasa) luetur.  
 Audiat hæc, Deus ipse suo quæ detonat ore,  
 Audiat Hebræi quicumque est nominis osor;  
 Admonitusque sua cogatur clade fateri  
 Esse Deum Isacidum, memorem fandi atque nefandi,  
 Sumere qui (læsus virijs) & ponere sumptas  
 Noverit (humanis precibus placabilis) iras.





## CANTICVM

Deboræ Prophetidis.

*Jud. 5. cap.*

**Q**ui sponte obtulistis de Israël animas  
vestras ad periculum benedicite Do-  
mino.


*Audite Reges, auribus percipite Prin-  
cipes ego sum, ego sum quæ Domino canam ;  
(a) psallum Domino Deo Israël.*

(a) Carmen  
hoc Debora  
ad citharā  
decantavit.  
Carminis  
character  
est plane  
Lyricus.  
(b) Seir, &  
Pharan mo-  
tes sunt A-  
rabiz Pe-  
træ.

*Domine cum exires de (b) Seir, & tran-  
sires per regiones Edom, terra mota est : ca-  
liq, ac nubes distillaverunt.*

*Montes fluxerunt à facie Domini : &  
Sinai à facie Domini Dei Israël.*

*In diebus sangar filij Anath, in diebus  
Iabel quieverunt semite, & qui ingredie-  
bantur per eas ambulaverunt per callos  
devios.*



## A R G V M E N T V M.

*INTEREMPTO MANV FOEMI  
na Chananæorum duce Sisara, profligatisq; ejus co-  
pys: Debora Prophetis Deo Victoria Auctori hanc  
Odam Eucharisticam admodulatur.*

**V**Os quibus certo capitis periclo  
Isaci sanguis stetit ista laurus;  
Numini mecum bona gratulantes  
Dicite verba.

Dux ego vobis ego dux præibo,  
Barbita vates ego grandiore  
Quâ Deo fas est meritum referre  
Ordiam hymnum.

Principes, Regesque favete linguis  
Maximus dum mi Deus Optimusque  
Dicitur, qui res jubet Israël  
Ire secundas.

Sëir, intonsus Paraniq; vertex  
Testis est quâ vi, quibus ultor armis  
Huc avos olim Deus è Canopi  
Transtulit arvis.

Non Idumæi potuere montes  
Illius præsens tolerare Numen,  
Sed fatiscentes tremuere ab imis  
Funditus antris.

Ut Dei sensit propiora terris  
Ora, sudoris simul imbre fluxit,  
Et fuit tanto sibi visus impar  
Sina calori.

*Cessaverunt fortes in Israël & quieverunt donec surgeret Debora, surgeret mater in Israël.*

*Nova bella elegit Dominus, & portas hostium ipse subvertit: clypeus & hasta si apparuerint in quadraginta millibus Israël.*

*Cor meum diligit Principes Israël; qui propria voluntate obtulistis vos discrimini benedicite Domino.*

*Qui ascenditis super nitentes asinos, & sedetis in iudicio, & ambulatis in via loquimini.*

*Ubi collisi sunt currus, & hostium suffocatus est exercitus, ibi narrentur iustitiæ Domini: & clementia in fortes Israël: tunc descendit populus Domini ad portas & obtinuit principatum.*



Reſtor Hebrææ Deus alme plebis  
Ceſſerit noſtris modò quòd Jabinus  
Copijs, hoc eſſe tui fatemur

Muneris omne.

Non enim Sangar potuit cavere  
Ne vias hoſtis Syrus obſideret,  
Et jugum ſegnes Abrahæ doceret

Ferre nepotes.

Prò pudor ! gentis malè feriatæ  
In quaterdenis nequit inveniri  
Millibus vir qui clypeum capeſſat

Ullus & haſtam.

Deboram donec Deus advocaret  
Imperij rebus propè corruentis,  
Fœminæ partes dedit Iſraëlis

Probra piandi.

Hos Deus luſit ſine more ludos,  
Et novo exemplo nova bella geſſit:  
Quò triumphales ſibi vendicaret

Solus honores.

Debitas ergo Domino reſerte  
Principes Judæ (mea cura) grates:  
Alcam quotquot ſubiſtiſtis hujus

Sponte duelli.

Tuque qui mula veheris nitenti  
Scriba, pauliſper fora rauca linque;  
Nuntios lætos age conſilienti

Dicito turbæ.

Civitas omnis ſciat Iſraëlis  
Judici ſummo placuiſſe cauſam,  
Hoſtibus pœnas ſciat irrogatas

Eſſe protervis.

Verſa narrentur Chananæa retro  
Caſtra, & obtriti ſubita ruina  
Sifaræ currus, tumidoque meſſum

Agmen in amne.

B s

Dic

*Surge Debora, surge, surge, & loquere canticum, surge Barac, prehende captivos tuos fili Abinoem.*

*Salvata sunt reliquiae populi : Dominus in fortibus dimicavit.*

*Ex Ephraim delevit eos in Amalec, & post eum ex Benjamin in populos tuos ô Amalec ; de Machir Principes descenderunt, & de Zabulon, qui exercitum ducerent ad bellandum.*

*Duces Issachar fuere cum Debora, & Barac vestigia sunt secuti, qui quasi in praecps, ac barathrum se discrimini dedit. diviso contra se Ruben magnanimorum reperta est contentio.*

*Quare habitas inter duos terminos ut audias sibilos gregum ? diviso contra se Ruben magnanimorum reperta est contentio.*

*Galaad trans Iordanem quiescebat, & Dan vacabat navibus, Aser habitabat in littore maris, & in portibus morabatur.*

*Zabulon verò & Nephtali obtulerunt animas suas morti, in regione Merome.*

Dic & Hebrææ patuisse publi  
Urbium portas, ubi jura quondam,  
Dixit infœlix folio Jabinus

Pulsus avito.

Euge qui bello meruere laudem,  
Sume venturis memorare sæclis  
Si quid æternæ canis approbandum

Debora famæ.

Inter Heroas mihi jure princeps  
Huc ades Regum domitor Barace!  
Te catenatus gradiatur ante

Hostis ovantem,

Nec meis indictus erit Camænis  
Beniamin pulchræ soboles Rachelis,  
Prælijs audax, Amalechiorum

Nuperus horror.

Debet acceptam quoque plebs salutem  
Ferre præstanti jaculis Ephræmo.  
Hujus insignis manet & Machirum

Gratia facti.

Posteros non Issacharis tacebo,  
Qui per hostiles cuneos Baracum  
Prodigum vitæ comites fuerunt

Usque secuti.

Si rogas cur his Rubenita desit;  
Ille Jordanis pecus amne lotum  
In Galadinos amat otiosus

Ducere colles.

Institor Danus, cupidusque lucri  
Navibus totus vacat instruendis;  
Nec sua cives opera tuendos

Suscipit Aser.

Non later, non sic Zabulone cretus  
Cessat: adjungit sibi Nephtalitas,  
Eligunt castris juga saltuosi

Firma Thabori.

*Venerunt Reges, & pugnauerunt; pugnauerunt Reges Chanaan in Thanach: juxta aquas Mageddo, & tamen nihil tulere pradantes.*

*De cælo dimicatum est contra eos: stela manentes in ordine & cursu suo adversus Sisaram pugnauerunt.*

*Torrens Cisson traxit cadavera eorum; torrens Cadummin, torrens Cisson. conculca anima mea robustos.*

*Vigule equorum ceciderunt fugientibus impetu & per praeceptis ruentibus fortissimis hostium.*

(a) Barbari apud Hebraeos erant omnes, qui lingua facra non uterentur.

*Maledicite terra Meroz dicit Angelus Domini, maledicite habitatoribus ejus, quia non venerunt ad auxilium Domini, in adiutorium fortissimorum ejus.*

*Æmulos contra Chananitis ora  
Suscitat Reges; & in arma mittit  
Qui tegunt latè Megidonis udam  
Milite vallem.*

*Hinc mares atque hinc animos tubarum  
Clangor admixtus lituis laceffit:  
Dura collatis ineunt utrimque  
Prælia signis.*

*O Deo dilecte nepos Jacobi!  
In tuas partes nimio favore  
Astra concedunt: tibi foederatus  
Militat æther.*

*Sydus è cæli statione lævum  
Sisaram consternat; eo timore  
In pedes sese temerè relictis  
Abijcit armis.*

*Par stupor cunctos equites, equosque  
Attonat, se præcipientes ab altis  
Dant jugis: Cisson rapidis cadentes  
Excipit undis.*

*Corporum quantos vehit hic acervos  
Auctus hostili fluviis cruore?  
Amne quot prono galeas Cadumin  
Voluit inanes?*

*Quam juvat passim super insepultos  
Ire Phœnices? Age glorioso  
Dehora insultans pede (a) Barbarorum  
Funera calca.*

*Sed quid infidæ populo Merosæ  
Imprecer? Nomen jubet execrari  
Illius, qui me monitor futuri  
Spiritus afflat.*

*Ergo nos spectaverit è propinquo  
Illa pugnantes? nec opem Israël  
Miserit? non sic id abibit illi  
Crimen inultum.*



*Benedicta inter mulieres Iabel vxor Haber Cinei , & benedicatur in tabernaculo suo.*

*Aquam petenti lac dedit , & in phiala principum obtulit butyrum.*

*Sinistram manum misit ad clavum ; & dexteram ad fabrorum malleos , percussitq; Sisaram querens in capite vulneri locum ; & tempus validè perforans.*

*Inter pedes ejus ruit & mortuus est : volebatur ante pedes ejus , & iacebat miserabilis.*

(a) Sarcasmus elegans.

*Per fenestram respiciens ululabat mater ejus , & de cœnaculo loquebatur. cur moratur regredi currus ejus , quare tardaverunt pedes quadrigarum illius ?*

*Vna sapientior ceteris vxoribus ejus hæc socrui verba respondit.*

*Forſitan nunc dividit ſpolia & pulcherrima fœminarum eligitur ei , veſtes diverſorum colorum Siſaræ traduntur in prædam , & ſupellex varia ad ornanda colla congeritur.*

*Sic pereant omnes inimici tui Domine ; & qui diligunt te ſicut Sol in ortu ſuo ſplendet , ita rutilent.*

S A C R A.

13

Sis nurus felix precor inter omnes,  
Sint tibi tentoria fausta, Jahel!  
Sub quibus fidas sibi dum latebras

Sifara quærit:

Poculo lactis datus in soporem  
Nominis tanti cadit Imperator,  
Non viri dextra, neque militaris

Cuspide teli.

Malleo clavum mulier trabalem  
(Vulneri fortita locum) sub aurem  
Egit, & nisu valido jacentis

Tempora fixit.

Ille victricis moriens puellæ  
Ad pedes, sædè ruit advolutus.

„Exitus vitæ manet is superbos

„ Morsque pudenda;

(a) I! parens, i nunc vigil è fenestra

Sifaræ observa redeantne currus:

Cur suæ (clamas) piger ille Matris

Vota moratur?

Mitte pro nato pia mater istam

Quam geris curam; valet, & triumphat:

Una, respondit, sapere inter omnes

Visa puellas:

Dividit prædas (ut opinor) illi

Virginum pulcherrimâ mancipatur:

Sifaram parto reducem triumpho

Læta videbis.


Sic malos omnes mala fata perdant;

At Boni porro magis enitescant

Ac magis; ceu Sol roseo diei

Splendet in ortu;

ARGV.



## CANTICVM

Iudith.

Cap. 16.

**I**ncipite Domino in tympanis, cantate Domino in Cymbalis, modulamini illi. psalmum novum: exaltate & invocate Nomen ejus.

(a) Solemne fuit antiquis nominibus variis, hymnos tuos ordiri, ut videtur et apud Orpheum.

(a) Dominus conterens bella, Dominus est nomen illi.

Qui posuit castra sua in medio populi sui: ut eriperet nos de manu omnium inimicorum nostrorum.

Venit Assur ex montibus ab Aquilone, in multitudine fortitudinis sue: cujus multitudo obturavit torrentes, & equi eorum cooperuerunt valles.

Dixit se incensurum fines meos, & juvenes meos occisurum gladio, infantes meos dare in pradam, & Virgines in captivitatem.

Dominus autem nocuit eum, & tradidit in manus feminae, & confodit eum.

## A R G V M E N T V M.

*O B T R U N C A T O I N C A S T R I S A D  
Bethuliam Assyriorum duce Holoferne ; Inditta  
Herois fortissima cum Bethulidum puellarum cho-  
ro Niceteria persolvit.*

*Iudith.*

**I** T E , choros festa populares luce puellæ  
Ducite , jam niveis jam plangite tympana palmis ,  
Iam tereti claros tinnitus ære ciete.  
Ipsa novis lætum modulis ego dicere carmen  
Ordiam , alternis vos respondere decebit.  
Alternò Domini celebremus carmine nomen.  
Sive potens Belli , Pacis sive Arbitrè audis ,  
Nominè sive voles alio quocunque vocari :  
Tu mihi defensor , tu semper habebere Vindex  
Tu mihi pro castris Custos eris omnibus unus.  
Innumero placeant alij sibi milite ; solus  
Meque , meosque tuo fretos munimine cives  
In medio tutos belli discrimine præstas.  
Testis erit secum nuper qui tota trahebat  
Bactra ; ducem Ninive populis quem mille crearat  
Cujus inundabant spatiosas agmina valles ,  
Cui siccata suos sistebant flumina cursus.  
Hunc opibus tantis tumidum , & suprema minatum  
Betheliæ , jam-jamque faces ad testà ferentem ,  
Vincula jam Solymis meditantem indigna puellis ;  
Præpropèro sterni te vidimus Auspice letho.  
Alternò Domini celebremus carmine nomen.

C

Cho-

(a) Decen-  
tius lauda-  
tur Judith  
à populari-  
bus puellis,  
quàm ab o-

re proprio  
(b) De Thy-  
fis Hebr. vi-  
de Fla. Io-  
seh lib. 13.  
cap. 21. co-  
rundem  
Thyrsorum  
mentio est  
expressa in  
fine 15. cap.  
lib. Judith  
ex versione  
Sept. In  
terp.

*Non enim cecidit potens eorum à juve-  
nibus, nec filij Titan percusserunt eum, nec  
excelsi Gigantes opposuerunt se illi.*

*Sed Judith filia Merari in specie faciei  
sua dissolvit eum.*

*Exiit enim se vestimento viduitatis, &  
induit se vestimento letitiae in exultatione  
filiorum Israël.*

*Vixit faciem suam unguento, & colli-  
gavit cincinnos suos mitra, accepit stolam  
novam ad decipiendum eum.*

*Sandalia ejus rapuerunt oculos ejus, pul-  
chritudo ejus captivam fecit animam ejus,  
amputavit pugione cervicem ejus.*



## Chorus puellarum.

Cui tantum licuit? ferro violare quis ausus  
 Mille coronatum palmis caput? anne superba  
 Fdidit hoc aliquis facinus de stirpe Gigantum?  
 Non ulli sese illius de vulnere jactent  
 Tiranes, non ulla manus exereita bello  
 Id potuit invenum, Tanti dux femina facti.  
 (a) O decus Hebraicum, soboles formosa Merari,  
 Non tu carminibus, Juditha tacere nostris!  
 His tibi pro meritis statuemus festa puellæ  
 Annua, te crebris te compellabimus hymnis;  
 Compita lustrantes lepidis Solymæa choræ.  
 Pars quatiet (b) thyrsos olea pars altera crinem  
 Vincita levi feriet crepitantia cymbala pulsu.  
 Hæc tibi semper erunt: dum palmas gignet Idume.  
 Dum Libanus cedros, semper tua facta canemus.  
 Fortiter ut patris pro libertate periclis  
 Obtuleris temet; penetraris ut hostica castra  
 Nil pavescata. Tux tanta est fiducia formæ.  
 Quæ licet eximia est; cultus tamen auxerat illam.  
 Dum posito squallore nitens tibi murice vestis  
 Sumpta fuit: dum mitra tuos tenuissima cirros  
 Perspicuo jussa est operire, & prodere velo.  
 Dum tibi formosos itactes liquor abluit artus.  
 Qua non arte decor fuit accessitus, ut esset  
 Quo caperes hostem? nec te spes illa fefellit.  
 Limine vix primo solea spectabilis aurea  
 Constiteras, subitis cum Barbarus ignibus arsit  
 Infelix! & jam morti devotus acerbæ.  
 Nam velut ancipiti succumbens victima cultro  
 Fœmineo truncum projecit vulnere corpus.  
 Alterno Domini celebremus carmine nomen.

*Horruerunt Persæ constantiam ejus & Medi audaciam ejus.*

*Tunc ululaverunt castra Assyriorum, quando apparuerunt humiles mei arescentes in siti.*

*Filij puellarum compunxerunt eos, & sicut pueros fugientes occiderunt eos, perierunt in pralio a facie Domini Dei mei.*

*Hymnum cantemus Domino, hymnum novum cantemus Deo nostro.*

*Adonai, Domine magnus es tu, & praeclarus in virtute tua, & quem superare nemo potest.*

*Tibi serviat omnis creatura tua: quia dixisti & facta sunt, misisti spiritum tuum, & creata sunt; & non est qui resistat voci tuae.*

*Montes à fundamentis movebuntur cum aquis, petra sicut cera liquefcent ante faciem tuam.*

*Qui autem timent te, magni erunt apud te per omnia.*

## Iudith.

Dicite, quin potius Solymorum gloria nymphæ  
 Dicite, ut attoniti stupuerunt talibus ausis  
 Persarum Medumque duces, timor omnibus unus  
 Ut mentem eripuit; latebras ut quisque pudendas  
 Quæsiit; ut totum nuper qui terruit Orbem  
 Terga dedit miles pueris fodienda tenellis.  
 Quis novus investes hic impulit ardor ephēbos  
 Ferre tot Assyrijs puerili funera dextra?  
 Quis potuit rudis hoc, ad bella nec utilis ætas?  
 Nempe Deus Deus ipse suos sic ultor in hostes  
 Incubuit; fœda sic stravit clade superbos.  
 Alterno Domini celebremus carmine nomen.

## Chorus puellarum.

Summe Deus! tenui tibi quæ præconia versu;  
 Quod damus inferius meritis, ne despice carmen.  
 Solus enim tu magna potes præstare, solesque  
 Mirandus cunctis, sed non imitabilis ulli.  
 Quicquid ubique viget rerum, tibi subsit id omne;  
 Sequæ tuum fateatur opus: tua iussu capessat,  
 Et dominæ timeat robusta tonitrua vocis,  
 Terrificæ vocis. Tellus quâ tota movetur  
 Increpitante, suis & fontibus ora relaxat;  
 Quâ reboante fluunt cautes, & saxa liquefcunt,  
 Cera velut viso leviter, tabescit ab igne.  
 Alterno Domini celebremus carmine nomen.

## Iudith.

Alme Pater! tibi prima Bonos est cura tueri.  
 Altera, supplicij est castigare superbos.

*Va genti insurgenti in genus meum, Dominus enim Omnipotens vindicabit in eos, in die iudicii visitabit eos.*


*Dabit enim ignem & vermes in carnes eorum, ut urantur, & sentiant usq; in sempiternum.*



Væ! generi quicunque pio nocuisse fereris!  
Namque tibi Dominus vermes, olidumque paravit  
Sulphur, & æternis indeficientia flammis  
Pabula, sacrilegæ carnes quibus usque crementur.  
Perpetuo Domini celebremus carmine nomen.







## CANTICVM

## Trium puerorum Hebræorum.

*Dan. cap. 3.*

**B**enedicite omnia opera Domini Domino, laudate & superexaltate eum

(a) In simili *in sæcula.*

genere me-  
tri ponit A-  
nacreon in-  
terdum Tri-  
brachim lo-  
co Anape-  
sti.

ῥόδον ἐά-  
ρος μέλη-  
μα.

*Benedicite Angeli Domini Domino: be-  
nedicite cali Domino.*

*Benedicite aquæ omnes quæ super calos  
sunt Domino: benedicite omnes virtutes Do-  
mini Domino.*

*Benedicite Sol, & Luna Domino.*


*Benedicite stella cali Domino.*

*Benedicite imber & ros Domino.*

*Benedicite omnes spiritus Dei Domino.*

*Benedicite ignis & æstus Domino: bene-  
dicite frigus & æstas Domino.*

*Benedicite rores & pruina Domino; be-  
nedicite gelu & frigus Domino.*



## A R G V M E N T V M.

## I N C O L V M E S   A B   I N C E N D I O

*forncis Babylonica servati Ananias, Azarias, &  
Misaël; hoc Deo Liberatori Eulogium uno ore de-  
promunt.*

**B**enedicite universa  
Pariter Dei Parentis  
(a) Opera, Deo Parenti;  
Et in ejus ite laudes.

Benedicite usque, & usque  
Genij Deo beati.

Benedicat almus æther  
Domino, liquore quisquis  
Super ætherem coactus  
Operit profunda cæli.

Et ocelle, Sol, diei,  
Et ocelle, Luna, noctis;  
Decora gemella mundi:  
Quibus ordinantur Horæ,  
Quibus integrantur Anni,  
Benedicite Æviternos

Domino precor per annos.

Benedicite omnia illi  
Simul astra; vos & astris  
Elementa quæ subestis.

Benedicite imber, & ros  
Domino, arduæque nubes.  
Benedicat Aura blandis  
Modulans Deo susurris.

*Benedicite glacies & nives Domino : benedicite noctes , & dies Domino.*

*Benedicite lux & tenebra Domino : benedicite fulgura & nubes Domino.*

*Benedicat terra Dominum : laudet & superexaltet eum in secula.*

*Benedicite montes & colles Domino : benedicite universa germinantia in terra Domino.*

*Benedicite fontes Domino : benedicite maria & flumina Domino.*

*Benedicite cete , & omnia qua moventur in aquis Domino : benedicite omnes volucres cali Domino.*

*Benedicite omnes bestia , & pecora Domino : benedicite filij hominum Domino.*

*Benedicat Israël Dominum , laudet & superexaltet eum in secula.*

*Benedicite sacerdotes Domini Domino : benedicite servi Domini Domino.*

Benedicat omnis illi  
Ubicunq̃ue fervet æstus,  
Ubicunq̃ue lucet ignis.

Benedicat omnis illi  
Ubicunq̃ue torpet al̃gor;  
Ubicunq̃ue nix perennat.

Benedicat alma tellus  
Domino, sinuq̃ue quicquid  
Parit illa fructuoso.

Lapidosa montiumq̃ue,  
Nemorosa colliumq̃ue,  
Domino modis canoris  
Benedicite, obsecundans  
Quibus assonabit Echo.

Benedic Deo, perenni  
Aqua sive fonte manas,  
Trepidante sive rivo  
Fugis ob̃strepens lapillis,  
Fluis amne sive pigro:  
Sonituq̃ue grandiore  
Benedicat æquor illi.

Quot aquas secare pinnis  
Didicistis ampla cete:

Quot aves secare pennis  
Liquidas amatis auras:

Quot inambulare pictis  
Pecudes soletis arvis:  
Domino quot estis omnes  
Benedicite omne in ævum.

Quibus ô quibus sed illum  
Homo prosequeris hymnis?

Benedicite Israël  
Patrio Deo nepotes.  
Bona verba dicat illi  
Soboles sacrata Levi  
Scelerisq̃ue quisquis exors

## CANTICA

*Benedicite spiritus & anime iustorum  
Domino: benedicite sancti & humiles corde  
Domino.*

*Benedicite Anania, Azaria, Misaël  
Domino, laudate & superexaltate eum in  
secula.*

*Quia eruit nos de inferno & salvos fe-  
cit de manu mortis, & liberavit nos de me-  
dio ardentis flammæ, & de medio ignis e-  
ruit nos.*

*Confitemini Domino quoniam bonus: quo-  
niam in seculum misericordia ejus.*






Agit innocenter ævum  
 Benedicat ille, m̃tis  
 Animi, Deo sacerdos.

Quid Anania moraris,  
 Quid Ananiæ sodales  
 Misæëlque, Asariaque,  
 Domino referre grates?  
 Quod ab imminente mortis  
 Sumus ungue liberati;  
 Quod inefficax obsessè  
 Nihil ausa flamma nobis,  
 Fuit innocens quod ignis;  
 Opus ejus est id omne.

Pater ô supreme rerum!  
 Tuus omniumque sensu,  
 Honor omniumque voce,  
 Celebretur vniformi.  
 Tua cantico perenni  
 Celebretur amplitudo.





## CANTICVM

## Ionæ Prophetæ.

Cap. 2.

1

(a) Tam  
graphice  
Propheta  
casus suos  
descripsit,  
ut Tabella  
expressisse  
videatur.  
Quamquam  
nec pugnat  
cū Hebræo-  
rum legibus  
Ionam so-  
spitem ob-  
tulisse Ana-  
thema ex-  
emplo Da-  
vidis appē-  
dentis ante  
Arcam Dei,  
arma Golia-  
thi; & Iu-  
ditæ, vasa  
bellica Ho-  
lofernis, &  
plurium a-  
liorum ut  
Azotiorum,  
lib. i. Re-  
gum.

**C**lamavi de tribulatione mea ad Do-  
minum, & exaudivit me: de ventre  
inferi clamavi, & exaudivisti vocem meam.

*Et projecisti me in profundum in corde  
maris: & flumen circumdedit me: omnes  
gurgites tui, & fluctus tui super me tran-  
sierunt.*

*Et dixi, Abiectus sum à conspectu ocu-  
lorum tuorum.*

*Verumtamen rursus videbo templum san-  
ctum tuum.*



## A R G V M E N T V M.

## S O S P E S E V E N T R E C E T I

*Propheta Jonas ; Providentiæ Dei efficaci hoc Anathema ex voto dedicat , consecratq̃.*

**T**E prece concepta supplex in vota vocavi  
 Alme Pater ! quamvis jam merfius funere , quamvis  
 Jam pallente forem tumultatus piscis in alvo ,

Hoc tamen è barathro voces ad sydera misi :

Perrupitque mei cælos audacia voti .

Scilicet adversis in te fiducia rebus

Spesque mihi crevit , nec enim retinentior iræ

Mortales audire negas sua crimina fallös .

Iusta quidem ( fateor ) Pater est tibi causa rebelle

Cur caput hoc perdas . Merui quodcumque reposcis

Supplicium , patiarque libens . Illis ibo procellis

Obvius , excipiamque hos toto corpore fluctus ,

Has maris ultrices ( quo tu me projcis ) undas ,

Nec satis Oceani me totius alta vorago

Expiet , infusique reis cervibus omnes

Quotquot ab extremis regionibus orbis in æquor

Exonerant pronis sese decursibus annes .

Et quisquam tot opertus aquis emergere speret ?

Speravi tamen , & Duce te Pater alme , futurum

Sum ratus , ut Solymas sistam me rursus ad aras ,

Suffigamque redux sacro donaria posti .

(a) Hæc anathema tuo ponetur Navis honori

Aurea , quam fluctu suspendent cærula cano .

Stabit & eductis in puppi fortibus urna ,

Quæ prædammatum caput hoc adjudicet undis .

Addam

*Circumdederunt me aqua usq. ad animam: abyssus vallavit me, pelagus operuit caput meum.*

*Ad extrema montium descendi: terrae vectes concluserunt me in aeternum.*


*Et sublevabis de corruptione vitam meam Domine Deus meus.*

*Cum angustaretur in me anima mea, Domini recordatus sum:*

*Ut veniret ad te oratio mea, ad templum sanctum tuum.*

*Qui custodiunt vanitates frustra: misericordiam suam derelinquunt.*


*Ego autem in voce laudis immolabo tibi, quaecumq. vovi reddam pro salute Domini.*




Addam (si tamen ais effingere norit in auro)  
 Quos adij casus. Transis ut in æquor ab altis  
 Sum præceps datus; in summis ut pendulus hæsi  
 Vorticibus, donec jam deficiente lacerto  
 Me decimus depressit ad imas fluctus arenas.  
 Parte alia abruptæ prætexent littora rupes,  
 Et velut opposito prohibebunt vecte, potiri  
 Margine terrarum. Sed enim se tollet ab alto  
 Imperijs, Deus, acta tuis regina profundi  
 Bælua, deorsum quæ me absorbebit hiatus  
 Oris, inexpletamque vorax demittet in alvum.  
 Quas non inde preces, quæ non suspiria, quæ non  
 Vota miser fudi? Damnasli tu quoque votis.  
 Namque Palestinæ pistrix adnavit arenæ,  
 Et stitit in patrio post tres me littore Soles,  
 Post toridem saltò ductas sub gurgite noctes.

Hæc ego pro foribus Solyinæi singula templi  
 Venturis ponam spectanda nepotibus. Olim  
 Forsitan occiduis huc se feret hospes ab oris  
 Qui relegens oculis mea fata sagacibus; iste  
 (Dicet) erat Christi tumulo surgentis imago.

At vos (invisum genus) hinc procul este profani.  
 Nil mihi vobiscum est. Superos sit fallere vestrum.  
 Vota sub ancipites vestrum sit fundere casus,  
 Nec præstare tamen depulsis illa periclis.  
 Non ego sic doctus. Stabit sua semper apud me  
 Gratia Cælitibus. Semper me ferre juvabit  
 Acceptam Domino cantu, fidibusque, salutem:  
 Immemorem voti ventura nec arguet ætas.







## CANTICVM

Annæ matris Samuëlis.

1. Reg. cap. 2.

**E**xultavit cor meum in Domino: & ex-  
 altatum est cornu meum in Deo meo.  
 Dilatatum est os meum super inimicos  
 meos: quia latata sum in salutari tuo.

Non est sanctus ut est Dominus, neq;  
 enim est alius extra te, & non est fortis si-  
 cut Deus noster.

Nolite multiplicare loqui sublimia glori-  
 antes.

Recedant vetera de ore vestro, quia  
 Deus scientiarum Dominus est: & ipsi præ-  
 parantur cogitationes.

(a) Ituræa  
 regio vici-  
 na Tracho-  
 pitædi,

Arcus fortium superatus est: & infirmi  
 accincti sunt robore.

## A R G V M E N T V M.

*IMPETRATA A DEO VIRILI  
prole Anna Samuëlis mater, Hymnum hunc gra-  
tulabunda decantat.*

**T**V decus omne meum! Te mens exultat in uno!  
Auspice te (supreme Parens) ego cornua tollo  
Celsius, invidia rivalis ut ilia rumpat!  
Tu mihi quæ longo fuerat suspensâ pudore  
In tua jam tandem solvis præconia linguam  
Acceptamque doces uni tibi ferre salutem.  
(Quod stupeat Natura) iubens ut anilibus annis  
Et sterili discant utero procedere partus.  
Scilicet his à te retrò responsa diebus  
Certa tuli: supplex tacito cum vota labello  
Conciperemque preces veterem Silonis ad Aram.  
Dicta fides sequitur. Quis enim te sanctior alter  
Pollicitis qui facta suis cumulatiùs addat?  
Sed neque (te præter) qui quod velit, id quoque possit,  
Invenies aliquem. Quicquid lubet efficis unus.  
Usque sibi placeat per me licet æmula: nuper  
Quæ vitio steriles ausa est mihi vertere tedas.  
Non latuere Deum tumida convitia linguæ,  
Qui potis & clamos animi deprendere sensus  
Arbitrijsque suis hominum componere curas.  
Hic jaculo fidat, velocibus ille sagittis  
Alter (a) Iturro temerè spem ponat in arcu:  
Credo equidem. Stolidas alat hæc fiducia mentes.  
Defecisse manus memini quibus antè sonanti  
Ludus erat validè jaculari spicula cornu;  
Robur & infirmos reddisse frequenter in artus.

## CANTICA

*Repleti prius, pro panibus se locaverunt.  
Et famelici saturati sunt.*

*Donec sterilis peperit plurimos: & quæ  
multos habebat filios, infirmata est.*

*Dominus mortificat, & vivificat: de-  
ducit ad inferos & reducit.*

*Dominus pauperem facit & ditat: hu-  
miliat & subleuat.*

*Suscitat de pulvere egenum: & de ster-  
core elevat pauperem.*

*Ut sedeat cum principibus: & solium  
gloria teneat.*

*Domini enim sunt cardines terra: & po-  
suit super eos orbem.*

*Pedes sanctorum suorum servabit: &  
impii in tenebris conticescent: quia non in  
fortitudine sua reborabitur vir.*

Vidi ego solantem jejunia pane secundo,  
Cui prius immensæ superârant horrea messes,  
Largaque præbuerant genialem fercula victum.  
Sæpe etiam, qui glande famem quandoque levârat,  
Contigit ut pingui siliquam mutaret arista;  
Et satur in multam traheret convivia lucem.  
Quid loquar ut conjux prius infœcunda, marito  
Post aliquot lætam sobolem produxerit annos?  
Aut ut florenti sterilefcere cœperit ævo,  
Quæ modò fundarat numerosâ prole penates?  
Et curare Deum dubitet mortalia quisquam?

O! tantum libeat spes illi credere nostras,  
Protinus ex animi procedent omnia voto!  
Si gravis intentet præsentia funera morbus;  
Non mihi pugnantes ideo languoribus herbas;  
Mixta peregrinis non quæram pocula succis:  
Tu, Pater omnipotens, me limine mortis ab ipso  
Restitues, lucisqûe viam remeare docebis.  
Si premat exircens duris me rebus egestas;  
Absit ut arcellâm quod Arabs congesserit aurum.  
Tu mihi prospicies nam te penes omnis opum visi  
Huic adimis, donas illi, cùm postulat usus  
Excubias alijs penetrent & limina Regum:  
Quò Reges ambire parem, si purpura munus  
Est, Deus alme, tuum? si quem placet evchis, imj  
Sordibus è vulgi; folio sublimis ab alto  
Jura det ut populis, dominas sumatqûe secures?  
Nempe super gemino qui cardine vertitur Orbis,  
Te Dominum agnoscit. Tibi tellus servit ab ortu  
Solis, ad Hesperium latè porrecta cubile.  
Hic facis effiorere pios, nam cura piorum  
Est tibi præ reliquis: illos ad culmen honorum  
Ducis inoffenso per mille pericula gressu.  
Cum justis tamen ellè nihil commune nocentium  
Tumba sibi norit: turpi sed inusta pudore  
Ora tegat tenebris, & nocte recondat opaca.

*Dominum formidabunt adversarij ejus:  
& super ipsos in cœlis tonabit.*


*Dominus judicabit fines terra: & dabit  
imperium Regi suo: & sublimabit cornu  
Christi sui.*





Quò recidit vis illa ferox? tremit ecce repentè  
Impius, intonuit vox ut tua fulminis instar  
Quod quatit horrendo Libani pineta fragore.  
Ultor ades! tecumque tuus qui iudicet orbem  
Unigena è pronis descendat filius altris  
Missus in imperium mundi, tua, Christus, imago:  
Venturo Princeps instauret ut omnia sæclo.





## CANTICVM

Ezechiae Regis Iuda.


*Isa. cap. 38.*

**E** Go, dixi, in dimidio dierum meorum  
vadam ad portas inferi.

*Quæsiui residuum annorum meorum, di-  
xi, Non videbo Dominum in terra viven-  
tium.*

*Non aspiciam hominem ultra: & habi-  
torem quietis:*

*Generatio mea ablata est, & convoluta  
est à me, quasi tabernacula pastorum.*



## A R G V M E N T V M.

*EZECHIAS REX IYDA, E LE-*  
*thali morbo, ad vitam revocatus: hæc Deo Sospiti-*  
*tatori canit Soteria.*

**L**anguidus, & lethi properatis oblitus umbris,  
 Nec medicâ fatis eripiendus ope;  
 Siccine (dicebam) media meus occidet hora,  
 Dum pariter meta distat utrâque dies?  
 Ergo prius quàm vita suos hæc compleat annos,  
 Ibit ad infernas non reditura domos?  
 O expectatum frustra mihi longius ævum!  
 Mitte meam posthac sollicitare fidem.  
 Quando aliter verax subigit me credere vates,  
 Et mihi vicinam nuntiat esse necem.  
 Amplius in terris non te Deus alme videbo:  
 Non tua delitias atria sancta meas.  
 Non erit ulterius mihi fas, humana tueri  
 Fecit ad effigiem quæ Deus ora suam.  
 Hæc equidem dulces sine me cernetis Amici:  
 Publica sublato quos manet hoste quies.  
 At libata mihi primoribus otia labris  
 Subtrahit, & paci Mors inopina subit.  
 Quis modò nobilium folio succedet avorum,  
 Spes quibus imperij facta perennis erat?  
 Unicus heu! raptor; simul & convolvitur omnis  
 Regia, stans in me deficiensque domus.  
 Sic sua traducit secum tentoria pastor,  
 Instabiles abiens conglomeratque lares.

*Præcisa est velut à texente vita mea ;  
dum adhuc ordiner , succidit me.*

*De mane usq<sub>3</sub> ad vesperam finies me.*

*Sperabam usq<sub>3</sub> ad mane : quasi Leo sic  
contrivit omnia ossa mea.*

*De mane usq<sub>3</sub> ad vesperam finies me. si-  
cut pullus hirundinis sic clamabo : medita-  
bor ut columba.*

*Attenuati sunt oculi mei suspicientes in  
excelsum.*

*Domine vim patior , responde pro me.  
quid dicam ? aut quid respondebit mihi , cùm  
ipse fecerit ?*

*Recogitabo tibi omnes annos meos : in a-  
maritudine anima mea.*

*Domine si sic vivitur , & in talibus vi-  
ta spiritus mei , corripies me & vivificabis  
me. ecce in pace amaritudo mea amarissi-  
ma.*

*Tu autem eruisti animam meam ut non  
periret : projecisti post tergum tuum omnia  
peccata mea.*

*Quia non infernus confitebitur tibi : neq<sub>3</sub>  
Mors laudabit te : non expectabunt qui de-  
scendunt in lacum veritatis tue.*

Sic fecat immiti crescentem pollice telam,  
Turbat & impatiens Sydonis orsa nurus.  
Me miserum! primo caput hoc quot manè dolores  
Corripiuat, longo conficiuntque die?  
Vesper adest; nec adest cum vespere meta dolorum,  
Cunctaque dum placidus corpora somnus habet:  
Nocte meos tota febris depascitur artus,  
Imaque ceu Lybicus conterit ossa Leo.  
Mitior expecto si lux mihi postera surgat;  
Postera sed nescit mitior esse dies.  
Iugibus exigitur sic noxque, diesque, querelis;  
Horaque singultu non vacat ulla meo.  
Ne mihi clamor se pullus hirundinis æquet;  
Ne querulis certet rauca columba modis.  
Vberius, mihi crede, dolet quam dicere fas est.  
Plura fero, quam me posse referre putem.  
Ægra libet tantum mihi tollere lumina cælo.  
Si cælo forsân se ferat ulla Salus  
Eja tuam, Pater alme fidem! cruciatibus impar  
Vim patior, locuples nî mihi sponsor ades.  
Mira fides! dicto citius facis, omnis ab ægro  
Prorsus ut excullus corpore languor eat.  
Corpore languor abit. Memori sed condita mente,  
Ejus erit semper causa dolenda mihi.  
Ah! quibus infelix mortales culpa periclis  
Obijcit! exitio quam mihi pœne fuit!  
Sed placuit certæ tibi me subducere morti!  
Sat fuit & parca corripuisse manu.  
En qui visus erat nuper lethalis amator  
Dulcius Hyblæo jam mihi melle sapit.  
Dum Pater, in blandi revocas me luminis oras  
Adjicis & summæ tempora plura meæ.  
Neu mea te rursus peccata lacescere possint,  
Ponè tuos humeros illa latere jubes.  
Forsitan hæc dicent taciti miracula manes  
Quos Erebi carcer nil miserantis habet?

## CANTICA

*Vivens, vivens ipse confitebitur tibi, si-  
cut & ego hodie: pater filijs notam facies  
veritatem tuam.*

*Domine saluum me fac. & psalmos no-  
stros cantabimus cunctis diebus vite nostrae,  
in domo Domini.*






S A C R A.

Aut erit ut laudet tumuli te pallidus hospes?  
 Cura sit hæc vivis, cura sit ista mihi.  
 Venturi discent à me tua facta nepotes  
 Nesciaque obstructam fallere pacta fidem.  
 O Pater! hanc tantùm serves (tua munera) vitam!  
 Non alius plectro te meliore canet.  
 Luce meos omni (si faveris) audiet hymnos  
 Quæ domus in Solymis est tibi sacra jugis.



ARGV.



Verſio Sep-  
tuag. In-  
terp. Domi-  
ne conſide-  
ravi opera  
tua, & ob-  
ſtupui, in  
medio duo-  
rum anima-  
lu cogno-  
ſceſis, cū  
appropin-  
quaerint  
anni, cogno-  
ſceſis: cū  
aderit tem-  
pus, demon-  
ſtraberis.

## CANTICVM

## Habacuc Prophetæ.

Cap. 3.

**D**omine audiui auditionem tuam, &  
timui.

*Domine opus tuum! in medio annorum  
vivifica illud.*

*In medio annorum noſtrum facies. cū  
iratus fueris, miſericordie recordaberis.*

*Deus ab Anſtro veniet: & ſanctus de  
monte Pharan.*

(a) Pharan  
mons.

*Operuit cales gloria ejus: & laudis ejus  
plena eſt terra.*

## A R G V M E N T V M.

*PRÆSAGIENS HABACVC PRO-*  
*pheta salutarem in terras Messia adventum; hanc*  
*illi Panegyrim canit.*

**P**ectoris arcanam sermo mihi nuper ad aurem  
 Pertigit (æterni sermo fuit ille Parentis)  
 Ut scñsi, ut timui, ut me stupor externavit?  
 Quæ didici? quam mira? quod ô fâtor optime rerum  
 Antonitis novitate paras opus edere terris?  
 Ergo erit ille dies, quo te de Virgine natum  
 Excipiat durum puero præsepe cubile?  
 Et duo cælestes emgant animalia cunas?  
 O qui servantur tantis natalibus anni,  
 Non expectatis properent erumpere fati!  
 Incipiantque atrox niveis decedere luces!  
 Hactenus irarum satis est. Misératio nostri  
 Te canit generis. Deus exoriaris ab Austro;  
 Sed iaculis, sed amans, blando sed amabilis ore:  
 Quale ferunt pueri pueri quid amabile. pridem  
 O desiderijs votisq̃ vocate piorum  
 Huc ades alma Mater! melioris conditor ævi!  
 Aspice venturo domus ut tibi gelbit Jêsse,  
 Utque tuos Bethle suspirat Ephrata vultus!  
 Par nihil his vidit ævi. Igneia quamvis  
 Sæcula jactetis, quando Deus affuit olim,  
 Legitæro. (a) Parani super ardaa culmina vati.  
 Cernere erat nimio nutantem pondere montem  
 Cum residens (illo quo cælum Numine complet)  
 Iuvenbuit pavidis Domini præsentia terris,  
 Et populo coram manifesta in luce refulsit.

*Splendor ejus ut lux erit, cornua in manibus ejus.*

*Ibi abscondita est fortitudo ejus. ante faciem ejus ibit Mors.*

*Et egredietur Diabolus ante faciem ejus.*

*Stetit & mensus est terram.*

*Aspexit & dissolvit gentes : & contriti sunt montes seculi.*

*Incurvati sunt colles mundi.*

*Ab itineribus aternitatis ejus.*

*Pro iniquitate vidi tentoria Æthiopie : turbabuntur pelles terre Madian.*

*Nunquid in fluminibus iratus es Domine ? aut in fluminibus furor tuus, vel in mari indignatio tua ?*

*Qui ascendis super equos tuos, & quatriga tue salvatio.*

*Suscitans suscitabis arcum tuum. jura mentis Tribulus quæ locutus es.*

Aufus ad hanc propius Moses accedere lucem;  
 Depasci innocuis sensit sua tempora flammis:  
 Dumque manu rutilans caput exploraret utraq̃ue,  
 Nata sibi in lævi descendit contrua fronte.

Hac mihi nunc aliquid de maiestate remitte  
 Præstrictos hominum quæ cogit hebescere visus.  
 Neu fuge (prætenta radijs cælestibus umbra)  
 Dissimulare tuum pueri sub imagine numen.  
 Utilius tua nempe latet, quam prodit apertè  
 Vis Divina; solet cui lethifer esse satelles  
 Terror, & antevolans Mors nocticoloribus alis.  
 Mitteris in quantos, Puer ô cælestis, honores!  
 Nam simul ac firmata virum te fecerit ætas  
 Protinus immensum spatijjs metaberis orbem.  
 Quantus erit, tuus omnis erit. sine stragè, sine armis,  
 Sola tui populos omnes reverentia vultus  
 Imperturbanda compositos pace tenebit.  
 Ausser, & extremum Solis vtriusque cubile  
 Mille tibi silent diverso tramite gentes  
 Ut famulæ iussu accipiant. Te poplite flexo  
 Omnis adorabit Regum depressa potestas  
 Quæ prius elato fenebat vertice nubes.  
 Namque quis æterno tibi sc mortalitatis adæquet?  
 Quis cedere parer? si quis tamen impia, si quis  
 Arma tuis ausit demens opponere signis,  
 Sentiet ulticis miracula splendida splendoræ  
 Qualia sunt aliàs ævo spectata priori.  
 Alter erit Gedeon collis nocte lagenis  
 Qui Meroës iterum turbet tentoria fuscæ,  
 Dissipet & solo Madianica castra fragore.  
 Nunniades iterum mirabitur he supinum  
 In caput, increpitos Domini sermonibus amnes.  
 Solis equos iterum tensis tamper habenis  
 Stare; iterum lunam medio consistere cursu.  
 Territa prodigijjs gens talibus impia discet  
 Quam valido Deus armipotens in bella lacerto

*Fluvios scindes terra, viderunt te & doluerunt, gurgēs aquarum transijt.*

*Dedit abyſſus vocem ſuam; altitudo manus ſuas lenavit.*

*Sol, & Luna ſceterunt in habitaculo ſuo. in luce ſagittarum tuarum ibunt; in ſplendore fulgurantis haſte tuæ.*

*In fremitu conculcabis terram, & in ſurore obſtupefacies gentes.*

*Egreſſus es in ſalutem populi tui. in ſalutem cum Chriſto tuo.*

*Percuſiſti caput de domo impij. denu- daſti fundamentum ejus uſq; ad collum.*

*Maledixiſti ſceptris ejus, capiti bellatorũ ejus, venientibus ut turbo ad diſpergendũ me.*

*Exultatio eorum ſicut ejus qui devorat pauperem in abſcondito.*

*Viam feciſti in mari equis tuis: in luto aquarum multarum.*

*Andivi & conturbatus eſt venter meus: à voce contremuerunt labia mea.*

*Ingrediatur putredo in oſibus meis: & ſubter me ſcateat.*

*Ut requieſcam in die tribulationis: & aſcendam ad populum accinctum noſtrum.*

*Ficus enim non florebit. & non erit ger- men in vineis.*

*Mentietur opus olive. & arva non af- ferent cibum.*



Lelimeas venias quam formitabilis hasta:  
 Sacilegas quanto labefactes robore turres  
 Dum tibi terrarum justam scelus attulit iram.  
 Hostibus illa tuis! nobis meliora, Deorum  
 Summe! quibus venias bonus ô felixque precamur;  
 Desque tuum everso Christum succurrere sæclo,  
 Qui juga depellat cervicibus improba nostris  
 Immortale parans sibi diro ex hoste tropeum,  
 Quale Parætonio quondam de Rege tulisti.  
 Hunc casum tibi bella tuæque indicare plebi  
 Haussit Erithræi refluxo salis æquore vortex:  
 Dum levibus per summa rotis invehctus aquarum  
 Trans freta ducebas Hebræos victor ovantes.

O mihi grandiloqui tantum precor affluat oris!  
 Tantum ævi! quantum sat erit tua dicere facta  
 Nate Deo! fas ô mihi sit comperta referre  
 Quæ super hoste tui statues exempla furoris!  
 Quamquã animus meminisse fugit, quamquã ora loquentis  
 Obstruit, insinuans imis sese ossibus horror.  
 Ecquis enim fando, tibi quæ dabit impius æquet  
 Supplicia? hoc, oro, dederis Pater, hoc Pater, unum  
 Sint mihi, sintque meis popularibus otia tuta,  
 Undique vicinis quando turbabitur agris.

Væ! modo qui stupasque penus atque horrea gazis!  
 Tempus erit frustrata miler cum vota dolebis.  
 Sive coles ficum, ficus malè grata colenti  
 Infortunata vix proferet arbore grossos:  
 Seu potior fuerit tibi cura putandæ;  
 Ne mihi ne speres decerpere vinitor uvam:  
 Nulla tuis istinc veniet vindemia prælis.  
 Ah! tibi cui colles olea flavente seruntur  
 Ah metuo! ne te lætet spe termes inani,  
 Illudat vacuis mendax neu bacca trapætis.  
 Quò mihi centenis glebas invertis aratris;  
 Si damnata negat cereales area fruges?  
 Grandia namque quibus commiseris hordea sulcis

*Abscindetur de ovili pecus : & non erit  
armentum in praesepibus.*

*Ego autem in Domino gandebo. & exultabo in Deo IESU meo.*

*Deus Dominus fortitudo mea : & ponet pedes meos quasi cervorum.*

*Et super excelsa deducet me victor, in psalmis canentem.*



Inde leges steriles infelix messor avenas.  
Pastores, quis vos gregibus fraudavit opimis?  
Quippe nec orba lupus, leo nec præsepia fecit:  
Contemptum vobis hæc abstulit omnia numen.  
Me fortunatum! cui sit Servator I E S V S.  
Hac ope nil dubitans montes enitar in altos  
Flammea prævertens celeris vestigia cervæ,  
Illi ego victori testudine gratus eburna  
Carmina votivum reddam genialia munus.





(a) Agnos-  
cit D. Hie-  
ronymus in  
hoc Canti-  
co frequen-  
tem esse per  
sonarum  
mutationē,  
ideoque al-  
ternis cani  
putat.

# (a) CANTICVM

## Triumphantis Ecclesiæ.

*Isa. cap. 16.*

**V** *Rbs fortitudinis nostra Sion.*

*Saluator ponetur in ea murus & ante-  
murale.*

*Aperite portas, & ingreditur gens ju-  
sta custodiens veritatem.*

*Vetus error abiit. servabis pacem, pa-  
cem quia in te speravimus.*



## A R G V M E N T V M.

*INDVCVNTVR AB ISAIA PRO-  
pheta, Animæ piorum, & Angeli beati, hoc Tri-  
umphale carmen in caelesti Ierusalem alternis con-  
cinentes.*

## Animæ piorum.

**E**Xilio datus est tandem modus. Ecce Sionis  
Agnoscent nos alma suos pomœria cives.  
O Patria! ô Divûm Solyme domus inclyta! fecit  
Magna quidem de te sparsus præconia rumor:  
Inferiora tamen veris, Iam vidimus ipsi  
Par usquam nihil esse tibi, nihil esse secundum.  
Cui Deus è solido murum se præbeat ære,  
Sitque minas contrâ duplex munimen inanes.  
Vos (genus æthereum) puræ sine corpore mentes  
Ad Solymæ quibus est custodia credita portas;  
Huc relupinatis nos intromittite valvis.  
Excipite hanc gentem, cui Mens est conscia Recti,  
Quantum concretus patitur mortalibus error,  
Qui modò cum membris abiit; purumque reliquit  
Æthereum sensum, atque aurai simplicis ignem.  
Omnia jam nobis nova sint. Æternaque nullo  
Otia contingant posthac turbanda tumultu.  
Nec verò leviora manent spem præmia nostram,  
Nostra fuit quia fixa Deo spes omnis in uno.

*Sperastis in Domino à sæculis æternis.*

(a) Thsur,  
i. petra.

*In Domino Deo (a) forti in perpetuum.*

*Quia in curvabit habitantes in excelsò;  
civitatem sublimem humiliabit.*

*Humiliabit usq<sub>3</sub> ad terram , detrahet  
eam usq<sub>3</sub> ad pulverem.*

*Conculcabit eam pes , pes pauperis gres-  
sus egenorum.*

*Semita justi recta est , rectus callis justi  
ad ambulandum.*



## Angeli.

Vestra fuit quia fixa Deo spes omnis in uno  
 Fælices Animæ! referet sua præmia victrix.  
 Nimirum solo quæ spes à Numine pendet  
 Stat firma radice, nec ullo turbine nutat.  
 Qualis structa super solidi fundamina saxi.  
 Despicit Arx ventos, cælique obnititur iræ.  
 Non illos Aries sternet, non Machina muros,  
 Non hominum vis ulla, suam mirabitur hostis  
 Hic operam ludi; suffusus & ora pudore,  
 Inde pedem referet iussis præcedere vasis.

## Animæ piorum.

O miseri! quotquot vel Opum, vel inanis Honorum  
 Spes reficit. Spes hæc in ventos omnis abibit.  
 Qualis in instabili cumulo fidentis arenæ  
 Urbs fundata (sibi quamvis sit condere cælo  
 Visa caput) subito casu labefacta fatiscet.  
 Non illos Aries sternet, non Machina muros  
 Sponte ruent. Illic lapidum cernemus acervos;  
 Urbs ubi nuper erat; illudemusque ruinæ  
 Vilibus urgentes everfa palatia plantis.

## Angeli.

Ne mihi, ne quæso viles has dicite plantas;  
 Quæ prius horridulum passu trivere virili  
 Justitiæ callem. Quid tum si callis haberi  
 Hic solet horridulus, dum per compendia ducat?

## Animæ piorum.

Duxit ad optatam nos per compendia metam

*In semita judiciorum tuorum Domine sustinuimus te: & nomen tuum, & memoriale tuum in desiderio anima.*

**Versio Sept.** *Anima mea desideravit te in nocte; sed*  
**Int,** *& spiritu meo in precordys meis de mane*  
**(a) Quia** *lux præcep-*  
*vigilabo ad te.*  
*ta tua super*  
*terra, justi-*  
*tiam disci-*  
*te habitan-*  
*tes in terra.*

**(a) Cùm feceris judicia tua in terra**  
*Domine, justitiam discant habitatores terra.*

*Misereamur impio, & non discet justitiam facere: in terra sanctorum iniqua gessit, & non videbit gloriam Domini.*

*Domine exaltetur manus tua ut non videant. videant & confundantur zelantes populi & ignis hostes tuos devoret.*

Hic (licet horridulus) callis; Non ulla viarum  
 Seduxere pedes unquam divortia nostros  
 Iustitiæ recto de tramite. Non juga nobis  
 Vlla moram fecere, nec ancipites descensus.  
 Scilicet ardor inexsaturabilis ille sequendi  
 Te quocunque Deus, pariter non molle vocabas,  
 Assiduus nostros curis acuebat amores;  
 Seu radijs nos alma dies afflaret Eois,  
 Alternis seu Nox tenebris involveret atra:  
 Usque recurfabant animo tua iussa; præbant  
 Usque tuæ leges fida vestigia luce.  
 Certior ut Tyrias non per freta Tharfica puppes  
 Dux Cynosura viæ septemplex dirigat astro.

### Angeli.

Quisquis es, alitibus qui præligis ire sinistris  
 Molle voluptatis per iter; vernare videtur  
 Quod tibi nunc violis, mox experieris acutis  
 Sentibus, & passim varijs horrere salebris.  
 Quàm velles virtutis iter tenuisse severæ,  
 Sisteris rigidum quando reus ante tribunal  
 Iudicis æterni? Damnosa fuisse videbis  
 Tunc bona, te blandi quibus indulgentia cæli  
 Ornarât, scissés illis si cautiùs uti.  
 Cultus at officijs nescisti talibus unquam  
 Discere iustitiam; circumflua copia rerum  
 Fecit ut obstrueres asper monitoribus aurem,  
 Qui sanis te consilijs ad Honesta vocabant.  
 I nunc: sperne Pios; cæli quibus annuit arcem,  
 Otiæque, emeritis Deus omne fruenda per ævum.  
 Hæc tu, (concilio exclusus cætuque Piorum)  
 Non videas. videas tamen, illa lege licebit;  
 Ut miser invidia magis ac magis ilia rumpas.  
 Dum tibi sacrilegos ignis populabitur artus.  
 Qui te, qui cruciet similis tibi Numinis hostes.

Animæ

*Domine dabis pacem nobis. omnia enim  
opera nostra operatus es in nobis.*

*Domine Dominus noster ! possederunt  
nos Domini absq<sup>ue</sup> te, tantum in te recor-  
demur nominis tui.*

(a) Sic in  
Cant. Lu-  
dith gigan-  
tes vocan-  
tur filij Ti-  
ron.

*Morientes non vivant (a) Gigantes  
non resurgunt.*

*Propterea visitaſti & contriviſti eos, &  
perdidisti omnem memoriam eorum.*

*Indulſiſti genti Domine, indulſiſti genti.  
nunquid glorificatus es ? elongaſti omnes ter-  
minos terra.*

## Animæ piorum.

Numinis eveniant hæc hostibus : ô Bona nobis  
 Pax ades , immortale Dei pax aucta munus :  
 Omnia solus enim nobis confecta dedisti  
 Bella, Deus Ter magne. Tuum est , quod concidit hostis.  
 Quod penes est nos palma ; tuum est. Nihil iste , nec ausus  
 Nec potuit , sine te propria virtute , lacertus.  
 O Pater : ô auctor nostræ columenque salutis :  
 Quamvis diversos tulimus (non sponte , sed armis  
 Compulsi) Dominos ; tamen unius usque juvabit  
 Nos meminisse tui : nomen tamen usque juvabit  
 Ferre tuum celebri super omnia nomina cantu.

## Angeli.

Pompa venit sollemnis : Jo venit ordine longo  
 Pompa Triumphalis. Manibus post terga revinctis  
 Ante Dei currus graditur victoris eburnos  
 Ausa Gygantræis olim Titania pubes  
 Aurea cælestium rescindere templa lacertis.  
 Quam dispar , quam mutatus hic cultus , ab illo  
 Qui fuit ? Hæc centum stringuntur brachia nodis ,  
 Quæ totidem nuper moderari sceptra solebant.  
 O lætis servare modum gens nescia rebus !  
 Nonne fuit fortuna magis reverenter habenda  
 Dum fluere ex animi cernebas omnia voto ?  
 Indefinito regnis dum limite regna  
 Addebat Deus effusa tibi prodigus arca ?  
 Num tamen aut actæ grates , aut reddita thura ?  
 Quin potius suscepta tibi sunt impia bella  
 In superos. Nunc ergo Deo , pro talibus ausis ,  
 Supplicium dabis , & crudeles improba pœnas.  
 Neve aliâs unquam rediviva resurgere possis ;

*Domine in angustia requisierunt te.  
In tribulatione murmuris, doctrina tua  
eis.*

*Sicut quæ concipit cùm appropinquare  
ad partum dolens clamat in doloribus suis,  
sic facti sumus a facie tua Domine.*

*Concepimus & quasi parturivimus, &  
peperimus spiritum iustitiæ.*

*Salutes non fecimus in terra.*

*Ideo non ceciderunt habitatores terra.*



Molibus immensis urgebere; Tartarus altè  
 Quà patet in præceps, fundoque jacebis in imo  
 Deradentque tuum fastis oblivìa nomen.

### Animæ piorum.

Pompa venit sollemnis; Jo venit ordine longo  
 Pompa Triumphalis. Nos, pars quotacumq; Triumphi,  
 Ponè Dei currus sequimur victoris eburnos  
 Fronde coronati viridantis tempora laurus,  
 Conspiciuntque omnes quæsitis sanguine palmis.  
 Quàm dispar, quàm mutatus hic cultus ab illo  
 Qui fuit? Has palmæ dextras Jerichuntides ornant,  
 Quas prius asperfit sudor, pulvisque duelli.  
 Hoc pretium sudoris. Amat sudore parari  
 Auratis quæ læta venit victoria pennis.  
 Rebus & ipsè Pater duris mortalia corda  
 Eundit, & signi prohibet torpere veterno;  
 Nec facilem vult esse viam virtutis; ad illam  
 Non nisi per rerum discrimina summa subitur.  
 Utque laborantes utero cruciari puellas  
 Mense solent decimo maturi pondera partus:  
 Difficiles nixus sic nos habuere, priusquam  
 Te (Pater omnipotens) obstetricante cupitum  
 Justitiæ gravido pareremus pectore fœtum.  
 Quæ non damna sumus, quæ non dispendia passi?  
 Apponenda lucro tamen omnia duximus esse  
 Damna; nec auxilijs fuit à mortalibus unquam  
 Futilis expectata salus; promittere cessa  
 Suppetias vah Terra tuas: venit Æthere ab alto  
 Nostra Salus; sed vera Salus, Non illa Tyranni  
 Ense cadit (quamvis soleat cecidisse videri)  
 Monte repubescit, sed fatis major ab ipsa.

Ange-

*Vivent mortui tui. interfecti mei resurgent.*


*Expergiscimini, & laudate qui habitatis in pulvere quia ros lucis, ros tuus; & terram gigantum detrahes in pulverem.*

*Vade popule meus in cubicula tua, claudes ostia tua super te: Abscondere modicum ad momentum, donec pertranseat indignatio mea.*

*Ecce enim Dominus egredietur de loco suo ut visitet iniquitatem habitatoris Terra contra eum. & revelabit terra sanguinem suum & non operiet ultra interfectos suos.*

## Angeli.

Morte Salus vobis est parta perennis ab ipsa.  
 Nullus enim Morti locus est, ubi vita libenter  
 Ponitur ob Veri faciendum pluris amorem.  
 Est, cui lucis amor sit Honesto charior: At vos  
 Aeterna strictos pro laude iuistis in enses.  
 Visus ut in vestram sit segnitus ipse Tyrannus  
 Quam vos ire necem. Fessius fuit ille nocendo;  
 Pectora dum vobis sunt indefessa ferendo.  
 Ingentes animæ! quibus immortalia posthac  
 Corpora debentur. Jacet, æternumque jacebit  
 Ille Gigantæa qui se modò mole ferebat:  
 Nunc apud infernos tantum levis umbra Tyrannus.  
 Altera vos at vita manet. Nunc ergo soporem  
 Excutite, Heroës, gelidisque emergite bustis.  
 Ecce Deus vestros à funere suscitât artus,  
 Ros velut ambiguae sub prima crepuscula lucis  
 Evocat in blandum torpentia gramina florem.  
 Non lapis obstabit qui degravat ossa sepulchro  
 Clausa; remoliri dabit hunc Deus: ærea signum  
 Dum tuba surgendi resonis clangoribus edet.  
 Interea sacrum cinerem tantisper amico  
 Conde sinu, tenerumque illi subterne cubile,  
 Terra Parens: donec volet indulgere sopori.  
 Tempus erit (nec longa mora est) cum Sole supremum  
 Dante diem terris, aderit qui crimina Judex  
 Arguat. Horribiles cheu: quis Judicis iras  
 Sustineat vocemque Dei? Percussa tremisces  
 Ceu tonitru Tellus; gremioque patente piorum  
 Depositos olim cineres, bibitumque cruorem  
 Innocuum, cælo reddes, vitæque perenni.



## CANTICVM

Zachariæ patris Ioannis Baptistæ.

*Luc. 1.*

**B**enedictus Dominus Deus Israël: quia  
visitavit, & fecit redemptionem ple-  
bis sue.

*Et erexit cornu salutis nobis: in domo  
David pueri sui.*

*Sicut locutus est per os sanctorum, qui  
à seculo sunt Prophetarum ejus.*

*Salutem ex inimicis nostris: & de ma-  
nu omnium qui oderunt nos.*

*Ad faciendam misericordiam cum pa-  
tribus nostris & memorari testamenti sui  
sancti.*

*Insurandum quod juravit ad Abraham  
patrem nostrum, daturum se nobis.*

*Ut sine timore de manu inimicorum no-  
strorum liberati, serviamus illi.*

*In sanctitate & iustitia coram ipso; o-  
mnibus diebus nostris.*

## A R G V M E N T V M.

NATŌ FILIO IOANNE ZACHA-  
*rias Sacerdos letitiā gestiens, & soluto jam lingua  
 vinculo in hoc Genethliacum carmen prorumpit.*

V Enit jo venit, Deus Israëlis ! ab omni  
 Absolvitque suam miseratus fœnore plebem  
 Cui prius innumeris obnoxia manserat annis.  
 Sit fœlix, saustusque suis ! tibi sanguis Jēssē  
 Præcipuē, quò non Superis acceptior alter.  
 Quale tibi nunc imperium ? quæ surgere cernes  
 Auspice regna Deo ? Tibi plenum Copia cornu  
 Desuper invergit. Tibi deserit Æthera, terris  
 Permanitura Salus, versis ad prospera tatis  
 Quam modò maturus sæclorum suscitāt ordo.  
 Quam fore concordī cecinerunt carmine vates  
 Quotquot ad hoc prisco repetuntur tempus ab ævo.  
 O vicibus mutanda Dei sententia nullis !  
 Olli stat servare suos. Furtimve, palamve  
 Quicquid agat ; nihil hostis aget. Mors unde profecta est,  
 Inde Salus nobis Stygio debetur ab angue,  
 Væ ! tibi terrarum confidentissime prædo !  
 Non ultrà spolijs capti lætaberis Orbis.  
 En sperata diu patribus promissaque nostris.  
 Libertas, longo tandem post tempore venit.  
 Quodque pio Deus addixit juratus Abramo  
 En dedit, illius nobis de sanguine nasci  
 Christum assertorem. Quo Vindice pulsa Tyrannis  
 Damnatas miserâ solvat formidine Terras.  
 Ingenuoque metum posthac mutemus amore  
 Numinis, & sanctos illi reddamus honores.

*Et tu puer Propheta altissimi vocaberis.*

*Præbis enim ante faciem Domini parare vias ejus.*

*Ad dandam scientiam salutis plebi ejus, in remissionem peccatorum eorum.*

*Perviscera misericordie Dei nostri: in quibus visitavit nos Oriens ex alto.*

*Illuminare his qui in tenebris, & in umbra mortis sedent, ad dirigendos pedes nostros in viam pacis.*



eris.

Tu quoque parve puer (sed qui puerilia nescis  
Ex utero Matris Domino Sacer) incipe summi  
Alta Patris præcox mysteria pandere vates.  
Vos hederam silvæ laurumque Ennonides illi  
Deproperate (novo munuscula debita vati)  
Tu, Jordane, super populares adijce palmas.  
Hospes enim venit iste tibi: quo gloria tollet  
Se tua: fælicem quo te jactabis alumno-  
Sit minus ut grandi celebris Carmelus Elia.

pa-

Quis tibi se veterum, puer auree, conferat? illi  
Hactenus absens desiderio flagrant:  
Tu digitum, potes in præsens intenderè Numen.  
Tu Domino veniente præis; salebrosâ viarum  
Expediens, ut nullus obex remoretur euntem.  
Qualiter ambigæ dirimens confinia noctis  
Aurora exoritur primi sub lumina Solis; -  
Infernitque rosis obeundum sedula callem.  
Exere, Nate, tuam quantum potes exere vocem;  
Dic avidæ plebi. Coram, quem quæritis, hic est  
Qui peccata suo piet insons vestra cruce.

i e-

: in

Tanta Deum generis cœpit misratio nostri,  
E superis ad nos ut se demiserit oris  
Jam nostri similis, jam majestate remissâ  
Impundos hominum patiens incurrere tactus.  
Sol ita purpureis oriens modò lotus ab undis?  
Innocuo fulgore micat, cupidusque videri  
Temperat oblatos oculis mortalibus ignes.

m-

no-

Euge decus cæli! mundo lætabile sydus;  
Redde diem meritis scelerum sub nocte, sub umbra  
Errorum populis: ut obortâ luce resectum  
Fas sit iter Recti firmis insistere plantis.



## CANTICVM

Simeonis.

*Luc. 2. cap.*

**N**unc dimittis servum tuum Domine,  
secundum verbum tuum in pace.

*Quia viderunt oculi mei salutare tuum.*

*Quod parasti ante faciem omnium po-  
pulorum.*

*Lumen ad revelationem Gentium, &  
gloriam plebis tue Israël.*





## A R G V M E N T V M.

VOTI COMPOS FACTVS SIMEON,  
*accepto in ulnas puerulo IESV cygneum hoc Me-*  
*los ante optatam mortem canit.*

**H**Ujus usuram Deus alme lucis  
 (Quod bona fiat venia) resigno;  
 Post tot ætatis tibi mancipatos  
 Hactenus annos.


Nox meis post hac oculis suprema  
 Grata continget, quibus annuisti  
 Pignus æternæ prius intueri

    Possè salutis,  
 Sanctus humana quod amor figura  
 Veltijt, solers Hominis, Dei que,  
 Pace naturas stabili, noquoque  
 Jungere nexu.

Seilicet cunctis populis ut esset  
 Obvius, nec difficilis parari,  
 Qui laborantes ope Sospitator  
 Servet amica.

Lumen ô quantum venit universis  
 Gentibus! pluris tamen æstimanda  
 Surgit Israëligenis, tuæque  
 Gloria plebi.





## CANTICVM

Beatissimæ MARIAE Virginis.

*Luc. cap. i.*

**M**agnificat anima mea Dominum.  
Et exultavit spiritus meus in Deo  
salutari meo.


*Quia respexit humilitatem ancilla sue:*

*Ecce enim ex hoc beatam me dicent  
omnes generationes.*

*Quia fecit mihi magna qui potens est.*

*Et sanctum nomen ejus.*

*Et misericordia ejus à progenie in pro-  
genies; timentibus eum.*





## A R G V M E N T V M.

*SUPREMAM HANC CANTICORVM  
 paginam claudat, super omnia Deo acceptissima  
 Beatissima Virgins MARIAE Theodoxia.*

**T**E mea magnificis animi mens efferat hymnis  
 Magne Pater! magnus nam mihi semper eris.  
 Semper eris mea sola Salus, mea sola voluptas,  
 Lætitiámque mihi non aliunde petam;  
 Quàm quòd ab excelsâ cæli respexeris arce  
 Hoc tenui natum conditione caput.  
 Nec quia debueram potiùs tibi serva videri  
 Postremæ famulas inter habenda notæ;  
 Es ratus indignum tibi, Rex supreme, fateri  
 Sic oculis humilem me placuisse tuis.  
 Simplicitas tibi visâ fuit mea digna favore.  
 Nam scio te multùm simplicitate capi.  
 Omnibus hoc fœlix perhibebor nomine terris,  
 Ibit & in laudes quilibet ordo meas.  
 Utque Dei salvo genitrix sim facta pudore,  
 Non timida credent postera sæcla fide.  
 Scilicet indulguit mihi maxima, maximus auctor,  
 Qui cælo quæ vult cuncta soloque potest.  
 Hujus ego sanctum, donec mihi vita manebit,  
 Imparibus tollam nomen ad alstra modis,  
 Hujus ego fuerit clementia quanta, docebo:  
 Quantus in hos ipsum qui reverentur, amor.  
 Ascendit Vindex omni quos semper ab ævo:  
 Jussit & in medijs nil trepidare malis.  
 Sive minas, ferrum sive intentaverat hostis;  
 Nil valuit ferrum, nil valuerat minæ:

## CANTICA

*Fecit potentiam in brachio suo:*

*Dispersit superbos mente cordis sui.*

*Deposuit potentes de sede: & exaltavit humiles.*

*Esurientes implevit bonis: & divites dimisit inanes.*

*Suscepit Israël puerum suum; recordatus misericordia sua.*

*Sicut locutus est ad patres nostros: Abraham, & semini ejus in secula.*





Obvia disjecit valido Deus arma lacerto,  
 Subruit & totas funditus hostis opes:  
 Affixitque solo tumidi diadema Tyranni,  
 Ejus ut in solium sufficeretur inops.  
 Divitis ivit inops sic in bona dignior hæres;  
 Sic eguit, dives qui sibi visus erat.  
 Fælices! quibus est summi Tutela Tonantis!  
 Quos Domini constans protegit usque favor!  
 Tu tamen Israël fælicior omnibus audis,  
 Muneribus cæli facte beate novis;  
 Dum Deus humanos ex te sibi suscitât artus:  
 Deerat adhuc titulis gloria tanta tuis.  
 Quamvis illa pio promissâ fuisset Abramo  
 Sæpius, & totidem quot numeramus, avis.  
 (Ut memor est pacti) largo cum sænore, post tot  
 Sæcla datam Dominus liberat ecce fidem.

FINIS CANTICORVM  
 SACRORVM.



THE  
HISTORY  
OF  
THE  
CITY  
OF  
NEW-YORK  
FROM  
1609  
TO  
1784  
IN  
FOUR  
VOLUMES  
BY  
JACOB  
KNEELAND  
1794

NEW-YORK  
PRINTED  
BY  
JACOB  
KNEELAND  
1794



FRANCISCI  
MONTMORENCII  
E SOCIETATE  
IESV.  
IDYLLIA.

## P R A E F A T I O.



**I**TVLVS libelli huius est  
 Idyllia antiqua appellationis.  
 Layllion enim species est Bu-  
 colici carminis, quo nullum  
 inter omnia genera carmi-  
 num aut vetustius, aut venustius. Tan-  
 tum siquidem genuinâ gratia ceteris Poë-  
 matis antecellit, quantum nativus color fu-  
 cis praestat universis. Huius porrò certior  
 origo (missis Gracorum fabulis) mihi vi-  
 detur repetenda à primis usq; Patriarcha-  
 rum Hebraorum temporibus. Pastoralem  
 illi vitam coluerunt, pastorali canu potius  
 quam scripto carmine, aurei saeculi sui fa-  
 licitatem, nuptias, funera, celebrarunt. Ni-  
 mirum oportet pastorem & pingues pasce-  
 re oves, & deductum dicere carmen. Cer-  
 tè pastrices puellas legimus in libro Judi-  
 cum è Galadinis pascuis in unum conve-  
 nire solitas quotannis; ut per dies quatuor  
 filiam Ieptæ plangerent, & alternis versi-  
 bus eius memoriam posteritati commenda-  
 rent: Id enim sonat vox Hebraea [than-  
 noth]

Severus Sul-  
 pitius vocat  
 Ieptam.

noth] quæ non tam plangere significat quam  
narrare, referre, alternis commemorare;  
quibus verbis innuit sacra Historia pa-  
trices illas puellas in agresti scena Bucolico  
dramate immolationem filie Iepta repre-  
sentasse: qua lugubri narratione commise-  
rationem & planctum in auditoribus exci-  
tarent; eorumq; mentibus varias inclytæ  
Virginis virtutes in miscellaneum velut  
unguentum artificio Poëtico colliquatas per-  
mixtasq;, subodorandas exhiberent. Hunc  
Hebraidum morem annuum plangendi, fili-  
am Ieptæ, suspicor Egyptias, Syras, Phæ-  
nissas mulieres Hebraeis confines, imitatas  
fuisse; & hinc instituisse canere Adonia,  
nobile Bucolici carminis genus. Ab his Poë-  
tris, ad Moysen veniamus, & aliquid ex-  
tra ordinem nec cum vulgo dicamus de ma-  
gno hoc vate: qui dum in solitudine greges  
soceris sui pasceret ( ut observat noster Pe-  
rerius ) florido carmine Dramatico invi-  
elam Iobi patientiam expressit; & moni-  
mentis litterarum primus consignavit. Ex-  
ceperunt veteres illos Bucolici carminis au-  
ctores, aliquanto post intervallo David, Sa-  
lomo, Isaias. At quales hi cantores, quo-  
rum Spiritus sanctus movebat ora, mentes  
erudiebat? Quid tenerius Epicidio Davi-  
dico

Vide Ruse-  
bium.

dico in funere Jonathæ decantato? quam molles in eo affectus, quam decenter recurrens intercalcaris versus? Quid festivius Genethliaco illo carmine quo sanctos Mundo Emmanuelis ortus prosequitur Isaius Vaticiniorum suorum capite undecimo? Ad quod passim allusit Virgilius tota Ecloga quarta, quam in gratiam nascituri Messie (non Salonini pueri) conscripsit: ut fufius interpretatur Divus Constantinus Caesar cap. 20. Orat. ad Sanct. Quid deniq; divinius sacro Salomonis Epithalamio cui Titulus Canticum Canticorum? Quanta in eo vis, gratia, indoles Bucolici carminis? Personæ sunt Vpiliones; pathemata, dicendi character, mira simplicitatis & candoris; comparationes nonnisi de rebus rusticis mutuata. Laudant se Amantes de forma consuetudine inter Bucolicos Poëtas recepta: sunt Zelotypia, sunt officia, sunt in his amoribus vicissitudines, sub quibus allegoricè maxima Divinae Sapientie arcana solerter adumbrantur, nec tamen usq; adeo latent, quin illa perspicax Lector intentæ mentis acie deprehendere valeat; quo more per cancellos rimari solemus mala aurea in lectulis: j: calathis argenteis aservata. Totus operis ordo planè Poëticus est,



est, qui à medijs narrationem inchoet. Deniq, si audiendi sunt Grammatici qui volunt Poëma Bucolicum unico debere consistere argumento in plures Eclogas (sicut Comicum in Scenas) diviso; quantò superior erit hac in parte noster Salomo, Bione, Theocrito, Marone, & alijs qui sibi hanc legem servandam non putarunt; Omnibus igitur numeris absolutum hoc Salomonis Epithalamium velut exemplar sibi Theocritus imitandum proposuit, in suo (quod Helena scripsit) Epithalamio; in quo non obscura Salomonici hujus vestigia deprehendi, & multa hinc ab eo desumpta & translata fuisse judicavi. Uterq, enim in consimili Neptiarum argumento Sponsæ quam celebrat pulchritudinem aequalium Adolescentularum comparatione extollit; quarum certus & definitus numerus apud utrumq, exprimitur. Ac rursus simili modo suam uterq, Sponsam exorienti Auroræ, cupresso in horio, equo in curru comparat. Nam Græca septuaginta interpreti versio habet, non ut Latina vulgaris [equitatu] sed [equæ meæ in curribus Pharaonis assimilavi te.] Quam Septuaginta seniorum versionem in Alexandria Bibliothecam relata, Theocritum legisse ex

eo fit mihi verisimile; quod Callimachus illi  
 Bibliotheca post Demetriū Phaleraum præ-  
 fuerit, sub id tempus, quo Theocritus, Lycophron, & alij ex famosa illa Poëtarū Pleiade,  
 Regi Ptolemæo Philadelpho familiariter ad-  
 hærebant. Nec dubium est quin illi Poëte è  
 sacris litteris jam in Græcum sermonē con-  
 versis, plurima in suos usus derivarint. Dis-  
 sertè id affirmat Tertullianus in Apologetico  
 cap. 47. *Quis Poëtarū* (inquit) *qui non omni-*  
*no de Prophetarum fontibus potaverit?* Ad il-  
 los te fontes (Christiane Lector) deducimus;  
 dū hos omnes Hagiographos Bucolici carmi-  
 nis scriptores tibi, in hoc Idylliorum libello, ve-  
 lut sub unum aspectum exhibemus. Et quam-  
 vis in eo numero nonnulli sint qui ad sublimio-  
 ra & cothurno propiora argumenta assurgere  
 videantur; minimè tamen dubita vi hujusmo-  
 di aliquot, Idyllijs meis inferere; Theocriti,  
 & Virgilij exemplum secutus; quorum ille,  
 Pöllucis, Herculis Deorum certamina, Hie-  
 ronis, Ptolemai regum laudes (ne dissimulatis  
 quidem eorum nominibus) operi suo Bucoli-  
 co permiscuit; alter, Pastoritjs suis laxisibus  
 non veritus est intexere Silenum, Gallum,  
 Pollionem, Eclogas gravioris argumenti,  
 quam ut merè Bucolica dici possint. Boni  
 consule, candide Lector, & his fruiere.

APES

# APES IDYLLION.

## ARGUMENTVM.

*HOC IDYLLIO SVB APVM SAMSONIS*  
*typo, S.D.N. URBANI VIII. Pontificis*  
*Maximi gentilitie APES adumbrantur.*

*Ex cap. 14. Lib. Iudic.*



RECET ab URBANI me laudibus æmula cælo  
 Majestas. Sed & has aliqua tamen annue  
 Mula verecūdis mihi delibare cicutis. (parte  
 Alter erit majore tuba qui regna Pisauri  
 URBANI canat auspicijs adjecta recenter  
 Imperio veteri, meus hanc pudor impare

Et tentare levi formidat arundine Lamum. (versu,  
 Argumenta meæ minùs ambitiosa Thalæ  
 Donet APIS, sancto quæ nectare largius ora  
 Imbuit URBANI quàm nobilis antè poète  
 Cujus Agonales Thebe vetus audijs Odas.  
 Tu mihi progenies ades ô certissima cæli  
 BARBERIDVM gentilis APIS, paullumq̃ne relicto  
 Colle Quirinali, nostras invile myricas,  
 Dum cano Bucolicum (sed non ignobile) carmen.  
 Carmen ab intonso primum Samlone repertum,  
 Quodq̃ue sub obscuro prudens Ænigmate texit:  
 Ne foret Allophilis interpres in omnibus illius  
 Carminis erueret qui sensa latentia: donec  
 Uxor id arcanum simulato perfida fletu  
 Eliceret, sic Samsoni blandita marito.

## Thamnitis.

Si qua foret, Samsø, nostri tibi cura; latere  
 Non sineres arcana tuam, reor ista puellam.  
 Quid prodest, inij quod sacra jugalia tecum;  
 Si Mens non eadem, non est par sensus utriq̃ue,  
 Si quæ scis, ego scire vetor? cur fingis amare?  
 Ah nimium sunt facta tuis pugnantia dictis.

## Samsø.

Parce queri. Non si materq̃ue, paterq̃ue rogarent,  
 Hæc arcana velim matri vel credere patri.  
 Utilius nescire tibi est. Sine, quæso, fatiget  
 Hoc alios quibus est Ænigma resolvere cordi.

## Thamnitis.

Causando gravius nostros accendis amores.  
 Septima lux teritur precibus mihi, nec tamen audis  
 Crudelis! per ego has lacrymas, per si tibi quicquana  
 Dulce meum, precor hæc ne me celaveris ultra.  
 Cur retices? num nostra tibi suspecta fides est?  
 Num metuis ne fortè meis ea civibus edam?  
 Sed prius excindi linguam radicitus istam,  
 Quàm secreta mihi patiar commissa revelli.  
 Tuta times. Si te fallo, me Numina fallant,

## Samsø.

Fasne puellarum promissis fidere quentquam?  
 Viscus aves; calamus piscem, venatica cervas  
 Lina, viros capiunt jurantis verba puellæ.  
 Improbitate tui vincor, non pondere voti.

Nec

Nec quia commissum sperem te posse tacere,  
 Sed quia cogit Amor, nodum tibi carminis hujus  
 Expediam, prima repetens ab origine, mecum  
 Hic simul intereâ viridi succede salicto,  
 Dum mediæ frangat sese calor iste dici.

Ibam fortè meos visens te nuper amores;  
 Jamque propinquabam Thamnæ; ferus ecce repentè  
 Se Leo proripuit latebris, rugitibus implens  
 Omne suburbanum, meque in certamina poscens.  
 Quid facerem? pudor hinc & virtus conscia turpi  
 Me dare terga fugæ prohibebat; inermis at illinc  
 Qui poteram monstro concurrere, quale nec unquam  
 Decolor in vastis aluit Getulia campis?  
 Non jaculum, non ensis erat, non spicula: verùm  
 Adfuit in tanto præsens discrimine Numen,  
 Et dedit adverso securum pectus ut hosti  
 Obijcerem; qui supremos arrectus in ungues  
 Insilijt, totaque ruens me mole petivit.  
 Ipse steti fidente gradu, contraque tetendi  
 Brachia librati pondus subitura Leonis,  
 Atque lacertorum firmis hunc nexibus urgens  
 Atfixi violenter humo; faucesque prehensas  
 Discerpsi tribus his digitis in frustra; cadaver  
 Ocyus abijciens inter Vineta, propinqui  
 Incipiunt Thamnæ quâ se subducere colles.  
 Ponè sequebantur senio tardante parentes;  
 Non tamen hæc illis superata pericula dixi.  
 Quanto sit satius non te quoque plura docere?

### Thamnitidis.

Immo age Sponse, mihi dulcissime Sponse virorum  
 Ordine cuncta refer, nec spes intercipe nostras.

## Samso.

Jam solidum nova Luna quater reparaverat orbem,  
 Condictamque meis tulerat sponsalibus horam;  
 Ingredior cum rursus iter; paulisper ab alto  
 Aggere deflectens ad amœna vireta, Leonis  
 Funus ubi nuda lacerum tellure jacebat.  
 Heic examen Apum video crudelis in ore  
 Mellificasse feræ; sedem sibi legerat ales  
 Nectaris heic opifex, & cerea castra locarat.  
 Vis ubi Barbariesque prius regnare solebant.  
 Quis dulces exire favos à Rege ferarum  
 Credat? ab inimiti speret quis mella Leone?  
 Anguror & terris nunc aurea sæcla redibunt,  
 Atque iterum duræ sindabunt balsama quercus:  
 Aerij quando mellis vindemia fluxit  
 Faucibus è medijs, rictuque Leonis aperto,  
 Unde favum legi: pars cessit utrique parenti,  
 Altera missa tibi est; & me pars tertia pavit.

Altrices mihi semper Apes salvet! Labori  
 Astra precor faveant sic conspirantia vestro,  
 Sic lacrymas Aurora suas dispenset, in usus  
 Sic pateant vestros liquidi commercia cæli;  
 Perpetuam fundat mellē sic dives odorum  
 Hortus, & irrigui circum violaria fontes:  
 Hoc quod agreste cano vobis, ne spernite carmen.  
 Vester ego Vates (Vatem nam me quoque dicunt  
 Pastores, quamvis timide sim credulus illis)  
 Semper ad astra feram divini mellis honores;  
 Semper APVM pangam lepidò præconia versu.  
 Ne tamen ignavo sit pervia cuique poetæ;  
 Dissimulata mihi sub Grîpho Musa latebit.

Talia Samsonem meditantem Thammis, & omne  
 Vicinum stupuit nemus. Hæc precor aura Favoni  
 Deierat URBANO dextram reverenter in aurem,





ANTONIO  
DE MONTMORENCY AB-  
BATI S. ANDREAE ET FIDEMII  
FRATRI SVO  
PASTOR-BONVS IDYLLION.  
ARGVMENTVM.

PVERVM DAVIDEM GREGI SVO  
*praescit Parens Jesse. Sub Davidis autem persona  
verus Ecclesiae Pastor designatur.*

**L** Anigeri quæ cura gregis, qui cultus habendo  
Sit pecori; Davidem Pater erudiebat Jesse  
Dum Puero mandaret oves. Tu sive Fidemi,  
Seu regis Andreæ Germane libentiùs agnos,  
O ades, & si quid potes hac cessare sub umbra,  
Obediden audire juvet, cui plaudit Ephratæ  
Et nemus & tali pulsatus carmine collis.

O Puer alme tuis placeant, sine, fratribus urbes:  
Tu mihi pasce gregem, vocat hæc te blanda venustas  
Ruris, & irrigui gelidis in vallibus amnes.  
Sume pedum, tibi gratatur canis ecce Magistro,  
Stant & oves circum, pueri nec pœnitent illas;  
Nec te pœniteat pecoris Puer aureæ; Patris  
Pavit & ipsa gregem quondam formosa Rebecca:  
Illa gravem gestans humeris candentibus urnam  
Ad puteos ducebat oves, plenisque jubebat  
Sedula currentem potare canalibus undam.  
Incipe care puer placidas mulgere capellas,

Lactea cerne tuis demittunt ubera palmis,  
 Incipe care puer: teneri puerilibus agni  
 Imperijs gaudentque regi faciuntque per herbam  
 Latitiae implentes late balatibus agros.  
 Dum cythilum lati per pingua pascua carpent,  
 Tu densas inter corylos lauróve sub alta  
 Disparibus magnam calamis imitabere Mosen,  
 Qui gracilem primus labris admovit avenam:  
 Et tua Legisero certabunt carmina vati,  
 Quamvis ille senex, quamvis sis parvulus ipse.

O foelix nimium grex te pastore futurus!  
 Si lupus insidijs, Leo vi grassetur aperta;  
 Nec puer insidias, nec vim curabis apertam,  
 Certus ab articulis prædam extorquere Leoní.  
 Sed neque turpe tibi duces languentibus agnis  
 Supposuisse humerum, si quos procumbere campo  
 Videris oblitos seræ decedere nocti.  
 At si tentet oves scabies aut arida febris;  
 Principijs vigil occurre: damnosa priusquam  
 Per reliquum serpent temerè contagia vulgus.  
 Dulcibus idcirco fluvij quandoque lavabis  
 Omne pecus, missusque secundo defluet amne  
 Dux ariès donec ripas evadat in altas.

Indole maeste puer tali! sic gloria surget  
 Æqua tuo, sic par merces pretiumque labori.  
 Vimineis quam munda tibi quam mollia qualis  
 Vellera condentur Tyrios potura rubores?  
 Quàm largè factura tuum supplebit ovile?  
 Omne gemelliparis stabit tibi matribus agmen,  
 Qui Libani frondes, Lybiæ numerarit arenas:  
 Noverit is Bethles quot ages in montibus agnos.  
 Sed nec ager quamvis pateat Bethlehemius amplè,  
 Teque tuumque gregem capiet. Pomæria profer  
 Latius ô Superis puer acceptissime; funes  
 Texe tibi longos, ut dum metabere campum  
 Sufficiant sepius: nec enim satis ullus atendo

Limes erit pecori, sed succedentibus annis  
Extremum implebis solis utriusque cubile,  
Et quâ manè recens rubicundo surgit Eoô,  
Et quâ festus aquas subit occubiturus Iberas.  
O quæ frigoribus medijs pendentur ab Arcto  
Pascua; discussis tibi iussâ virere pruinis!  
Auster & ipse novas Cancris sub sydere valles  
Detegat, immodico non uistas amplius æstu;  
Æthiopumque volent scatebris deserta rigari,  
Ut tua suppeditent vivos ad pocula fontes.  
Si mihi non vanus dedit hæc responsa Sacerdos,




## BETHLE IDYLLION.


## A R G V M E N T V M.

*FORTE GREX IESSE AD DECLI-  
nandum astum incantius se admoberat antro Beth-  
leem; cùm David pastor oves submovit longius à  
loco sacro, vaticinans olim ibi nasciturum Christum.*

**Æ** Stus erat, medioque die grex languidus umbras  
Quærebat gelido Bethleæ rupis in antro:  
Cum David admonuit sic (sati conscius) agnas,  
Parcite oves propius sanctas accedere rupes;  
Religiosus inest qui vos hinc arceat horror:  
Sicut ab ardenti reverentia Numinis olim  
Submovissè greges Mosis perhibetur Orebo.  
Ter veneranda mihi salve Bethlehemia cautes,  
Et specus; inideat meritò cui regia cæli;  
Linet enim cælum Deus hoc stabuletur ut antro  
Suspendunt humili quod agrestes fornice tophi.  
Usque adcone Deus sese demittit, ut astris  
Præferat in nudâ durum sibi rupe cubile?  
Ite precor celeres, ovium properate Magistri  
Mollia divinis sul sternere vellera membris:  
Concubia vos nocte monent sine corpore mentes  
Ætheræ, vos ipse polus vocat: oclius ite.  
Felices quos hoc Superi dignantur honore  
Pastores! hominum primi spectabitis ergo  
Primò mortales quos heic Deus induet artus?  
Vos pia figetis cælestibus oscula plantis?  
Vos puero dabitis nullo munuscula cultu

Mitia poma, nuces, spumantia cimbria lactis,  
 Quæ puer arridens (quamvis sint rustica) sumet,  
 Non thus, non aloë, non illi gratius aurum  
 Adveniet; procul Eoô quod ab Orbe (vocati  
 Prodigijs) listent submisso poplite Reges.  
 Stella viam signans hoc reges ducet ad antrum.  
 Quæ tibi Virgo parens mulcebunt gaudia pectus  
 Purpurei quando ponent diadema tyranni  
 Ante tuos Natiqûe pedes? hos excipe vultu  
 Diva bono: tollant puerum sine, Mater, in ulnas,  
 Quamvis ille tuis pugnabit abesse papillis;  
 Trade sacrum pignus. discunt infante magistro  
 Fallaces contemnere opes, contemnere luxus.  
 Fasne sibi posthac ducant dormire sub ostro,  
 Nascenti cum sint Domino præsepia cunæ?  
 Excipiatne Deum nudus lapis, aula superbos  
 Aurea mortales lævi laqueata cupresso?  
 Regibus incipiet paupertas sancta placere  
 Numinis exemplo. cælo Deus abstinet, antrum  
 Ille colat & vili pendentia pumice testæ:  
 Pro foribus longo non excubat ordine miles,  
 Nec vigil hæc armis sepit cunabula lictor;  
 Cur timet Herodes? quid ab hoc infante cavendum?  
 Cur necat infantes per Ephratea rura puellios?  
 Ah fuge Virgo-parens, pete littora tuta Canopi,  
 Eripe te cædi, sanguis meus, eripe Natum:  
 Tempus erit Solymo veniet cum victima monti.  
 Ite meæ vos hinc audax pecus ite bidentes.





# GALADITIDES IDYLLION.

## ARGUMENTVM.

*MOS INTER ISRAELITAS RECE-  
ptus, ut quotannis puella Galaditides filiam Septe  
per dies quatuor plangerent; huic Eclogæ argumen-  
tum fecit.*

Iahel.

**E** Vigila: quid stertis Hylax, dum parva puella  
Pascit oves tecum? quid si lupus irruat agnis?  
Sed venit ecce Thamar lepidi quid nescio portans,  
Unde, aut quò Thamarilla? potesne quiescere paulùm  
Hic, ubi se molles substernunt graminis herbæ,  
Et teres invitat decedere palma calori?

Thamar.

Nil magis optarim. Quis te mea dulcis Jale  
Intempestivus labor hic tenet, otia quando  
Quatuor hæ suadent festæ tibi ducere lucas?

Iahel.

Otia sunt alijs; nunquam mihi. Namque noverca  
Imperat injustum (festa quoque luce) laborem,  
Has ut agam (quod non illi bene verterit) agnas.

Tha-



## Thamar.

Infelix! hanc quæ pompam non videris, ô quos  
 Jeptiadi ludos chorus instauravimus omnis  
 Nympharum? quæ vota piæ persolvimus umbræ?  
 O quale alternis cecinerunt carmen Elisa,  
 Et Mariæ nostris famosa poëtria sylvis?

## Iahel.

Tu memora, pompæ leviolem feceris hujus  
 Jacturam, mihi si referes, quæ videris ipsa.

## Thamar.

Hoc ago, si meminisse queam. Lætissima Masphæ  
 Est in conspectu vallis, quam scena coronat  
 Desuper illicibus densis, multaqué cupressò,  
 Huc simul ad tumulum Jeptæ Heroidis omnis  
 Turba puellarum quovis concurrimus anno.  
 Pars calathis violas, & candida lilia plenis  
 Expediunt, cumulantque rosis halantibus urnam;  
 Pars pedibus plaudunt choreas; pars carmina dicunt;  
 Et pastoralem dant in prosœnia Musam.  
 Sunt quoque victrici sua præmia, textus hibisco  
 Reticuli sinus, attrita dependulus ansa,  
 Gaiula cancellis ubi clausa tenetur Acanthis.  
 Sorte prior certamen init, meditataque paullatim  
 Cœpit Elisa suos liquido sic gutture cantus.  
 Ecce Galadinis velox tulit Hora puellis  
 Annua plangoris simulamina Virginis almæ  
 Ad tumulum. Vos ô Nymphæ plorate sodales  
 Jeptiadem, Nymphæ mecum vos jungite planctus;  
 Jeptias instituit fieri sibi talia; carmen

Exequiale sibi cecinit moritura per altos  
 Jeptias Hermonis lucos, vallesque profundas;  
 Plangorisque sui voluit meminisse minores.  
 Heu Virgo miseranda! tuæ quod vota parentis  
 Quod recidunt? Heu infœlix, te cœlibe, Mater!  
 Infœlix Mater magis, an miseranda puella?  
 Et miseranda puella, infœlix tu quoque Mater,  
 Unica nubilibus cui filia deperit annis,  
 Spes generis tanti. Tua nunc erit orba senectus.  
 Heu! apium quoties, aut brassica vilis in horto  
 Intereunt, alium toties nascuntur in annum;  
 Et succisa redit, scilicetque refeminat arbor:  
 Tu decus Hebraïdum Virgo, cui nulla tulerunt  
 Sæcla parem; primo cœlebs extingueris ævo,  
 Et pariter tecum Jeptæ domus interit omnis.  
 O dolor æternus! sæclis ô flenda futuris,  
 Nec tamen Hebræis satis unquam fleta puella!  
 Quantas ista bibent lacrymas tua busta quotannis?  
 Quanta puellarum nemus hoc lamenta videbit?  
 Non reor ad tumultum formosæ plura Rachelis  
 Temporibus Bethle spectavit Ephratea priscis.  
 Hæc libatille tuo nos qualiacumque sepulchro  
 Nunc sat erit; redeunte iterum lugeberis anno.  
 Finierat. Favor excepit motusque coronæ.

### Iahel.

Et me nescio qua dulcedine carmen Elisæ  
 Mulsit; apum veluti lenes æstate susurrari,  
 Aut salices inter crepitantis sibilus Auræ.  
 Dic modò quæ contrà Mariæ responderit illi  
 Non equidem facilis (me iudice) palma futura est.

### Thamar.

Cespice de viridi surgens, phylisæque revincta

Hæc

Hæc Mariæ tactis subjunxit carmina nervis.

Parcite lamentis sanctos offendere Manes:

Mascula namque coli virtus Heroidos odit

Talibus officijs, & degeneri ululatu.

Devotam patriæ pro libertate puellam

Cur gemitis? Quid tum si cælebs egit? & ampla

Indelibatos commendat gratia flores.

„ Casta placent Superis. Hæc virginitate severa

Filia demeruit Jeptæ sibi numen amicum,

Itacidisque, tibi, Virgo, debere fatemur

Quòd lupus à nostris Ammonius abstinet agnis,

Quòd nec Idumæos metuant armenta leones,

Assyriæve feras. hæc tu facis otia nobis.

Ergo redux formosa tuo Pax munere terris

Fundit opes pleno per rura virentia cornu.

Lacte fluunt fontes, Arnon tibi nectare currit.

Galgala melle natant, stillat Carmelus olivo:

Sanctis ipse tuos vertex nemorosus honores

Sentit, & ediscunt ipsæ tua nomina cedri,

Ipsa sonant arbusta. Mihi salvete beati

Jeptiadæ Manes! & candida virginis umbra

O ades, & tua visæ favens pede festa secundo!

Hæc tibi de platano suspendimus ecce corollas

Cujus id in lævi legitur breve cortice carmen,

*Hospes; Jeptiadæ plantam Generaro dicatam.*

Unguentis illam, liquidoque rigamus amomo

Multa tui memores. coluit quam Debbora palmam

Laudabunt alij: platanus tua, maxima semper

Dicetur nobis, & erit quoque maxima semper.

Hæc memini. Sed tempus oves te cogere septis;

Aspice jam solvit fessis juga bobus arator.

Et satis hæc referet tibi sæpe dilectior Aegle.

## SALOMO IDYLLION.

## ARGUMENTVM.

*HOC IDYLLIO LAUDATUR, ET  
prophanis aliorum Eclogis præfertur, sacrum Sa-  
lomonis Bucolicum poema cui titulus Canticum  
Canticorum: quo (sub pastoralibus scenis) immor-  
tali Deo mortalem nostram naturam, atq; adeo  
Ecclesiam sibi despondenti, Epithalamium cecinit.*

**Q**uod nemus, aut quæ vos habuerunt pascua Musæ  
Bucolicæ, molli Salomo dum lentus in umbrâ  
Pastoris caneret Sponsalia fausta Theandri?  
Namque nec Alphæi ripæ, nec Mænala vobis  
Injecere moram, nec opaci sylvæ Lycæi,  
Tonsæve tercentum Cææ dumeta juvencis.  
Fama refert, Helice vos Arcadiaque relictâ  
Corripuisse gradum lucos Gabaonis ad altos:  
Pulcher ubi Salomo calamos non passus inertes  
Sylvestrem tenui pangebatur arundine cantum.  
Ante pedes illi vitulæ, tamique jacebant,  
Lanigeroque lupo pecori permixtus, & ursæ  
Cum catulis docilem pariter præbentibus aurem.  
Venit & Uphilio, robustus venit arator,  
Venit Idumæi lignator & accola saltus;  
Omnes, ad Solymi numeros saliere Poëtæ.  
Aspiceres ipsas sua prodere gaudia pinus,  
Summaque coniferas motare cacumina cedros,  
Dum canit afflatus divino numine vates  
Connubium, cælo terras quod fœdere jungit.

Sed superinducto tegit hæc mysteria velo  
 Ardua; sub scenis & pastoralibus abdit  
 Quæ plebi vulgare nefas arcana prophanæ.  
 Arcades usque sibi placeant, cantare periti  
 Arcades; at tantum cedunt Salomonis avenæ  
 Graculus arguto quantum si certet olori,  
 Multa Sionæum commendat gratia cygnum  
 Seu trepidantis aquæ rivos, seu mollia cantat  
 Prata, vel halantes depingit floribus hortos;  
 In medijs ubi Sponsa rosas sibi nacta cubile  
 Oscula sollicitat teneri (sed casta) Theandri;  
 Quæ licet & placitis indulget amoribus. At quos  
 Principiò dulces habet, experietur amaros  
 In viduis ab amante thoris deserta Theandro.  
 Quos non est animo, non corpore passa dolores  
 Erronem per cuncta suum dum rura requirit?  
 Ah virgo infelix te saxa per invia durus  
 Raptat amor, donec fessos sopor obruat artus!  
 Sed benè, sopitæ quod Amans superadvenit; altam  
 Virginis & miserans prohibet turbare quietem.  
 Vos ô per ceptas Solymitides (oro) puellæ,  
 Mos quibus est humero pharetram gestare comanti,  
 Sectarique levis vestigia flammea cervæ;  
 Ne clamore feras in retia vestra prematis;  
 Neve quiescentem somno fraudetis amicam:  
 Dormiat, & donec volet ipsa sopore fruatur.  
 Sic etiam sopita mihi placet. Unicus iste  
 Lactea neglectim qui pender in ubera cirrus,  
 Cor mihi surripuit. Et quid non, cætera possint?  
 Me sibi sexdecies optarunt sæpe puellæ;  
 Sola tamen Sulamitis habet. Sic astra latere  
 Cuncta jubet, simulac oriens Aurora refulsit;  
 Cedaris in saltu sic palma, cupressus in horto  
 Eminet, in Pharijs equa sic Phœnissæ quadrigis.  
 O varias in amore vices! amat ecce vicissim  
 Ecce Theander amat. Nunc expergiscere Virgo;

Te, tuus ille vocat. Pariter rus ibitis vnà;  
 Et nova visetis Sabamæ vineta supinæ:  
 Num gemmas ibi palmes agat rescire iuvabit;  
 Punica num passim se floribus induat arbor.  
 Hinc ad aromaticos Libani transibitis hortos,  
 Tondeat areolas ut olentis Sponsus amomi,  
 Assyriumque metat calamum, casiamque, crocumque;  
 Addet Orontæ lacrymas super omnia mirrhæ,  
 Undique conquirens dignum Sulamitide munus.  
 Pulchra quidem sunt hæc à pulchro dona Theandro,  
 His tamen est quantò donis pretiosior ipse?  
 Candidior totus nivibus, folioque ligustri,  
 Hunc nisi candorem confini diluat oistro,  
 Mala coloratis rubicundior utraq; pomis,  
 Pinxit in aprico quæ sol pendentia ramo.  
 Ut nitet intonsis illi caput omne capillis:  
 Qualis olivarum flavescit frondibus Hermon?  
 Ut gingiva pares servat candore nivali,  
 Et retegat pulchro digestos ordine dentes,  
 Perspicuus solvat si labra decentia risus?  
 Hac fluit eloquium vel melle suavius ipso.  
 Quid digitos, tornoque manus radente politas,  
 Quid memorem Parias referentia crura columnas?  
 Est alius qui colla magis miratur eburna;  
 Prædicat hic oculos: ego cerea brachia laudo,  
 Et mihi par cedris, aut lætior esse videtur  
 Hic habitus teres, hæc species procera Theandri;  
 Vertice sic toto medijs in millibus extat.  
 Denique quicquid agat rerum, quicquidue loquatur,  
 Illecebris scatet omnis, & omnem spirat amorem.  
 Hunc sortita virum fortunatissima Virgo,  
 Ne qua cave tibi vis, ne quis dolus auferat unquam.  
 Hic erit ambabus gestandus semper in ulnis,  
 Fascis ut apprimitur fragrantis ad ubera mirrhæ:  
 Hic tibi servandus Cypriâ vigilantius uvâ



Qualis in Engaddi mitescit vertice collis.  
Omnia Davidides Salomo quæ jactat Jüdæ  
Montibus, agresti dignatus ludere versu.  
Moxque repercussæ valles & concava, cœlo  
Demissos cantus supera ad convexa remittunt.






# N V P T I A E R V T H I D Y L L I O N.

## A R G V M E N T V M.

*DEDVCITVR SPONSA RVTH MO-  
abitur ad domum Bosi mariti futuri, à decem Vir-  
ginibus Ephrataeis, Sponsam more prisco comitan-  
tibus. Non dissimilem parabolam habes Matth.  
25. cap. Ubi decem virgines noctu cum lampadi-  
bus exierunt obviam Sponso & Sponsa, & aper-  
tâ januâ quæ paratæ erant introierunt ad nuptias.*

**E**Xtulcrat cælo jucundos Hesperus ignes,  
Qui desponsâ suo connubia perficit ortu:  
Cum simul innuptæ, Bethles è flore, puellæ  
Convenerc decem redimitæ tempora sertis:  
Læva manus viridi spargebat compita fronde,  
Altera sublato quatiebat pollice tedas.  
Hoc ibat, comitum genialis pompa, paratu  
Ad nitidas Bosi dum Sponsam duceret ædes,  
Casta vercundos abdentem in flammea vultus.  
Interea læto resonabant omnia cantu,  
Quem chorus argutâ tollebat ad æthera voce.  
Quæ Bona Sors huc ex Arabum te paupere campo  
Elimelæ peregrina nurus concedere jussit?  
Fortunata nimis! quam præ popularibus unam  
Mille suis locuples Salmonis filius ambit,  
Quam facit Hebraidem non sanguis, at incluta virtus.  
Sicut adoptivam viridaria pinguis myrtum

Accipiunt, à littoreis quæ transit arenis  
 Divitis in domini fragrantès floribus hortos;  
 Aut velut areolis infertur rasile buxum,  
 Quod super inculti stetit ante cacumina montis.  
 Sic merito tu nostra tuo censebere civis.  
 Non animi dotes, sed nec tibi corporis absunt;  
 Forma bona est; tamen haud sequitur lascivia formam.  
 Testis Ephrata tuum deprædicat usque pudorem,  
 Et sublime vehit niveos ad sydera mores.  
 Quæ tua sit, qualisque modestia vidimus ipsæ;  
 Dum legeres spicas alieno nuper in arvo  
 Pauca loquens, oculos in humum dejecta nitentes.  
 Forte superveniens Herus ut te vidit, amavit,  
 Et tecum tedas optavit inire jugales.  
 Ergo tui fient agri, tua rura, legebas  
 In quibus exiles nobiscum pauper aristas?  
 Scilicet Isacidum Deus hæc tibi commoda fecit.  
 Bose novas incide faces, suspende corollas  
 Postibus: ecce Deo tibi ducitur auspice conjux.  
 Talis ab extremo veniens Euphrate Rebecca  
 Isacios fausto tetigit pede sponsa penates.  
 Sic Lia, sic formosa Liæ germana, Jacobi  
 Fundavere domum numerosa prole. nec illis  
 Inferior, dabit hæc hilari matrona marito  
 Pignora pulchra; suam referent si pignora matrem;  
 Lanificas age linque colos, & pensa, Noëmi,  
 Jam nova proveniet tibi cura senilibus annis.  
 Disce manu cunas rosei versare nepotis.  
 Namque nepos decimo nascetur mense; receptus  
 Qui genibus dilata diu tibi gaudia portet  
 Incipiens aviam molli cognoscere risu.  
 Ipsa crepundiolis dulcem mulcebis alumnus  
 Donec in optatos componat lumina somnos.  
 Talia solemni canerent dum more puellæ;  
 Vestibuli patuere fores, introque receptæ  
 Festivas thalamum circa duxere choreas.



## SOMNIVM IDYLLION.

## A R G V M E N T V M.

*DVM PASCERET GREGEM VNA*  
*cum fratribus suis Joseph adhuc puer, plus ceteris*  
*à patre dilectus; visum sibi somnium candide, &*  
*simpliciter retulit. Quæ causa majoris odij semi-*  
*narium fuit apud fratres invidios. Hæc Ecloga,*  
*Theocriteo est, & tenui charactere.*

## Ruben.

**M** Ane novo, nobis novus hic quoq; sit labor agnas  
 Impressis signare notis; & inurere tonso  
 Nomina nostra gregi. Parvus mihi discat Joseph  
 Depulsos à lacte recens, inscribere foetus.

## Dan.

Huic inanda; si quid curatum naviter optas.  
 Cernis ut in musco jaceat, securus ovilis?  
 Vespere qualis erit, si nunc est manè remissus?

## Joseph.

Parcius ista tuo, frater, tamen obijce fratri.  
 Ah nescis quàm me vehemens modò cura fatiget!  
 Dic, quæso, nunquamne tibi dant somnia curam?

Dan.

## Dan.

Ne mihi dent, caveo. Tu desidiosus in umbra  
Somnia vana foves. Ego sedulus otia vito.

## Ioseph.

Non ego (quod reris) sequor otia: sed mihi præsens  
Hæret adhuc, semperque oculis incurrit imago  
Quæ fuit in somnis spectata. Quis obtulit illam,  
An sopor, an certè Superi? dum singula narro,  
Vos animis (res est non parva) reponite vestris,  
Pene sub Auroram, dubiæque crepuscula noctis,  
Quando magis pingues astringunt lumina somni;  
Nos ego bislenos vidi per somnia, fratres  
Triticæ curvam segeti supponere falcem.  
Omnibus abjectæ tunicæ: par omnibus ardor  
(Tanquam susceptum nobis mercede diurna  
Essêt opus) ferro densos prosternere culmos.  
Campus erat, plenoque sæges lætissima campo,  
Ut meminissè juvat? quis erat mihi ludus, acervos  
Stringere demessi per lata novalia farris?  
Sed nova subjecit res prodigiosa stuporem.  
Namque meus reliquos inter consurgere merges  
Visus, & huic cultum vestri deferre manipuli  
Humano velut ingenio. Sic corpore proni  
Numen adoramus sacram reverenter ad Aram:  
Indole regali merges meus ire sub auras  
Gaudebat, cæloque caput sublime ferebat,  
Cum mea deficiens abruptit gaudia somnus,  
Hæc fugitiva nimis, volucrique simillima fumo.  
Tu, Deus, hæc auspex insomnia porro secunda.

Dan.


Anne erit, in fratres, puer ignavissime, regnum  
 Ut teneas? ut vile pedum diademate mutes?  
 Hoccine fallacis spondent mendacia somni?  
 His adhibes, malefane, fidem? Quid visâ juvabunt;  
 Aurea si quando miser inter somnia fias?  
 En quò te pepulit patris indulgentia! fecit  
 Hos animos toga versicolor, croceique cothurni.  
 Hinc tibi regnandi venit(perverse) cupido.

Ioseph.

Quisquis ero; fortuna tibi mea serviet omnis.  
 Nunc, olim, quodcunque dabunt hæc somnia fausti;  
 Id fieri commune mihi cum fratribus opto.

Dan.

Ista tuæ potius die vespere somnia matri,  
 Fabellis somnum capret si forte morantem.







# THIRANTHROPIA IDYLLION.

## ARGUMENTVM.

*VIDENS DANIEL PROPHETA INTER boves Nabuchodonosorem communes cum ijs herbas pascentem; hoc Pastorali carmine ejus deflet infortunium, spondetq; deinceps meliora.*

**R**Vra meis semper placeant ante omnia Musis;  
Semper amem sylvas; & amarunt has quoq; Reges,  
Regius & sanguis Daniel ô qui modò lucis  
Inferat Assyrijs! ô qui me sistat ad annem  
Præcipiti Chaldæa secut qui pascua cursu!  
Eufus ubi in molli Daniel ad flumina musco,  
Armentum cùm fortè inter regale videret  
Armenti dominum pasci communibus herbis;  
Hos dedit ex imo suspirans pectore questus.

In bovis indignam visum transisse figuram  
Luxerunt dominum Babylonides inde puellæ,  
Hinc Juvenum chorus. Ecquis enim non flevit acerba  
Fata vicesque tuas infœlicissime rerum?  
Te veteres etiam palmæ (torrentibus undis  
Quas rigat Euphrates) etiam flere myricæ;  
Nubiferi vertex etiam te flevit Imâi,  
Te rigidæ Tauri silices, te Caspia claustra:  
Cum falsis primùm impleres mugitibus agros  
Infœlix! cum cervici juga dura timeres.  
Quis te mutavit tantus Deus? ullane ludos  
Fortunæ similes patrum vetus audijt ætas?


Hoc tamen antè malum meminì prædicere misſa  
Somnia de cælo, niſi mens tibi cæca fuiſſet.  
Hinc adedò generis magnorum obliuſ avorum  
More feræ, ſolis quadrupes in montibus erras,  
Et gemina in lavi ſingis tibi cornua fronte.  
Heu miſerande Nini pronepos! non ampliùs oſtrum,  
Texta Semirania nec acu variata, cubile  
Jam tibi conſternunt: ſed ſub Jove degis aperto,  
Membra ſuper nudis ſed proijcis hiſpida ſaxis  
Quo te cumque loco nox interceperit atra.  
Ah veſpertinus ne te lupus, ah leo ne te  
Excipiat (ſtabulatur enim leo plurimis iſtis  
Saltibus) ah moneo procul ah fuge luſtra ferarum!  
Quin ades huc potiùs. carpes hic plena ſecundùm  
Flumina Luciferi primo cum ſydere gramen,  
Colludit viridi dum ros argenteus herbæ.  
Mox ubi quarta ſitim collegerit hora diei,  
Ad gelidos ego te latices, ad pocula ducam:  
Inde ſub ilicibus nigris in valle reducta  
Floribus eſultus frigus captabis opacum.  
Ipſe tibi intereà meditabor arundine carmen,  
Si quà forte tuum valeam mulcere furorem.  
Ah Daniel Daniel ſurdo canis! in nemus ille  
Emicat, abrumpens medio tua verba boatu.  
Mene fugis? per ego & ſalebras, & conſraga ſylvæ  
Te ſequar, & caro capiti comes uſque manebo.  
Stat mihi velle pati tecum. non antè ſoporem  
His oculis tribuam, priùs aut jejunia ſolvam;  
Quàm Deus (humanis ſolitus miſceſcere pœnis)  
Pro pietate mea poſthac tibi fiat amicus.  
Audior? an qui amant fingunt ſibi proſpera? certè  
Audior. en dextram Deus en mihi perſonat aurem,  
En monet, in melius mutata forte locandum  
Te veteri ruſſus ſolio: ſeptennia poſtquam  
Integra tranſierint, poſtquam pernôis in ipſos  
Eſſe Deum, qui jus exerceat acre, Tyrannos.

Signa quid observas Chaldæe? quid aspicias ortus  
Astrorum? nihil ista dabunt (quæ consulis) astra  
Scire futurorum; sibi quæ Deus abdita servat.  
Et mihi fatorum (cùm vult) tabularia pandit.  
Hinc (pueri) vobis oracula fausta reporto.  
Ergo aiacres sylvas pridem desueta voluptas  
Jam teneat, sylvæ domino gaudere recepto.  
Mens illi redit, & majestas pristina vultus.  
De bove nil superest, sed adhuc tamen edere, prima  
Verba timet, ne mugitus pro voce sequatur.

Plura locuturum properavit cingere Vatem  
Ilicis agresti pastorum turba corona,  
Et rigidam jussit violis mollescere quercum.



VVLPES



## VVLVES IDYLLION.

ARGUMENTVM.

*DVO VINDEMIATORES NA.* both & Zebul in suburbano Ierusalemis agro, de capiendis & extinguendis Vulpibus quæ Vineam demoliebantur, incunt consilium. Per Vineam, Ecclesia Christi; per Vulpem, Heresis representatur.

**Zebu.**

**T**u simili mentitus aves, Nabothæ, fufirro  
Credula fufpendis vifcatis agmina ramis:  
Sector ego canibus vitæ vellugia Vulpis.

Naboth.

Zebote, ter denas hoc cepi mane volucres  
Quæ rapuere meis mites ætibus uvas.  
Aucupium tabula nunc digero: primus opimis  
Enitet alitibus, stat macris ultimus ordo,  
Ut minùs offendant macies subjuncta saginæ.  
Ista seni referam sub cœnam munera nostro.

Zebul.

Damna tuis tulit ficedula fortè racemis;  
Sed longè graviora meæ Vulpecula viti.

Frigora non tantùm, matutinæque pruinae  
 Palmitibus, quantum dentis nocet illa veneno.  
 Heic ubi provenit talis mihi sæpius uva,  
 Qualis ad Hebronis natale gigantibus arum  
 Exploratori fuit olim visa Calebo;  
 Nunc lego corrosò turpem de palmite botrum.

### Naboth.

Et mihi non unâ nocuit Vulpecula fraude:  
 Nûi prohibent sèpes pictis quin irruat uvis.  
 Quam bene præda tibi cadet! at quibus opprimis illam  
 Artibus, heic inter filices mihi, Zebolè, narra.  
 Interea maculis ego texam retia raris,  
 Quæ vespertinam fluitent nebulosà sub horam  
 Tuidorum celes interceptura volatus.

### Zebul.

Cui non calliditas est cognita Vulpis; hirundo  
 Non fugit instantem vigilantius advena brumam;  
 Quam versuta sibi sanctos Vulpecula casses.  
 Si quando tamen in laqueos incautior illa  
 Incidit, & duplici sentit se fune teneri;  
 Tunc meminit captiva sui; pedicasque refringens  
 Dentibus, implicitos absolvit nexibus artus.  
 Unde dolis hanc credo feram vix posse prehendi.

### Naboth.

At, Vulpinandum Vulpes adversus, & arte  
 Audieram varia fallendam sæpius artem.

Zebul.

## Zebul.

Audieras; vulgoque ferunt: & me quoque Nasson  
 (Nasson Idumæi conterminus accola saltus)  
 Ungere lina fimo docuit; ne finis odorem  
 Callida percipiat pecus, & declinet ab ipsis  
 Decipulis. Ego non aliter Samsona putarim  
 Rure Palæstino Vulpes cepisse trecentas.  
 Has alius pernæ tractas nidore suillæ  
 Post dumeta latens inopino conficit arcu.  
 Est qui præcipientes scrobibus det cespite testis.  
 Mille alias usus venandi repperit artes.  
 Sed mihi non æquè placet Ars, ut odora canum vis  
 Per juga dum versat trepidam Gabaonia Vulpem.

## Naboth.

Non huic ulla, reor, venatio Zebole præstat:  
 Sed multâ catuli curâ sunt antè docendi  
 Vestigare feram, fortiq̃ue lacellere mortu.

## Zebul.

Est quoddam canis acie genus; ut corpore parvum  
 Sic animis ingens, & robore: subniger illi  
 Est color, os simum, pendens prolixitis auris;  
 Hirsutis duo sub cilijs cava lumina, dentes  
 Conferti rabidique, brevis pes, longior unguis:  
 Indole tam docili; per agros ut sponte feratur  
 Deprendat profugæ si quæ vestigia vulpis.  
 Mille per anfractus dextrâ, levaq̃ue vagatur,  
 It, redit, explorat prono loca singula naso;  
 Inque cavi penetrat perfossa cubilia montis,  
 Fæta quibus sese latebris amat abdere Vulpes.




Heic simul ac illi notas odor attulit auras,  
 Lætitiâ fremit; & saltu se librat in hostem  
 Par jaculo; cæcasque domos latratibus implet.  
 Turba canum respondet: abit baubatus ad astra.  
 Non ita me blandis mulcet philomela querelis  
 Ut juvat hic, Nabothe, canum gannitus; acutos  
 Ipsâ sonos reddit nemorum vocalis imago,  
 Sylvaque venantium reboat clamoribus omnis,  
 I Theion, i Carilax, i Celanor; Euge Melampe  
 Nostra fera est, jam nostra fera est. Jam capta tenetur.  
 Omnis Jo capta gaude vicinia prædâ.  
 Tu venatori, de more, colona reponc  
 Ova. Tuæ perijt pestis Vulpecula cortis.


## Naboth.

Quas ego pro tali reddam tibi carmine grates,  
 Aut quæ dona feram? geminos, en sume, canistros  
 Zebule, collectam condas ubi molliter uvam.

## Epilogus.

Vulpis adumbratam sub imagine lusinus ista  
 Hæresin; extremum bello dum Cæsar ad Albim  
 Fulminat, hanc certus terris exscindere pestem,  
 Forsitan assurgent olim graviore cothurno,  
 Et mea Cæsareas æquabunt carmina lauros.





## NILVS IDYLLION.

## A R G V M E N T V M.

*THERMUTIS FILIA PHARAEONIS*

*ad Nili crepidinem ludibunda cum puellis suis deambulans, inuentum flumini piscellam junceam ripa adnotam excipit, aperit; in ea expositum (cruideli Regis editto) puellum Hebraum reperit, miserata tolli iubet, Mosem vocat.*

**S** At virides lusi tecum, mea fistula, sylvas:  
 Flumina nunc cantare libet, praeconia Nilo  
 Carmine sunt facienda. Neget quis carmina Nilo,  
 Qui calamos Musis, qui donat habere papyrus?  
 Laudabunt alij, sua quod cunabula caelo  
 Debeat ignotis veniens hic fontibus amnis;  
 Quod Meroen Blemyasque riget; Lybicosque novales  
 Findat, & Aegyptum nigra fecundet arena:  
 Plus ego me Nilo fateor debere; quod olim  
 Extulerit placido servatum gurgite Mosem.  
 Inclyta servato dicamus flumina Mosē.

Tertia jam solidæ fuerat pars acta dici,  
 Et Sol majores declivis fecerat umbras;  
 Cum thalamo digressa suo Thermutis ad oram  
 Se fluvij lotura tulit. Latus ilicet illi  
 Bis septem cinxere pares ætate puellæ.  
 Quales è pastu nivei referuntur olores  
 Ad vitreas Jordanis aquas, & longa canoros  
 Dant per colla modos. Latè sacer assonat amnis.

Pompa puellarum Thermutim talis obibat.  
 Ipsa chori princeps spatiata crepidine ripæ  
 Præterlabentis nullo propè murmure Nili  
 Despectat pigro dubios in flumine cursus.  
 Dumque videt pictos ultrò, citroque phaselos  
 Occursare sibi, quisnam fluat amne secundo  
 Ambigit, adversis aut quisnam naviget undis.  
 Lumina sic fallit tacitarum lapsus aquarum,  
 Credat legitimos ut segnibus ire meatus.  
 Huc, illuc oculos Nymphæ per cuncta ferenti,  
 Fluminis in medio fuscilla apparuit alveo  
 Mobilibus scirpis, & levi texta papyro:  
 Hanc jubet ad ripam missos advertere nautas.  
 Jussa citi faciunt. Studio Regina videndi  
 Ocyus oblatam resupinis excipit ulnis;  
 Neve manus niveas inducta bitumine sædet  
 Arca, cavent famulæ substratis molliter herbis,  
 Sic oneri timidæ subeunt: audacior una  
 Vincla picata secant digitis, cistamque recludit.  
 Ecce latens sese vagitu prodidit infans,  
 Aeneolo talos à vertice pulcher ad imos.  
 Qualis Amor pingi tabula solet. Utraque mala  
 Suave rubet, guttis aspersa recenter ab amne.  
 Stare cacuminibus florum sic mane pruinas  
 Aspicimus, teretesque rosis colludere gemmas.  
 Detergit pueri Thermutis ab ore madorem.  
 Quod potuit, dulci movet ille labellula risu,  
 (Officium sensisse putes) & tendit eburnos  
 Simplex blanditijs in regia colla lacertos,  
 Utque suam nictans invitat ad oscula matrem.  
 Mota (volente Deo) Nympha est, mentemque benignam  
 Accipit in puerum, lacrymisque ita fatur obortis.  
 Heu puer infelix ipso moriturus in ortu!  
 Vivere dignus eras, nisi lex tibi dura noceret.  
 Sed mihi cur nimium lex in te dura videtur?  
 Est quoque dura nimis. Pereas, vivaſine, quid ad me?  
I
Vive

Vive tamen. Sancti cui fluminis unda pepercit,  
 C ego non parcam? Quid? sicine iussa parentis  
 Despicies (Thermuti) reus servetur ut infans?  
 Somnia nempe patrem terrent; at somnia nullum  
 Pondus habent. Potior mihi sit sententia Nili  
 Qui puerum noxa miserans absolvit ab omni,  
 Et sibi depositum nostras porrexit in ulnas.  
 Num dabo præcipitem rursus fluvialibus undis,  
 Obijciamve feris crocodili dentibus escam?  
 Di meliora! Deæ sed dicitur Iſidis unus  
 Nescio quis mystes prædicere, magna Canopi  
 Rebus ab Hebræo portendi damna puello.  
 Scilicet in nigrum puer hic quandoque cruorem  
 Carminibus vertet septemplex ostia Nili?  
 Scilicet extinguet tremulos in flumine pisces,  
 Et dabit immundo ranas pro piscibus amni?  
 Hasne Pharos, tellusque timet Mareotica cunas?  
 Quin (quod ego potius reor) hæc infantis in ore  
 Indolis eximix species, hæc gratia vultus,  
 Sæcla Parætonijs promittunt aurea regnis.  
 Nam mihi nec casus, fortuna nec obtulit illum;  
 Consilio res gesta Dei est. Stat tollere nobis.

Audijs ut Marie (nam post carecta latebat)  
 Méne jubes, inquit, nutricem sistere? curre,  
 Ocyus hanc adduc (regina subintulit) ambas  
 Præmia digna manent. At tu, formosule, posthac  
 Noster eris; & aquis subducte vocabere Mósés.





## IOB IDYLLION.

PHILIPPO BARONI DE  
Gomicourt, Gubernatori Bethuniensi,  
consobrino meo salutem.


## A R G V M E N T V M.

*HIIS EGO PATIENTISSIMI VIRO-  
rum carminibus solatus sum luctum tibi, mihiq;  
communem; quem mors nupera Robecani Princi-  
pis Germani mei utriq; attulerat. Lege, si placet,  
& fave.*

**N**ulla, Philippe, meo medicina reperta dolori  
Aptior, Huius quam vatis nobile carmen:  
Non alios pretiosus onix certaverit illi,  
Non Jerichuntinis stillantia balsama Virgis.  
Divini nam mella fluunt pastoris ab ore  
Dum canit hæc tristes pellunt quæ carmina curas.  
Quis, pueri, vos hujus amor, quæ tanta cupido  
Lucis habet? ritu fugit illa volatilis umbræ;  
Aut velut in pratis primo flos ortus Eo  
Ante cadit, surgat quam roscidus æthere Vesper.  
Usque adeone placet brevis hæc usura diei?  
Pluris abortivum duco, non ille malorum  
(Vita quibus scatet infelix) examina vidit.  
Væ mihi, cur hausi vitales luminis auras?  
Cur genibus sum susceptus? cur ubera suxi?  
Nonne mori satius fuerat? nunc altus haberet

Me sopor, æternâ tegerer nunc lumina nocte.  
 Heu quot in ærumnas fervor! qui nuper habebat.  
 Inter Idumæos fortunatissimus omnes,  
 Dives opum, pecorisque, fimo nunc æger inopsque  
 Incubo! non mecum veteres mansere sodales  
 Fortunâ mutante fidem. non uxor adhæsit  
 Ipsa, meos aliquâ saltem miserata dolores.  
 Undique destituor. Spes tu mihi rebus in artibus  
 Sola super, quem das finem (Deus alme) laborum?  
 Non ita calcatis fessius vindemitor uvis,  
 Non sic impatiens aspirat ad otia mellior;  
 Ut pigros queror ire dies & tempora, donec  
 Me tuus immiti furor increpat usque flagello.  
 Quando erit optatâ fruar ut post fata quiete,  
 Membraque non ulli posthac obnoxia morbo  
 Induar? illa manet cineres spes una sepultos.  
 Quis det ut in tilix molli mea carmina libro,  
 Aut ut Ophiræo potius scribantur in ære?  
 I puer; hæc cedri tabulis oracula manda.

Credo quod è cælo mihi sit natalis origo,  
 In cælum reditura; simul dabit ænea signum  
 Buccina, supremusque dies illuxerit Orbi;  
 Tunc ego de tumuli redivivus pulvere surgam,  
 Obducetque meos pellis (velut ante) lacertos.  
 Accipiter veterem renovat quo more senectam  
 Exuvijsque novus positus plumescit, & alas  
 Exploraturus madidos se librat ad Austros.  
 Ipse Deum clarâ præsens in luce videbo  
 His oculis. Sedet hæc altè fiducia menti.  
 Hac ego spe gelidam didici contemnere mortem;







# DAVID GIGANTICIDA IDYLLION.

## ARGUMENTVM.

### CÆSO GOLIATH, OBVIAM

*prodeuntes Sauli, & Davidi victorihinc*

*Nuptæ Mulieres, inde Virgines Hebrææ,*

*canunt Epinicium.*

Flavius Iosephus hoc  
Epinicium  
alternis cātatum fuisse  
tradit; ut  
nuptæ mulieres præcinerent,  
succinerent  
Virgines.

## Virgines.

**P** Ompa venit: pompæ matrum chorus obuius exit.  
Tympana jam manibus, jam sistrâ loquacia sumunt;  
Jam canere incipient, & respondere paratæ  
Nos sumus; alternis tamen hæc vult laurea dici.

## Nuptæ.

Hunc punum sine nube diem, Sol alme, reducis  
Isacidis: Sudi connivent cærula cæli.  
Scilicet aridet nitor ætheris ille Sauli  
Dum remeat patrias palmis insignis ad arces.  
Nos decet insignem palmis celebrare Saulem.  
Mille Saul, patriæ Servator, sustulit hostes.

## Virgines.

Hoc melius viret herba die, pratumque puellis

Sufficit uberius violas in ferta, crocumque.  
 Parthenicemque: legi florum cupit obvia messis,  
 Nempe suo properant Davidi rura coronam;  
 Huic quoque Victori nos carmina læta canamus.  
 Mille Saul, decies sed David mille peremit.

### Nuptæ.

Testis Azecana terebinthus consta valle  
 Quantus in arma Saul rueret, quo turbine tela  
 Nuper in Allophylos curru torqueret ab alto;  
 Puniceis galeam cristis indutus, & auro  
 Loricam, auratis & fulgida cingula bullis.  
 Mille Saul, patriæ Servator, sustulit hostes.

### Virgines.

Testis Azecanis Torrens qui vallibus errat,  
 Flavus ut hinc David collectos quinque lapillos  
 Miserit in peram. Moturus bella giganti  
 Esse satis fundam sibi duxit. Ab æthere tanta  
 Nimirum puero fiducia venit inermi.  
 Mille Saul, decies sed David mille peremit.

### Nuptæ.

Quot peditum cuneos, equitum quot miserat alas  
 Gaza potens: in nos Chananitis denique tota  
 Contulerat junctas injusto fœdere vires.  
 Has tamen (ut mellor flavescentes sternit aristas)  
 Diruit ens Saul, sparfitque volucris escam.  
 Mille Saul, patriæ Servator, sustulit hostes.

## Virgines.


Quid, quòd ab Enachia Titanum stirpe profectus  
 Par Libano Goliath monti, Dux agmen agebat,  
 Ipse Palæstinis unus magni agminis instar?  
 Hunc (velut aëriam resupinat turbo cupressum)  
 Exanimem media David porrexit arena.  
 Mille Saül, decies sed David mille peremit.

## Nuptæ.

Arboribus gestanda Saül suffixit opima  
 De victis spolia Allophylis. Sublimia ramos  
 Æsculeos curvant ingenti mole trophæa:  
 Tota Palæstinis Ephronia sylvæ superbit  
 Exuvijs, Macedæque nemus Victoria vestit.  
 Mille Saül, patriæ Servator, sustulit hostes.

## Virgines.

Postibus arma sacris David suspendit, & enssem  
 Votivum Goliat veteres Silonis ad Aras.  
 Nos ibi grata Deo bisquinis carmina chordis,  
 Voce vel argutâ, quovis cantabimus anno,  
 Usque tui memores, David formosæ, triumphî.  
 Mille Saul, decies sed David mille peremit.



FAMIANO STRADÆ  
SOC. JESU SACERDOTI  
SVLAMITHIS IDYLLION.  
ARGVMENTVM.


ECCLESIA (NOMINE SVLAMITHI-  
*dis rusticana puella designata*) *Christum Dei filium*  
*assumptâ jam carne fratrem suum compellat.*

*Ex cap. 8. Cant. Cant.*

**I** Ste labos Hebræa manet te Musa supremus.  
Pauca velim properes Famiano carmina Stradæ,  
Dum tibi tantisper se commodat. En age dulci  
Dic calamo, fratrem Sulamithis ut arserit olim;  
Ut nemus his errans impleverit omne querelis.

Qui procul aspectu montes, quæ pascua nostro  
Te germane, tenent? qua te regione requiram?  
En cæli medio nunc Sol altissimus arva  
Pulverulenta coquit: tua dum vestigia lustrò.  
En captant nunc frigus oves, oviumque magistri  
Turba molesta rogant. Quò te Sulamithi per æstum,  
Quò Sulamithi pedes? quis te malis abripit error?  
Turba molesta sile. Fateor mihi frater amatur.  
Nam cur dissimulem? non est Amor iste pudori,  
Inficianda mihi non est ea cura. sororem  
Ecquis enim culpet fratri quòd in oscula curret?  
Luce palam te frater, amem. coramque severa  
Matre sit amplexu mihi fas te stringere casto.  
Huc ades, in thalamum volo te deducere Matris,  
Ipsi te postes, ipsum te limen, & ambæ  
Sponte sua moto suspirant cardine valvæ.  
Tota tuo domus adventu ridebit, & ultro  
Candida cum violis redeunti lilia fundet;  
Mixtaque substernet molli colocasia junco.  
Ipsa ego cana feram tenui lanugine, nuper

Sepibus in nostris quæ poma Cydonia legi:  
Præterea tibi bina dabo diversa sapore  
Pocula; nectarcis arbor hoc Punica granis  
Condiit, Engaddi vindemia miscuit illud.  
Nullus adhuc admovit ijs labra: sed tibi serbo.  
Tu, dilecte rudem rerum me multa docebis  
Frater, ut hæc discam, quid non faciamve, feramve?  
Cura tibi tantum sim mutua: pectore tantum  
Usque tuo maneat defixa sororis imago,  
Annulus ut digito (nostri tibi pignus) inhæret,  
Utve tuis apprima tenax armilla lacertis.  
„ Res Amor est æterna: dies nec longa, nec illum  
Vincere mors poterit; quamvis mors omnia vincat.  
Sed nec aquis aboletur Amor. turbata procellis,  
Cæca nocte natat tutus freta: quem super hostis  
Ipse tonat polus, & nimbis stridentibus urget.  
Non tamen id mersare caput queat omnibus undis  
Oceanus, non Oceano violentior æther  
In medium sædis descendens imbris æquor.  
Excubet in Scythicis puer hic si fortè pruinis;  
Absimet rabido Scythicas ardore pruinas;  
Intactasque nives Soli, potiore resolvat  
Igne; mihi sensim fibras qui gliscit ad imas.  
Sancte puer! tota me lampade fortius ure.  
Fratre calere juvat. Quid enim formosius illo?  
Dulce tepor vernus violis, flaventibus Æstas  
Messibus, Autumnus botris, mihi Fratris amores.  
Mille (nec invideo) Thamar è præsepibus agnos  
Ducat & innumeras in pascua manè capellas:  
Lac æstate recens, & frigore suppetat illi:  
Ut volet Assyrio tingat sua vellera fūco,  
Cogat opes, nullumque modum sibi ponat habendi.  
Semper ego te frater amem. Nil cætera curo.  
Hæc properasse meo munuscula rustica Stradæ  
Musa sat est. Ea Strada precor non improbet: illi  
Sic ferat æternam Farnesias edita famam,



## I S A I Æ.

Cap. 42.

(a) Vetus  
apud He-  
braos pro-  
verbium e-  
rat, quo per  
Cedarenum  
significa-  
bant quem-  
vis Barba-  
rum. Allu-  
dit ad illud  
toto passim  
hoc Poëma  
te profun-  
dus noster  
Propheta.

**C**antate Domino canticum no-  
vum.

*Laus ejus ab extremis terra, qui descen-  
dit in mare, & plenitudo ejus.*

*Insula & habitatores earum.*



## CEDAR IDYLLION.

## ARGUMENTVM.

## HOC IDYLLIO ISAIAS PROPHETA,

*miram apud Barbaros morum conversionem (postquam Evangelij luce perfusi fuerint) sub Cedareni pastoris jam cicuris facti tropo luculenter adumbrat.*

**I**Ntermitte graves tantisper, Musa, cothurnos;  
 Non omnes gaudent gravibus, mihi crede, cothurnis.  
 Quin levioꛑe sono potiùs vulgaris avenæ  
 Cedaris intonsas liceat mihi dicere sylvas.  
 Si canimus sylvas, sylvæ sunt Numine plenæ  
 Quas canimus. Deus omne nemus mihi Cedaris implet.  
 Dic age deductos illi mea tibia versus;  
 Nam tenui calamo non injucundiùs audit,  
 Quàm grandi commissa tubæ sua facta referri,  
 Sequæ Dei nostro Majestas temperat ori.  
 Fontis in angusto veluti cratere videmus  
 Tres cæli spatium pandi non amplius ulnas.  
 Forsan & hæc latè totum quandoq; per Orbem  
 Qualiacumq; meæ spargentur sibila cannæ.  
 Audiet & si quæ procul his est insula terris,  
 Quæ facimus Superis bifori præconia buxo.  
 Ecquis jo sylvæ vos cultus amœnior ornat  
 Cedarides? solito vultus cur lætior hic est?  
 Nempe Dei vestros hilarat præsentia saltus,  
 Ingeniumq; loci cicurat sylvestris, heriles

(a) Video  
hujusmodi  
verborum  
transpositio-  
nem Lucre-  
tio, & Vigi-  
lio placuisse.

(b) Vallis  
Achor eadē  
quæ Engad-  
di.

(c) Diversi  
ab Afris hi  
Nomades  
Arabes.

(d) Cedare-  
norum fero-  
ciam notat  
Rex David  
Psalm. 119.

(Habitavi  
cum habi-  
tantibus Ce-  
dar, cum his  
qui oderunt  
pacem.)

(e) Vox Ce-  
dar, Hebrai-  
cè nigrorem  
significat,  
quæ signifi-  
catio ad mo-  
res transfer-  
tur, vulgò  
notum est

hominem nigrum, hominem infidum dici, contrà hominem  
candidum vocari eum qui verax & ingenuus est.

Adeò omnium ætatum & gentium consensu, summa sem-  
per fuit coloris nigri infamia, ut contrà candori summus  
favor.

(f) Propheta alloquitur hic Sydonios augurijs addictos.

*Sublevetur desertum, & civitates ejus.*

*In domibus habitabit Cedar.*

Quà fert cumque gradus, cassiam calcata crocumque  
 Fundit humus. Legere est ipsis (a) ex thura myricis.  
 Ipsæ jam filices nardi mutantur arista,  
 Carduus Assyrio calamo, serpylla rosetis.  
 Denique tophus ubi fuerat scaber hactenus; illuc  
 Jam migrasse putes Nabathæi germina ruris.  
 Quisquis ad hos post hac incerta mapalia saltus  
 Pastor ages; tecum miraberis ipse frequenter  
 Cedaris ante feros tractus, desertaque vasta  
 Numinis adventu veterem posuisse rigorem,  
 Et didicisse novo passim nutescere cultu.  
 Pinguior ut non sit biferæ jam gleba Segoræ;  
 Non (b) Achoritanæ mollissima pascua valles.  
 Hic stabiles tibi fige lares; hic oppida conde  
 Si sapias upilio (nec enim tentoria tanti  
 Sunt tua) dispersos huc undique coge sodales,  
 Et nova conscriptis pomeria civibus imple.  
 Crescere post aliquot tua regna videbis aristas.  
 Ergò domos vagus ille (c) Nomas colet? & colet urbes?  
 Ergò ferox, (d) pridem consuetaque vivere raptò  
 Cedaris (e) atra volet pubes jam civis haberi,  
 Et sinet ignavos famulari legibus arcus?  
 Nunc & ovi lupa facta teget latus, ursaque damæ;  
 Et modò cum vitulis stabulo claudetur eodem,  
 Hospitij conductæ fidem servare læna;  
 Pastor Arabs jaculis quando exarmatus, & arcu  
 Mitis ad urbanæ recipit se munia vitæ.  
 Non struet insidias, nec in antris ulla reductis  
 Damna viatori meditabitur ampliùs. Ite,  
 (f) Ite bonis avibus quicumque per avia tesqua  
 Cedaris ad Rubri properatis littoris oram,  
 Aut veterem petitis Memphim Sidone profecti;  
 Ampliùs infamis non est hæc sylva rapinis.  
 Peticolas Arabes jam Pax habet. omnia rixæ  
 Semina sunt sublata. Manet certamen id unum  
 Quis melius votiva Deo jam carmina dicet.

(a) Cedar  
pars Ara-  
bia Petraz.

(b) (Uni-  
versi Princi-  
pes Cedar,  
cum agnis,  
& arietibus  
& hedis, ve-  
nerunt ad te  
negotiato-  
restui.)

Ezech. cap.  
27. Omne  
pecus Cedar  
congregabi-  
tur tibi Isa.  
cap. 60.

*Laudate habitatores Petra, (a) de ver-  
tice montium clamabunt.*

*Ponent Domino gloriam, & laudem ejus  
in insulis nuntiabunt.*



Undique divinis resonant juga Cedaris hymnis,  
 An Musæ, Nomades etiam fecere poëtas?  
 Non equidem Musæ, Nomades fecere poëtas.  
 Fecit Amor: cælestis Amor sic omnibus afflat;  
 Hic Elegos ut fundat, ut ille libentiùs Odas,  
 Populeis alij mandent Epigrammata truncis,  
 Lanigeras pars inter oves Idyllia pangant,  
 Alternoque vocent sese in certamina cantu.  
 Arbiter huic aliquis ludo victoribus æqua  
 Præmia, gramineas donabit habere coronas,  
 Et fuscas hedera frontes circumdabit alba.

Hæc fuit exili non dedignatus avena  
 Ludere, Musæ, tuus pastoria carmina vates  
 Dum sedet ad tremulam (b) pecorosi Cedaris umbram.  
 Surgamus, nitidos en extulit Hesperus ignes,  
 Et gelidus noctis jam gramina proluit humor.





## ARCVS

Titulus est  
hujus Poë-  
matis (ex  
Marianæ  
nostri sen-  
tentia) ab  
auctore Da-  
vide indi-  
tus, qui præ-  
cepit Cho-  
reniæ Prin-  
cipi Prophe-  
tiæ, ut doce-  
ret A R -

C V M, can-  
tores quos  
Rex institue-  
rat. Idem est  
Princeps  
Prophetiæ,  
quodd Prin-  
ceps cantus.  
prophetare  
enim pro eo  
quod canere  
frequentissi-  
mè in sa-  
era Scriptu-  
ra usurpa-  
tur: nec so-  
lum Prophe-  
tæ vocabulū  
ad Musicos,  
& cantores  
traduci video, verum etiam ad ipsos Poëtas Canticorum ar-  
tifices.

## EX CAP. 2.

## Lib. 2. Regum.

**P** *Lanxit autem David planctum hujus-  
cemodi super Saül & super Jonathan  
filium ejus, præcepitq; ut docerent filios Ju-  
da ARCV M sicut scriptum est in Libro  
justorum.*

*Considera Israël, pro his qui mortui sunt  
super excelsa tua vulnerati.*

*Inclyti Israël super montes tuos interfe-  
cti sunt.*

*Nolite hoc annuntiare in Geth, neq; an-  
nuntietis in compitis Ascalonis, ne forte la-  
tentur filia Philistym, ne exultent filia in-  
circumcisorum.*

*Montes Gelboë, nec ros, nec pluvia ve-  
niant super vos, neq; sint agri primitiarum:*

Quo sensu Apostolus Paulus, Prophetæ vocabulum pro  
Poëta usurpavit, sic ad Titum scribens de Epimenide Poëta  
Creteasi. (Dixit quidam ex illis proprius ipsorum Prophetæ.)





## ARCUS IDYLLION.

## A R G V M E N T V M.

DAVIDIS CANTORES SAVLE ET  
*Jonatha interemptis, hoc Epicedium Amœbao car-*  
*mine cecinerunt.*

## Pueri.

Nuntius è castris nostras pervenit ad aures.  
 Nuntius Hebræis quantum fert iste dolorem?  
 Quot properat lacrymas? Gelboæ in montibus ergo  
 Heroës duo Beniamidæ, duo fulmina belli,  
 Oppetere necem? flos Israël's acerbo  
 Ergo jacet fato? Prò lux feralis & atra!  
 Siccine Beniamidæ cecidere Heroës inulti?

## Puellæ.

Nuntius illa tuas qui funera vulgat ad aures,  
 Ne terat hæc etiam Tyrijs, Hebræe, caveto.  
 Nesciat ó Sydon, ó nesciat Ascalus istud!  
 Ne Chananæa tuis insultent oppida damnis.  
 Neve Palæstinæ sibi plaudant fortè puellæ,  
 Et salibus te profendant petulanter amaris.  
 Siccine Beniamidæ cecidere Heroës inulti?

## Pueri.

Gelboë montes (tantæ loca conscia cladis)

*Quia ibi abjectus est clypeus fortium:  
clypeus Saül, quasi non esset unctus oleo.*

*A sanguine interfectorum, ab adipe for-  
tium sagitta Jonathæ nunquam rediit re-  
trorsum.*

*Et gladius Saül, non est reversus ina-  
nis.*

*Saül & Jonathas, amabiles; & decori  
in vita sua;*

Exosi montes! non ros, non ampliùs imber;  
 Vos riget. æternùm steriles nec farræ feratis,  
 Nec nova vina Deo quæ prælibentur ad Adam:  
 Armarum postquam ruit omnis gloria vestris  
 Strata jugis; postquam Jonathæ, cæsiqûe Saulis  
 Deturbata solo vidistis scuta; pudendum  
 Heu Israël misero de Rege trophæum!  
 O quantum Gabaa, ô quantum tu Patria perdis  
 Præsidium raptò Jonathæ florentibus annis?  
 Robur enim Jonathæ stupuerunt claraqûe facta,  
 Sæpe Palestinæ natotum in funere matres,  
 Missilis illius quos conficiebat arundo  
 Ictibus haud unquam vanis. non certior illâ  
 Ulla sagitta fuit, nec quæ magis audiit arcum.  
 Haud minor amissi tamen est jactura Saulis;  
 Cujus in Allophylos districtus sæpius ensis  
 Vagina recipi nunquam sine cæde solebat.  
 Siccine Beniamidæ cecidere Heroës inulti?

### Puellæ.

Carmeli montes pingui lætentur oliva:  
 Halet aromatibus Libanus, mirtoqûe virenti:  
 Fumella rigeant Gelboa cacumina taxo.  
 Namqûe sepñitus ibi perijt Decor omnis, & unâ  
 Omnis Amabilitas Jonathæ commortua dulci.  
 Non illi quisquam forma se contulit oris:  
 Seu puer intexto Tyriam demitteret auro  
 Ex humeris chlamydem, chlamys ostro tincta decebat  
 Candentes humeros: seu factus adultior arma  
 Indueret; sumptis horrebat molliter armis:  
 Et solo genitore minor, Dux agmen agebat  
 Sic alios superans, genitor superabat ut ipsum.  
 Quippe velut surgit procero stipite laurus,  
 Lentave se tollunt inter viburnâ cupressi;  
 Sic decies in mille viris stetit arduus; omnes

*In morte quoq; non sunt divisi.*

(a) Quod  
Virgines  
clausæ etiã  
in publico  
luctu egre-  
derentur si-  
cut in Tri-  
umphis lu-  
culentum  
habes exem-  
plū in Prin-  
cipum Assa-  
moneorum  
Historia.  
(Sed & Vir-  
gines quæ  
conclusæ  
erant pro-  
currebant  
ad Oniam.)  
cap. 3. lib.  
2. Machab.

*Aquilis velociores, Leonibus fortiores.*

*Filia Israël super Saül flete, qui vestie-  
bat vos coccino in delitijs, qui præbebat or-  
namenta aurea cultui vestro.*

*Quomodo ceciderunt fortes in prælio?  
Doleo super te frater mi Jonatha, deco-  
re nimis & amabilis super amorem mulie-  
rum.*

Excessitque Saül super-extans vertice toto.  
 Ambo formosi, pollentes viribus ambo,  
 Coniunctique animis, quos nec Mors ipsa diremit.  
 Siccine Beniamidæ cecidere Heroës inulti?

### Pueri.

Hebræi lugete Duces, lugete Tribuni,  
 Ipse etiam miles loricas exuat, arcum  
 Frangat, & æria pharetram suspendat ab ulmo  
 Infelix miles! Quid enim sperabit adempto  
 Rege? Saül posthac non illum in prælia ducet,  
 Non Jonathas. nec erit magnum præstare Saulem  
 Qui queat, aut Jonatham, Leo non æquaverit illos;  
 Non Aquila ad prædam celeri cùm provolat ala  
 E specula pullis rimata voracibus escam.  
 Siccine Beniamidæ cecidere Heroës inulti?

### Puellæ.


Hebraides lugete nurus, (a) lugete puellæ  
 Innuptæ; paullum thalamos mihi Virgo relinque,  
 Arcanos thalamos; squallensque in compita prodi  
 Passio crine. Saül fieri sibi talia mandat;  
 Legendus de more Saül. qui tortilis auri  
 Ornamenta dabat tibi longis parta triumphis.  
 Absit ab articulis, nunc absit ab auribus aurum,  
 Murice palla nitens nunc absit (idonea non est  
 Lucibus) in cultu melius lugebitis atro.  
 Siccine Beniamidæ cecidere Heroës inulti?

### Pueri.

Iusta tuis, Jonatha, facit hæc mæstissimus umbris  
 Fædere fraterni David tibi junctus amoris.

*Sicut mater unicum amat filium suum,  
ita ego te diligebam.*

*Quomodo ceciderunt robusti, & peric-  
runt arma bellica?*






Nullus enim fratrem sic unquam frater ademptum  
Flevit, ut ille suos te suspiravit amores,  
Siccine Beniamidæ cecidere Heroës inulti?

## Puellæ.

Nulla parens sic unigenæ sub funera nati  
Luxit; ut extincto non consolandus amico  
Jesliades. Valeant, pereant ha! funditus arma;  
Armorum quando Jonathas decus occidit omne.  
Siccine Beniamidæ cecidere Heroës inulti?





## I S A I Æ.

## Cap. 5.

Canticum  
hoc duabus  
constat par-  
tibus, ali-  
quot capitū  
intervallo  
sejunctis.  
PriorCanti-  
ci pars ex c.  
5. Isaiæ sum-  
pta est, &  
continet ex-  
postulatio-  
nem adver-  
sus ingrata  
Vineam.  
Posterior  
Cantici  
pars ex cap.  
27. Isaiæ  
ducitur, ubi  
Propheta  
laudat Vi-  
neam meri.  
Quod ante  
me observa-  
vit noster  
Gaspar San-  
ctius.

**C** Antabo dilecto meo Canticum Patru-  
lis mei.

Vinea facta est dilecto meo in cornu fi-  
lio olei.

*Et sepivit eam, & lapides elegit ex ea,  
& plantavit vineam electam.*

*Et edificavit turrim in medio ejus, &  
torcular extruxit in ea.*

## ZELOTES IDYLLION.

## A R G V M E N T V M.

*ISAIAS PROPHETA IN PASTORALEM scenam Emmanuelem Sponsæ suæ Synagoga perfidiam exprobrantem sub eleganti & florida vinea allegoria introducit.*

**T**Ranslatos aliò Sponsæ dum sensit amores  
 Montibus in Solymis hinc usque ad sydera notus  
 Emmanuel; ut erat sterilis tunc fortè sub umbra  
 Palmitis; Et cui jam tutum sit credere, dixit,  
 Vineæ me quando spe ludificavit inani?  
 Quamvis illa mihi sit opimo consita colle,  
 Cui non Engaddi locuples contenderit aruum,  
 Non Soretano vallis celeberrima botro.  
 Fertilibus quis enim me latiùs imperat agris?  
 Quis meliùs glebam scrupis eruderat alter?  
 Ingenium quis me positusque notare locorum  
 Doctior, aut iustis plantaria credere sulcis?  
 An sola splendenti memorem mihi versa ligone  
 Sæpius? anne satam generoso germine vitem?  
 An positam fundi circum confinia sæpem?  
 Ut fideam magno structam molimine turrim,  
 Multiplicesque penus, nova ne desideret amplo  
 Quas mihi proventu stipet vindemia cellas.  
 En mea cunctantes invitant præla racemos,  
 Prægestitque lacus multo spumare rubenti.  
 Cur expectatos differs mea vinea fructus?  
 Heu malè te adversus studium consumpsimus omne!

*Et expectavi, ut faceret uvas, & fecit  
labruscas.*

*Nunc ergo habitatores Jerusalem, &  
viri Juda, judicate inter me, & vineam  
meam.*

*Quid est quod ultra debui facere vinea  
mea, & non feci? an quod expectavi ut  
faceret uvas, & fecit labruscas?*

*Et nunc ostendam vobis quid faciam  
vineae meae; auferam sepem ejus, & erit  
in depredationem, diruam maceriem ejus  
& erit in conculcationem.*

*Et ponam eam desertam, non putabitur,  
& non fodietur.*

*Et ascendent super eam vepres & spinae.*

Respondere meo pugnās si perfida voto;  
 Pergis in agrestem si degenerare labruscam;  
 Si mihi pro botris scetus obtrudis amarus,  
 Unde molesta crees stomacho fastidia; quando  
 Debueras tantis exercita vinea curis  
 Vina novum domino Sabamæa reponere nectar.  
 Dicite (cura mei si vos habet ulla Sodales)  
 Dicite, quæ merui precor hæc ludibria culpa  
 Isti mihi quæ mites promiserat hætenus uvas  
 Indole mutata vitis nunc reddat acerbas?  
 Num fuit officij quicquam mihi forsân omisum  
 Neglectumve mei? quæ me vigilantia fugit?  
 Quid me præterijt? vitio quid vertere possis  
 Præter amassè nimis? Meus hic erit unicus error  
 (Si tamen error erit) mihi quòd spes uberis inde  
 Facta fuit laticis; me quòd spes illa fefellit.  
 Quare age nunc omnem illius deposito curam  
 (Si potes Emmanuel.) Potero. dabit ira, pudorque  
 Possè. Quid? hæc igitur posthac deserta jacebit?  
 Et jaceat summumque ima radice flagellum  
 Contingat, nec opem sit qui ferat amplius ullam.  
 Amplius hanc curva non fingat falce putator  
 Aggrediens ferro ramos cohibere fluentes:  
 Non ea robustus resupinet jugera fossor  
 Assiduo prohibens vitem silvescere cultu;  
 Sed sinat extingui superantibus undique spinis.  
 Quoniam etiam sepem manibus demoliar istis  
 Quam possui. Pateat cunctis mea vinea prædæ;  
 Illudant illi pecudes impunè: petulcus  
 Hanc caper incessat cornu, durique veneno  
 Dentis, & admorsò plagas in cortice signet;  
 Fulmineus populetur aper, pandoque jacentem  
 Funditus evertat rostro, vastetque, ruatque.  
 Ah misera! ah quæ nunc spes est super? An tibi succos  
 Sufficiens Auræ forsân, roresque benigni

Unde

*Ex cap. 27. Isaia.*

*Ego Dominus qui servo eam, repente  
propinabo ei.*

*Ne fortè visitetur contra eam, nocte &  
die servo eam.*

*Indignatio non est mihi.*

*Quis dabit me spinam, & veprem in  
prelio? gradiar super eam, & succendam  
eam pariter?*

(a) Vtitur  
Columella  
hoc voca-  
bulo Lib. 3.  
ca. ultimo.

*An potius tenebit fortitudinem meam,  
faciet pacem mihi, pacem faciet mihi?*

*Qui ingrediuntur impetu ad Jacob; flo-  
rebit & germinabit Israël: implebunt faciem  
Orbis semine.*



Unde refflorefcas , rurfumque à ftripe refurgas ?  
 Non mihi fic vifum. Madidis edicimus Austris  
 Demittant aliquos ne nubibus ampliùs imbres  
 Te fuper. Ipfa fiti languens , confectaqué colles  
 Undique vicinos oculo livente rigari  
 Uberibus fpectabis aquis. Sed & arida pridem  
 Deferti facies mutata repentè virebit,  
 Siccaqué jejuni pinguefcet glarea ruris ,  
 Me tempeftivos fuperaffundente liquores.  
 Quiqué priùs fuerat fitienti pactus in arvo  
 Surculus , uvidulo trudet jam palmite gemmas ;  
 Me tenerum blando fruticem mulcente favore.  
 Alterius quanto cernes hæc commoda luctu ?  
 Ut prælata tibi vineta novella dolebis ?  
 Invida me vanis incendere mitte querelis :  
 Nil mihi perfuades. Odione ut profequar iftam  
 Quæ morem gerit ad nutus mihi vitis heriles ?  
 Non furor hic animo eft , aut indignatio nontro.  
 An quia damnavit te perfida vepribus , ijsdem  
 Hanc quoqué me fpinis obducere velle putafti ?  
 Et pariter tecum crepitantibus urere flammis ?  
 Quin potius feret huic teneræ mea dextera plantæ  
 Semper opem ; folida eft ipfi quia gratia mecum :  
 Gratia nullius livore folubilis unquam.  
 Felix planta ! vetus nunc oblivifcere nomen  
 Vitis eris poft hac Ifraelitis ; in illam  
 Aufpicijs translata meis. tibi fertilis uvæ  
 Cedit in aprico Balhamonis vinea clivo  
 Quæqué Damascenis vindemia pendet ab ulmis :  
 Iatus induces virides tu collibus umbras ,  
 Et (a) confemineis implebis ftripibus Orbem.

## EXCAP. 24.

## Lib. Num.

**C**um Palac duxisset Balaam super verticem montis Phogor qui respicit solitudinem; dixit ei Balaam:

*Adifica mihi hic septem Aras, & paratotidem vitulos, ejusdemq; numeri arietes.*

*Fecit Balac ut Balaam dixerat, imposuitq; vitulos, & arietes per singulas Aras.*

*Cumq; vidisset Balam quod placeret Domino, ut benediceret Israeli, nequaquam abijt, ut ante perrexerat, ut Augurium quaereret, sed dirigens contra desertum vulturn suum, & elevans oculos suos, vidit Israel in tentorijs commorantem per Tribus suas, & irruente in se spiritu Dei assumptâ parabolâ ait.*

*Dixit Balaam filius Beor, dixit homo cujus obturatus est oculus, dixit auditor sermonum Dei, qui visumem Omnipoten-*

## C A R M I N A   I D Y L L I O N .

## A R G V M E N T V M .

*ACCERSITVS AVGV R BAL AAM*  
*à Rege Moabitarum Balac, ut castris Iſraëlis ma-*  
*lediceret, præter expectationem è vertice montis*  
*Phogor bene illis precatuſ eſt.*

**T**E quoque Muſa, juvet veteris meminiffe Balami:  
 Cujus Idumeas perhibent ad carmina rupes,  
 Et juga palmiferi quondam tremuiſſe Phogori;  
 Inde per Armonis latè ſpatiantia vallem  
 Caſſia videns Hebræa ſenex. Altaria dixit  
 Hic mihi, Sephorida, ſeptem, ſine de grege ſeptem  
 Illic vitulos, agnos huc ſeptem liſte. ſit Aræ  
 Hoſtia quæque ſux. numero Deus impare gaudet,

## Balac.

Ecce tot erectæ tibi ſunt, quot præcipis, Aræ;  
 Ecce tot hîc holocauſta. Nihil niſi carmina deſunt  
 Deoveas quibus Iſacidas. Tibi rumpitur anguiſ  
 Carminibus: fac Iſraël rumpatur iſdem.  
 Sed priuſ augurium capta (de more) ſecundum.

## Balaam.

Nil moror augurium. Deus, en Deus. ore favete;  
 Jam canere arcanas ego filiuſ ille Bioris  
 Incipiam ſortes, venturaque dicere fata,

Quæ

*tis intuitus est, qui cadit & sic aperiuntur oculi ejus.*

*Quam pulchra tabernacula tua Jacob! & tentoria tua Israël! ut valles nemorosa, ut horti juxta fluvios irrigui, ut tabernacula quæ fixit Dominus, quasi cedri prope aquas.*

*Fluet aqua de situla ejus, & semen illius erit in aquas multas.*

*Propter Agag tolletur rex ejus, & auferetur regnum illius.*

*Deus eduxit illum ab Ægypto, cujus fortitudo sicut Rhinocerotis.*

*Devorabunt gentes hostes illius, & ossa eorum confringent, & sagittis perforabunt.*

*Accubans dormivit ut Leo, & quasi Leona, quam suscitare nemo audebit.*

perinuntur

a Jacob!

memorosa,

taberna-

tri prope

Semen il-

E' au-

, cuius

E' offu-

rabunt.

r quasi

it.

Quæ Deus esse suo voluit præcognita vati:  
Pectoris erudiens oculos mihi luce superna,  
Sensibus abducit dum me tantisper ab imis.

Quàm juvat Isâcidum niveis tentoria velis  
Aspicere, & pulchro digestas ordine turmas:  
Sic mihi thuriferis Arabum viridaria rident  
Arboribus distincta; placet sic vallis opaca  
Illicibus, sic curva sâæ prope flumina cedri.  
O quantum soboles crevit sæcunda Jacobi!  
Qui volet illius numerum subducere; discat  
Antè, quot Eoi veniant ad littora fluctus:  
Aut ubi præcipitans invergit Aquarius urnam  
Effusa quot in arva cadant stagnantia guttæ.  
Quis Veget hanc primus gentem? de sanguine cretum  
Beniamini video juvenem. quantum instar in illo est?  
Qui comites cingunt latus? ut super-eminet omnes?  
Felix ille, suo si non ignoverit hosti,  
Si non oranti veniam donarit Agago!  
Hunc propter regno cadet, & stirps tota nepotum,  
Tanti stat; non imperio parere Tonantis.  
Sit, moneo, tuus iste labos Hebrææ, sit una  
Cura, Dei docilem monitis advertere mentem:  
Qui Pharia solvit te compede, quique Tyrannum  
Uxor Faythæas Pharaonem excussit in undas,  
Ventilat ut cornu meditantem prælia taurum  
Rhinoceros, cui non se conferat ulla ferarum.  
Et quisquam Deus omnipotens, tibi robore certet?  
Si conjuratus bellum tibi moverit Orbis;  
Se conjuratus superatum sentiet Orbis.  
Omnis Arabs, omnis tibi se submitter Idume.  
Denique quotquot erunt Hebræi nominis hostes,  
Te stement cadent trajesti terga sagittis,  
Albentesque tegent cumularis ossibus agros.  
Jam lituos aurei juvat, jam classica Judæ  
Victoris, jam Jessæos spectare triumphos!  
Quem se fert curru Rex conspiciendus eburno?

*Qui benedixerit tibi, erit & ipse benedictus; qui maledixerit, in maledictione reputabitur.*

*Iratusq; Balac contra Balaam complo-  
sis manibus ait:*

*Ad maledicendum inimicis meis te vo-  
cavi, quibus è contrario tertio benedixisti.  
Revertere ad domum tuam.*

*Decreveram quidem magnificè te ho-  
norare, sed Dominus privavit te honore.*

*Respondit Balaam ad Balac, nonne nun-  
tius tuis quos misisti ad me dixi, si dederis  
mihi Balac plenam domum suam argenti  
& auri, non potero praterire sermonem  
Domini Dei mei, ut boni quid vel mali  
proferam ex corde meo, sed quicquid Do-  
minus dixerit, hoc loquar?*

*Veruntamen pergens ad populum meum  
dabo consilium quid populus tuus populo  
huic faciat extremo tempore. Sumpta igitur  
parabolâ rursum ait.*

*Dixit Balaam filius Beor, dixit homo  
cujus obturatus est oculus, dixit auditor  
sermonum Dei, qui novit doctrinam Al-*



Ut viridi in saltu leo procubat, utve læna  
 Venantum secura jacet: sic otia victor  
 Jeshiades colet. ô tantum mihi suppetat ævi  
 Quantum sat fuerit victori fausta precari!  
 Qui tibi læta canent Epinicia, maxime Regum,  
 Illis mella fluant, illis nascatur amomum.  
 Si quis erit, Diris qui te devoverit; illi  
 Pro viola, spinis veniat palinus acutis.

### Balac.

Vane senex hosti decuit te dicere carmen  
 Exitiale meo; cur auxiliare repemè  
 Ter canis? ô utinam nunquam mihi cognitus esses!  
 Eheu quid volui misero mihi! fontibus aprum  
 Immissi, demens cum te hæc in regna vocavi.  
 I, quocumque pedes, & te mala deferet ales.  
 Mens equidem fuerat hinc te dimittere largis  
 Ornatum donis (nec enim mihi talia desunt)  
 Sunt & oves, sunt & pingues, Dis gratia, tauri;  
 Insecti sunt argenti, factique talenta,  
 Illa Palæstinus sibi pridem exoptat aruspex.  
 Et referet: mea quandoquidem tibi munera sordent.

### Balaam.

Non ego nescieram te munera plurima, fando  
 Quæ numerare vales, pretium dare posse Balamo  
 Carminis: at non si montes promiseris auri,  
 Vertere, Saphorida, decreta æterna valebo.  
 Mene putas hæc sponte loqui? mihi maximus auctor  
 Est Deus. hic vati numeros, & carmina dictat.  
 Quæ jubet illa cano. Si quid tamen hæc mea si quid  
 Consilio poterit prodesse industria vobis;  
 Expenar: teque hinc discedens pauca monebo.

*tissimi, & visiones Omnipotentis videt, qui  
cadens apertos habet oculos.*

*Videbo cum, sed non modò, intuebor illum,  
sed non propè.*

*ORIETVR stella ex Jacob, & con-  
surget virga de Israël.*

*Et percutiet duces Moab, & vastabit omnes  
filios Seth. Et erit Idumaea possessio  
ejus, hereditas Seir cedet inimicis suis:  
Israël verò fortiter aget.*

*De Jacob erit qui dominetur, & perdat  
reliquias civitatis.*


*Cumq; vidisset Amalec, assumens para-  
bolam ait:*

*Principium gentium Amalec, cujus ex-  
trema perdentur.*

*Vidit quoq; Cincum, & assumptâ pa-  
rabolâ ait. Robustum quidem est taberna-  
culum tuum, sed si in petra posueris ni-  
dum tuum, & fueris electus de stirpe Cin,  
quamdiu poteris permanere? Assur enim  
capiet te*

*Assumptâq; parabolâ iterum locutus  
est. Heu! quis victurus est quando ista fa-  
ciet Deus? venient in triremibus de Italia,  
superabunt Assyrios, vastabuntq; Hebraos,  
& ad extremum ipsi peribunt.*

Abripit intereà quò Numinis aura, sequamur;  
 Pax igitur linguis. ego filius ille Bioris  
 Os, animumque Deo plenus, mihi visa profabor.  
 Eminus ecce novum video procedere sydus:  
 Ecce domo nascens orietur stella Jacobi.  
 Stella (Jacobe) tibi; tibi se demittet ab æthra  
 Ipse Deus, præsens qui sceptrâ Hebræa capeffer.  
 Hujus in adventum jam nunc Moabitica regna  
 Responſis horrent cælestibus; horret Idume,  
 Et juga nimboſi trepidant turbata Sciri.  
 Hic Iſraëli trans ultima Bactra, Scythasque  
 Proferet imperium, quod nec mare terminet ingens.  
 Si qua sub axe jacet Mundi plaga, quò neque nautæ  
 Cornua Sydonij torſerunt hætenus; extra  
 Altrorum, Solisque vias; huic ſerviet uni.  
 Unus enim terris hic omnibus aurea condet  
 Sæcula, purgato monſtris immanibus Orbe.  
 Quò feſtum rapis infœlix Amalecia vatem  
 Terra, antiqua, potens olim: fata aſpera, fata  
 Nunc te dira manent. nunc alto à culmine præceps  
 Acta rues. Neque vos melior fortuna Cinæi  
 Excipiet; quamvis firmiſſima ſaxa tenetis.  
 Hinc (velut è nido quò congeſſere columbæ)  
 Vos celer Aſſyrij depellet militis arcus.  
 Aſſyrio ſed & impendent ſua fata viciffim:  
 Namque ſeneſcentis ſub ſæcla noviffima Mundi,  
 Ille tuas ſupplex agnoſcet Roma ſecures.  
 (Hoc tibi nomen erit, nunc es ſine nomine tellus)  
 Ipſe quoque Hebræus longa obſidione premetur;  
 Invitaque jugum Latij cervice ſubibit.  
 Nec minùs inſtabiles rerum tu Maxima Roma  
 Experire vices. Quoniam ſors omnia verſat.  
 Augur ab his tacuit. cælique è parte ſerena  
 Intonuit lævum. quod tot præſagia firmet.



## I S A I Æ.

## Cap. 12.

**C**onfitebor tibi Domine, quoniam iratus es mihi: conversus est furor tuus, & consolatus es me.

Ecce Deus Salvator meus: fiducialiter agam, & non timebo.

Quia fortitudo mea, & laus mea Dominus, & factus est mihi in salutem.

## S O T E R I D Y L L I O N .

## A R G V M E N T V M .

*EXPRIMIT HOC POEMATE ISAI  
as Propheta sub fontis allegoria, quanta in Eccle-  
siam futura sit donorum Dei Servatoris profusio.*

**F**ortè sub umbroso captabat frigora luco  
Amosides, spatioque viæ defessus, & æstu;  
Cum subito afflatus meliori Numinis aurâ,  
Ad circumstantes dedit hæc oracula sylvas.  
Jam tempestivum fas est mihi pangere carmen:  
Ante (satebor enim) mæror me tantus habebat,  
Dum tua detonuit magno, Deus, ira fragore;  
Vix ut vita foret, nedum mihi carmina cordi.  
At simul ut positus furor est tibi, se simul ægro  
Interdicta diu retulerunt gaudia vati:  
Inque tuas arsit mihi Mens erumpere laudes.  
Sic ubi Ver Hyemi tepidum successit aquosæ,  
Nubila solvantur zephyris, nitet æthere sudo  
Sol melius, totique redit sua gratia Mundo:  
O arime! antiquos hinc jam obliviscere luctus,  
Diluat & vanum fiducia certa timorem:  
Ecce venit; tibi quem promitti sæpius audis  
Servator tuus ille, Dei genus. Aurea terris  
Sæcula qui condet: studij qui largus in omnes  
Aneret invalidis vires, ægrisque salutem.  
Huc ades ô divine puer! te noxia viso  
Gramina, te colubri ponent mulcente venenum:  
Quæque siti fuerant damnatæ nuper arenæ,

*Haurietis aquas in gaudio de fontibus  
Salvatoris :*

(a) Iudæi  
hos omnes  
Barbaros  
esse cense-  
bant, qui  
non uteren-  
tur lingua  
Hebraica.

(b) Familia  
re est Poësi  
Hebrææ hu-  
jusmodi Epi-  
sodia Canti-  
cis intexere

(c) Passim  
in sacris  
litteris No-  
men Domi-  
ni, idem est  
quod filius  
Dei.

*Et dicetis in illa die,*

(b) *Confitemini Domino,*

*Et invocate (c) Nomen ejus.*

*Notas facite in populis adinventiones e-  
jus, mementote quoniam excelsum est No-  
men ejus,*



Ecce tuo adventu salientibus undique manant  
 Fontibus, & rorat scatebris prius arida gleba:  
 Lætius ut Siloë Davidis non irriget hortos,  
 Quamvis ille sacra lapsus de rupe Sionis  
 Mille per arcolas tortis anfractibus erret.  
 O! Servatoris dulces è fontibus undæ,  
 Quas super-aspirans alit indulgentia cæli,  
 Didit & in terræ cunctas habitabilis oras.  
 Huc alacres ergo spretis properate lacunis:  
 Hos, pueri, latices haurite: hoc pellite longam  
 Fonte sitim, vos his certatim tingite lymphis.  
 Fœlix qui largo totum se proluet haustu!  
 Sive Hebræus erit, sive Advena, nullus ab istis  
 Submoveatur aquis. Nullo discrimine mixtus  
 (a) Barbarus indigenis communia pocula ducat.  
 Cum madidi fuerint, vox hæc erit omnibus una:  
 O Pater! ô magno proles æquæva Parenti,  
 Aspirate novo vobis quem dicimus, hymno!  
 A Patre principium sit carminis. Omnia munus  
 Sunt Patris. Hic rerum caput est, & terminus idem;  
 Ille favet nobis: illi sua semper apud nos  
 Laus erit, & nullis veterascet gratia sæclis.  
 Teque adeo æterni magnum Patris incrementum  
 Humani generis Servator, ad astra feremus:  
 Semper ad astra feremus amabile nomen JESV.  
 Si tamen hoc impar non aspernabere carmen.  
 Namque tuum quis consilium, sensusque profundos  
 Efferat ore pari? quis suspicienda reperta,  
 Ingeniosus Amor tibi quæ dictavit, adumbret?  
 Ingeniosus Amor modicos te cogit in artus,  
 Matris eburneolis te cingere colla lacertis  
 Ille docet, niveoque rigare labellula lacte:  
 Unde tibi tacitis placidissimus ingerit alis  
 Se sopor. Ah illum ne garrula rumpat hirundo!  
 Ah tibi lacrymulis ne semireclusa rubescant  
 Lumina, dum reliquum deterges pollice somnum!

*Cantate Domino quoniam magnificè fecit, annuntiate hoc in universa terra.*

*Exulta & lauda habitatio Sion, quia magnus in medio tui sanctus Israël.*



Non erat humanum tanti genus : ejus amore  
Unus ut è nobis fieres , ut parvus , ut infans ,  
Clara Dei soboles ! ô munificentia , nullum  
Aut fervare modum , aut finem contenta merendi !  
Audiat hæc omnis divina Genethlia tellus :  
Audiat , exultetque Sion . Quia monte Sionis  
Alme puer (sanctum jubar Isiaëlis) ab alto  
Exorieie , tuæ mediusque videbere plebi .

Præscius hæc vates super Emmanuele canebat ,  
Quæ si me Latia resonare sinetis avena  
Musæ , noster amor , Solymitides : hæc rea voti  
Coniferâ vobis pendebit fistula cedro .





EX LIB. 2. REG.

Cap. 23.

**H** *Ec autem sunt verba David novissima,*

*Dixit David filius Isai: dixit vir, cui  
constitutum est de Christo Dei Jacob, egre-  
gins psalmes Israël.*



GEORGIO STENGELIO  
SOCIETATIS JESU THEOLOGO.

GRATIAE IDYLLION.

A R G V M E N T V M.

*HOC IDYLLIO TOTVM SE IN GRATIARVM actionem effundit David, à Deo assumptus ex humili Pastore, ad regnum Israël.*

**S**ive jugo sacri refides formosa Sionis  
Gratia; sive choros manibus per mutua nexis  
Cum gemina ducis per florea prata sorore  
Ad Jordanis aquas; paullum Solymæa relinque  
Pascua, Vindelicum pro me visura Lyceum,  
Vindeliciq; decus compellatura Lycæi  
STENGELIVM: cujus pridem sum totus in ære.  
Nec fas tanta meis dissolvere nomina verbis  
Tu nisi præ s fias, nisi tecum spondeat unà  
Jeshiades, tibi præ cunctis dilectus alumnus.  
O illi quoties & quàm divina locuta es!  
Partem aliquam numeris mihi da vulgare Latinis;  
Ut sua STENGELIO sint à me dona vicissim,  
Ut memor officijs certem, vinciq; recusẽm.  
Incipe. pauca meo dic nomine carmina, quondam  
Quæ David à caulis ad Judæ sceptrâ vocatus  
Panxit; agens tali meritas pro munere grates.

O mihi præteritis modulata frequentius annis  
Cum patrias agerem per Ephratea rura bidentes

*Spiritus Domini locutus est per me, &  
sermo ejus per linguam meam.*

*Dixit Deus Israël mihi, locutus est for-  
tis Israël, Dominator hominum, justus Do-  
minator in timore Dei.*

*Sicut lux Aurora, oriente Sole, mane  
absq; nubibus rutilat, & sicut pluvijs ger-  
minat herba de terra.*



En age nunc etiam me cantibus affice blandis  
 Fistula, regales postquam sum nactus honores.  
 Nec Regem me pœniteat tibi jungere labrum  
 Cui sacer aspirat divina Spiritus aura?  
 Hoc afflante sonas celsum (mea tibia) carmen,  
 Et te stelliferis attollens axibus infers;  
 Unigenamque Dei natum, de vertice summo  
 Aetheris, humanæ trahis ad commercia vitæ;  
 Fœtaque venturis miranda nepotibus edis.  
 Quî sit ut exili sic delectetur avena  
 Sic tenui stipula magnus Deus? An juvat illum  
 Ludus hic, ima solet qui conciliare supremis?  
 Semper id acceptum refer illius omne favori,  
 Quod sit ubique tibi magnum (mea tibia) nomen:  
 Quod tua per Solymos lignator carmina saltus  
 Cantet, & hæc Libani doceat resonare cupressos.  
 Ego prius sit Apis florum, rorisque cicada  
 Inmemor, & nidum dediscat amare palumbes;  
 Ante Dei quam te capiant oblivia. Semper  
 (Seu retegget Sol mane diem, seu Vespere condet)  
 Ille tibi sit præcipuo celebrandus honore;  
 In Solymos cui multa focos cadit hostia, multo  
 Thure Sionæis cui fumat in arcibus Ara.  
 O columen gentisque meæ, Pater almæ, meumque!  
 Ut regis humanum placidè genus? omnia blando  
 Electis ut imperio? julle quam cuncta gubernas?  
 Sicque faves primis, ut non tamen ultima spernas?  
 Non fuit idcirco Davidis tibi gratia vilis,  
 Quod fratrum minimus, pastor quod parvulus esset  
 Ante Palestinæ quam regna capefferet oræ,  
 Oris ab obscura quæ te fuit auspice sorte.  
 Ac velut erumpit (sed quæ vix diu crepet umbris)  
 Prima dies; sensimque rosas ferit atria cæli;  
 Mox auri fulgore micans circum undique lumen  
 Crescit in immensum, radiosque exporrigit omnes.  
 Haud secus à modico paulatim sustulit ortu

*Nec tanta domus mea apud Deum, ut  
 pactum aeternum iniret mecum firmum in  
 omnibus atq; munitum. Cuncta enim Sa-  
 lus mea, & omnis voluntas: nec est quic-  
 quam ex ea quod non germinet.*

*Prevaricatores autem quasi spina evel-  
 lentur universi: qua non tolluntur manibus:*

*Et si quis tangere voluerit eas armabi-  
 tur ferro, & ligno lanceato, igneq; succen-  
 sa comburentur usq; ad nihilum.*

Se Jesseæ domus. Quid enim domus esset Jesse  
 Ni Pater indulgens huic incrementa dedisses?  
 Tu media lectum Davidem de plebe, Saulis  
 Substituis solio, sacroque perungis olivo;  
 Jura det ut terris quas hinc mare terminat, illius  
 Palmifer Euphrates. Et quò tua dona manerent  
 Perpetua; Hæc mecum conceptis edita verbis  
 Fœdera sanxisti. Tellus dum stabit & æther  
 Mansuros Davidis per sæcula cuncta nepotes,  
 Qui Solymi teneant sceptrum immutabile regni.  
 Neu quid Opum cumulo, vel Honorum desit; in horas  
 Splendidiora mihi benefacta prioribus addis.  
 Et quis erit modus? Uberius non vere repenti  
 Roscidus in terras cælo demittitur humor,  
 Qui sola sæcundet largis proventibus; unde  
 Luxurians læto progerminet herba virore.  
 A te principium (jugi ceu fonte) salutis  
 Omne meæ fluit. Hic à te mihi nascitur uao  
 Impetus, hæc adens & inexsaturata voluntas  
 Teque tuasque Pater laudes super astra ferendi;  
 Si quantum cuperem, possem quoque. Dulcius ullum  
 Non mihi sit studium, potior non ulla voluptas,  
 Quam meminisse tui. Si quis tua nosse prophanus  
 Numina dissimulet, si te quis amare recusæt,  
 E vivis illum precor à radice revellas.  
 Iratus velut excindit vepreta colonus  
 Elusum ulciscens immixtis falcibus annum;  
 Urere nec dubitat crepitante novalia flamma  
 Quando aliter nequit invisos evincere sentes,  
 Consurgunt nigri sinuosa volumina fumi  
 Vicinasque tegunt densa caligine sylvas.

*Epilogus.*

Omnia quæ Davidi crebrò meditata, beatus  
Audijs Hermonis vertex; nunc & juga discent  
Norica, si facili meus hæc admiserit aure  
STENGELIVS, nostram nuper dignatus amico  
Accipere hospitio (quamvis sit rustica) Musam.



JACO-



## P A X I D Y L L I O N.

## A R G V M E N T V M.

*APVD BYBLVM PER ACTA VINDE-*  
*mia Virgines Hebrae ducunt choros de more, &*  
*cantu celebrant Pacem qua fruebantur temporibus*  
*Josiae Regis, in cujus etiam laudes excurrunt.*

**Q**uæ Bybli vineta jugis lætissima surgunt,  
 Hebraides olim choream duxere puellæ,  
 Puniceis omnes evinctæ crura cothurnis:  
 E quibus agrestes inflare perita cicutas  
 Debbora grandævi neptis sic cepit, Oniæ.  
 Linquite tantisper calathos, quibus ante tulistis  
 Calcandam (sociæ) prælis spumantibus uvam.  
 Otia jam subeant, acta est vindemia vobis.  
 Sumite palmitibus redimitos sumite thyrsos.  
 Sic pater Jäpeti jucundæ consitor uvæ  
 Instituit festis thyasos vestire corymbis,  
 Pampineisqûe leves inducere frondibus hastas.  
 Sumite palmitibus redimitos sumite thyrsos.  
 Ipse senex agili docuit sola tundere planta;  
 Repperit ipse choros, salijt quoque primus in illis,  
 Numine placato donis & pace redempta.  
 Sumite palmitibus redimitos sumite thyrsos.  
 Nempe chori sunt Pacis opus. celebremus honores  
 Pacis: ego Paci præcentrix ordiar hymnum:  
 Nec, reor, alternis vos respondere pigebit.  
 Sumite palmitibus redimitos sumite thyrsos.  
 O Bona Pax! opifex rosæ formosa coronæ,

Palmitis inventrix, oleæ mitissima custos;  
 Nomine sive voles alio quocumque vocari.

Sumite palmitibus redimitos sumite thyrsos.  
 Ad Nomadas Bellum procul hinc eat. aurea nobis  
 Pax ades. armorum non sit laus ulla, nec usus,  
 Aut si quis fuerit, solos servetur in apros.

Sumite palmitibus redimitos sumite thyrsos.  
 In galeis posthac suspendat aranea telam,  
 Et cava scuta virum pueris cunabula fiant,  
 Inque laboriferos abeat lorica ligones.

Sumite palmitibus redimitos sumite thyrsos.  
 Rus colito (Nabothæ) tuum. Pone ordine vites;  
 Inde suo carpes maturos tempore fructus:  
 Nec tua vastabit peregrinus prædia miles.

Sumite palmitibus redimitos sumite thyrsos.  
 Agricolis pleno redijt jam copia cornu;  
 Ampla nec immensas capiunt sâtis horrea messes;  
 Uteribusque boves gravidis mulctralia vincunt.

Sumite palmitibus redimitos sumite thyrsos.  
 Scilicet hæc nobis Josias otia fecit  
 Purpureas prima signans lanugine malas,  
 A tenero superis puer acceptissimus ungui.

Sumite palmitibus redimitos sumite thyrsos.  
 Sextus ab undecimo vix illum ceperat annus,  
 Cum Solyma ritus exegit ab urbe prophanos,  
 Et patrijs veteres aris revocavit honores.

Sumite palmitibus redimitos sumite thyrsos.  
 Ergo prius salte mitescent æquoris undæ,  
 Byblina vel dulcem mutabunt vina saporem,  
 Quam nostro illius labatur pectore nomen.  
 Ponite (nox cælo venit humida) ponite thyrsos.





## TOBIAS IDYLLION.

## A R G V M E N T V M.

*ANGELVS RAPHAEL TOBIAM  
puerum timore consternatum, & sibi à carnivoro  
piscè male metuentem, hortatur ut piscem exente-  
ret; fel & jecur ad medicamenta seponat.*

**C**ulter ubi? cultro piscem fode. cætera mergis  
Exta dato; tantùm fel & jecur abde canistro,  
Namq; valent medicos ea (plus quam credis) ad usus.

Fortunate nimis quot te puer inde manebunt  
Commoda? sed quâ sint ratione paranda docebo.

I Tobia medicas i (me ductore) per artes.  
Sara tibi dabitur. Debent hæc pharmaca Saram.  
Hanc pridem petiere proci sibi jungere septem,  
At septem periire proci; quos improbus omnes  
Sustulit Asinodes, fatoque extinxit acerbo.

I Tobia medicas i (me ductore) per artes.  
Juris in hos aliquid Dæmon sibi sumpserat hircos  
Ambierant turpi castam qui mente puellam:  
Tu patribus puer orte bonis, tu sanguis Abrami  
Consilijs Saræ thalamos melioribus opta.

I Tobia medicas i (me ductore) per artes.  
Dum tibi legitimo tradetur fædere conjux,  
Nocte Deum primâ supplex in vota vocato:  
Carbonesque adole vivos, & sulphura pura.

I Tobia medicas i (me ductore) per artes.  
Mox prunis superimpones à pisce revulsam  
Donec eat jecur in cineres. Hjs Dæmona sacris

Aggre-

Aggredere: ille licet Superos & carmina temnat,  
Terga tamen solo vertet nidore fugatus.

I Tobia medicas i (me ductore) per artes.  
Collige sopito si quid superabit ab igne;  
Elatosque foras cineres da pellere ventis,  
Pellere da ventis & dic, Asinodea pello.

I Tobia medicas i (me ductore) per artes.  
Neve parum possint hæc pharmaca; tunc ego carmen  
Auxiliare canam, quod Dæmona, compedis instar,  
Alliget: & vinctum sitienti damnet arenâ  
Quâ vetus est altis Thebe tumulata ruinis.

I Tobia medicas i (me ductore) per artes.  
Quanta vides ex hoc miracula pisce sequantur  
Unde tibi, puer, exitium mortemque timebas:  
His potiora dabo, quando Deus annuit auspex.

I Tobia medicas i (me ductore) per artes.  
Hoc si felle litos oculorum terferis orbes,  
Restitues pulsâ cæcis albugine lucem.  
Inde tuo facies. collyria certa parenti.

I Tobia medicas i (me ductore) per artes.  
Ex oculis si sponte fluet membrana: Bonum sit:  
Hanc lege continuo digitis, hanc porrige matri.  
Tunc pater aspiciet rursus spirabile cæli  
Lumen, & acceptâ faciet pro luce juvenco.


I Tobia medicas i (me ductore) per artes.  
Gratum veniet senior Nabathæus utrique;  
Præque rei novitate stupens, Puer optime, dicet  
Quis medica tam solertem te fecit in arte?



I N D E X  
CANTICORVM SACRO-  
RVM.

1.	<b>C</b> <i>Ant: Mosi &amp; Maria.</i>	<i>Pag. 2.</i>
2.	<i>Cant: Novissimum Mosi.</i>	<i>pag. 8.</i>
3.	<i>Cant: Debora Prophetidis.</i>	<i>pag. 22.</i>
4.	<i>Cant: Judith.</i>	<i>pag. 32.</i>
5.	<i>Cant: Trium puerorum Hebraorum.</i>	<i>pag. 40.</i>
6.	<i>Cant: Jonæ Propheta.</i>	<i>pag. 46.</i>
7.	<i>Cant: Anne Matris Samuëlis.</i>	<i>pag. 50.</i>
8.	<i>Cant: Ezechia Regis Juda.</i>	<i>pag. 56.</i>
9.	<i>Cant: Habacuc Propheta.</i>	<i>pag. 62.</i>
10.	<i>Cant: Triumphantis Ecclesiæ.</i>	<i>pag. 70.</i>
11.	<i>Cant: Zacharia patris Joannis Baptista.</i>	<i>pag. 82.</i>
12.	<i>Cant: Simeonis.</i>	<i>pag. 86.</i>
13.	<i>Cant: Beatissima Maria Virginis.</i>	<i>pag. 88.</i>

Finis Canticorum Sacrorum.



I N D E X

IDYLLIORVM SACRO-  
RVM.

1.	<b>I</b> dyll: <i>Apes.</i>	<i>Pag. 97.</i>
2.	<i>Idyll: Pastor-bonus.</i>	<i>pag. 101.</i>
3.	<i>Idyll: Bethle.</i>	<i>pag. 104.</i>
4.	<i>Idyll: Galaditides.</i>	<i>pag. 106.</i>
5.	<i>Idyll: Salomo.</i>	<i>pag. 110.</i>
6.	<i>Idyll: Nuptia Ruth.</i>	<i>pag. 114.</i>
7.	<i>Idyll: Somnium.</i>	<i>pag. 116.</i>
8.	<i>Idyll: Thiranthropia.</i>	<i>pag. 119.</i>
9.	<i>Idyll: Vulpes.</i>	<i>pag. 122.</i>
10.	<i>Idyll: Nilus.</i>	<i>pag. 126.</i>
11.	<i>Idyll: Job.</i>	<i>pag. 129.</i>
12.	<i>Idyll: David Giganticida.</i>	<i>pag. 131.</i>
13.	<i>Idyll: Sutamithis.</i>	<i>pag. 134.</i>
14.	<i>Idyll: Cedar.</i>	<i>pag. 137.</i>
15.	<i>Idyll: Arcus.</i>	<i>pag. 143.</i>
16.	<i>Idyll: Zelotes.</i>	<i>pag. 151.</i>
17.	<i>Idyll: Carmina.</i>	<i>pag. 157.</i>
18.	<i>Idyll: Soter.</i>	<i>pag. 165.</i>
19.	<i>Idyll: Gratia.</i>	<i>pag. 171.</i>
20.	<i>Idyll: Pax.</i>	<i>pag. 177.</i>
21.	<i>Idyll: Tobias.</i>	<i>pag. 179.</i>

Finis Idylliorum Sacrorum.



Ö-

eg. 97.  
. 101.  
. 104.  
. 106.  
. 110.  
. 114.  
. 116.  
. 119.  
. 122.  
. 126.  
. 129.  
. 131.  
. 134.  
. 137.  
. 143.  
. 151.  
. 157.  
. 165.  
. 171.  
. 177.  
. 179.

James Menzies

1



Der me Schriftfornicht Simon gedlonke

1799

